

Festival

di idioma

C1

Klas 4

Grupo di autor

Ronnie Severing • Ria Severing-Halman • Mavis Ersilia
Marelva Mathilda • Sharine Juliana • Ange Jessurun

Grupo di trabou di Aruba

Evelina Dania • Ludwina Koolman • Selvia Lumenier •
Maritza Petrocchi • Elvia Solognier • Lidwina Solognier •
Jeannine Tromp - Maduro y Pedro Velásquez
Gracy Dijkhoff • lider di proyecto
Barbara Meaux • asistente lider di proyecto

ISBN: 978-99904-68-00-7



Festival

di idioma

C1

Festival

di idioma



C1



Festival

di idioma

C1

Ronnie Severing, Ria Severing-Halman,
Mavis Ersilia, Marelva Mathilda, Sharine Juliana,
Ange Jessurun, Dayanara Noor, Elvira Bonafacio

Klas 4

Colofon

Fundashon pa Planifikashon di Idioma di Corsou a desaroya e metodo Fiesta di Idioma riba encargo di gobierno di Corsou. Seccion Desaroyo di Curiculo di Departamento di Enseñansa a adapta y contextualisa e metodo aki cu tin como titulo Festival di Idioma.

Grupo di trabou di Aruba

Evelina Dania, Ludwina Koolman, Lidwina Solognier, Selvia Lumenier, Maritza Petrocchi, Elvia Solognier y Jeannine Maduro
Gracy Dijkhoff, lider di proyecto
Barbara Meaux, asistente lider di proyecto

Conseho linguistico

Pedro Velásquez

Consehero didactico

Aura Arends
Magriet Pourrier

Redactor final

Mileischka Vlaun

Ilustracion

Jort van der Jagt, Anjo Mutsaars, Nancy Kers

Un palabra di danki ta bay na:

Jeanne Ecury y e maestranan di Colegio Conrado Coronel y di Colegio San Hose

Realisacion



Wietske Dijkstra

Derechonan reserva. No ta permiti pa reproduci nada di e edicion aki di ningun forma, ni pa ningun medio, sin autorisacion previo y por escrito di e editorial.

ISBN: 978-99904-68-00-7

Contenido

1	Mucha masha special	4
2	Cuenta di fantasia	44
3	Animal maraviyoso di antes y awor	84
4	Diferente fiesta di mundo	124
5	Ssst ... ta secreto	164



1 Scucha y papia

Combersacion

- Awe ta combersa tocante mucha cu curashi. Ora bo tin curashi, bo no tin miedo. Bo ta un mucha balente. Bo ta enfrenta situacion cu tin riesgo aden. Situacion dificil.
- Mucha cu ta defende otro mucha por ehempel, ta mucha cu curashi. Pero tambe mucha cu ta salba animal. Of mucha cu ta para un pleitamento. Mucha cu un handicap cu ta presta hopi, tambe ta mucha cu curashi.
- Na television bo por mira hende cu tin curashi. Tambe bo por lesa di nan den buki. Bo conoce un mucha balente? Dicon bo ta haya cu e tin curashi?
- Abo mes awor? Bo a yega di actua cu curashi? Conta na cua momento esey tabata.
- Hende cu a demostra hopi curashi, por bira hasta un heroe. Un heroe ta haci algo dificil of peligroso pa yuda un otro hende. Bo conoce un heroe? Ken e ta?

Regla di combersacion

Nos ta mira otro den cara ora nos ta conta otro algo.



2 Mi por lesa

Anne Frank

Na aña 1929 a nace na un pais leu for di nos, esta Alemania, un mucha muhe cariñoso. Su tata cu su mama a dun'e e nomber Anne Frank. Anne tabatin un ruman muhe, Margot. Anne su famia tabata mescos cu tur otro famia comun. Den dia Anne y Margot tabata bay scol. Papa Frank tabata bay trabou. Mama tabata percura pa tur cos ta na ordo na cas. Nan tabata feliz y contento.

Pero un dia tur cos a cambia. Esey tabata e dia cu Adolf Hitler a bira presidente di Alemania. Un presidente ta e lider di un pais. Ta bon pa bo sa cu den e tempo aya cos no tabata bay dje bon ey na Alemania. Hopi hende no tabatin trabou. Adolf Hitler tabata culpa e Hudiunan di tur cos cu tabata bay robes. Segun e tur Hudiu tabata floho y codicioso. Esta tristo no! Mas y mas hende tabata kere e mentiranan di Hitler. Nan a cuminsa odia e Hudiunan. Nan tabata zundra nan y trata nan malo. Esey a pone cu bida di e Hudiunan tabata bira dia pa dia mas dificil.

Anne y su famia tambe tabata Hudiu. Nan tabata masha tristo di tur locual cu tabata pasando. Tin biaha Anne y Margot tabata yora. Esey a pone cu riba un dia tata cu mama Frank a dicidi cu nan ta bay biba na un otro pais. Nan a bay Hulanda. Ey nan a bay biba den e ciudad Amsterdam. Na principio tur cos tabata bon. Contento di dje Anne tabata bay scol atrobe. E tabatin hopi amiga. Despues di un par di aña atrobe tur cos a


cambia. Hitler kier a bira lider di Hulanda tambe. El a cuminsa cu un guerra. For di e momento ey bida di tur Hudiu tabata parce un mal sueño. No tabata permiti pa Hudiu haci compras den e mesun pacus of tienda cu otro hende. Mucha Hudiu no por a bay tur scol mas. No tabata permiti Hudiu pa bay cine tampoco. Nan no por a haci uzo mas di bais, auto, bus of trein. E pobernan mester a cana. Tambe nan mester a cose un strea geel riba tur nan pañanan. Asina tur hende por a mira ken tabata Hudiu y ken no.

Hitler tabata exige pa tur Hudiu bay un campo di concentracion. Esey ta un sorto di prizon. Ey nan tabata trata hende na un manera teribel.

P'ese y mas y mas Hudiu tabata busca un luga di sconde. Nan tabatin e speranza cu asina Hitler y e hendenan cu tabata yud'e, lo no por a haya nan.

E famia di Anne tambe kier a busca un luga secreto di sconde. Esey tabata dificil! Poco hende tabata tripi yuda Hudiu. Mayoria di hende tabatin miedo di Hitler y su soldanan. Tata cu mama Frank tabata masha preocupa. Ta kico nan mester haci?

E cuenta ta continua.



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Na unda Anne Frank a nace?
2. Di cuanto hende famia Frank tabata consisti?
3. Ki dia tur cos a cambia na Alemania?
4. Kico ta un presidente?
5. Ken Hitler a culpa ora cu cos no tabata bay dje bon ey na Alemania?
6. Kico Hitler tabata bisa di e Hudiunan?
7. E hendenan a kere e mentiranan di Hitler? Kico nan a haci cu e Hudiunan?
8. Kico a pone cu riba un dia tata y mama Frank a dicidi di bay biba na un otro pais?
9. Unda nan a bay biba?
10. Con tur cos tabata na cuminsamento?
11. Ki ora e situacion a cambia?
12. Bida di tur Hudiu tabata parce un mal sueño. Bisa e frase aki cu bo mesun palabranan.
13. Kico e Hudiunan no por a haci mas?
14. Dicon tur Hudiu mester a cose un strea geel riba nan paña?
15. Kico hopi Hudiu a dicidi di haci?
16. Dicon poco hende tabata tripi yuda e Hudiunan?



4 Vocabulario

Heroe Anuar

Iris y Anuar ta amigo. Nan ta bay mes scol y nan tur dos ta den klas 4. Ta pica cu Anuar tin cu keda cas regularmente, pasobra e no ta sinti bon. Ora Anuar ta malo, Iris ta bay cerca dje despues di scol. E ora ey nan ta traha nan tarea hunto.

Anuar tin un malesa di sanger cu no ta cura. P'esey e mester bebe remedi tres biaha pa dia. E remedi ta smaak marga, pero si e no beb'e, Anuar ta cansa lihe. E ta haya dolor di barica y keintura. Tur luna Anuar mester bay laboratorio pa coy sanger.

Tambe dokter a dun'e un dieta special. Anuar mester come saludabel. Tur dia e tin cu come diferente sorto di berdura y fruta.

Awe atrobe Anuar no por a bay scol. "Con ta cu bo?", Iris ta puntr'e ora e bishita Anuar merdia. "Basta bon", Anuar ta responde cu su sonrisa di semper riba su cara. "Mi tabata blo wak ki ora bo ta yega cu e monton di tarea pa nos traha." "Ha, awe tin hasta tarea di historia pa nos haci", Iris ta contest'e.

Iris ta wak su amigo un rato y mientras e ta saca e bukinan for di su tas, e ta pensa: Anuar si ta un mucha cu hopi curashi. E no ta laga su malesa strob'e cu nada. Apesar cu e ta malo, nunca Anuar no ta crepchi. E no sa tin mal beis. Semper e ta amabel y e no ta keha. Anuar gusta haci chansa y hari. Tambe e ta cla pa yuda tur hende. Maske con malo e ta.

Manera dia el a scapa bisina Ma Yeye su pushi cu tabata pega den palo di kenepa. Anuar a subi te den top di e palo pa e baha e pushi. For di e dia ey Anuar ta Ma Yeye su heroe.

Bon mira, Anuar ta un ehempel pa nos tur, Iris ta sigui pensa. Ma Yeye tin rason. Anuar ta un heroe. Un heroe di nos tur!



1 Anuar ta malo hopi biaha. ... e ta keda cas.



2 Anuar tin un malesa di sanger. P'esey tur luna e mester bay ... pa coy sanger.



3 Dokter a duna Anuar un ... special. Tur dia e mester come diferente sorto di fruta y berdura.



4 Anuar no ta ... nunca. E no sa tin mal beis. Semper e ta amabel.



5 Pa salba e pushi di Ma Yeye, Anuar a subi un palo halto. Anuar tin hopi ...



6 Ma Yeye a bisa Anuar: "Bo ta un mucha balente. Bo ta mi ..."

Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

Bo sa e contesta?

- Den un laboratorio nan ta analisa bo sanger. Kico mas nan ta haci den un laboratorio?
- Ora bo tene dieta bo no por come tur cos. Ki ora hende sa tene dieta?

- crepchi
- curashi
- dieta
- heroe
- laboratorio
- regularmente



5 Pensa bon

5a Drecha frase

- E frasenan akibou a bruha. Bo por drecha nan?
- Cuminsa cu e palabra cursiva.



1. ta amigo – Hubert – *For* di chikito – di Jerry
2. tambe – nan bisiaña Daniel – *Nan* – ta amigo – di
3. den cura – nan – *Tur* atardi – ta hunga bala
4. ta gusta – e faya – *Pero* Daniel – tenta Jerry – asina cu
5. un pleitamento – *E* ora ey – formal – ta start – entre nan dos
6. memey di nan dos – *Sin* pensa – ta bula para – Hubert
7. no kier – pleita – *Hubert* – pa su amigonan
8. cu hopi curashi – *Daniel* – cu Hubert – ta un mucha – ta pensa

5b Cua palabra ta pas cu e descripcion?


- Lesa e splicacion y busca e palabra cu ta pas cu ne.

cobarde – crepchi – dieta – heroe – laboratorio – regularmente

1. Hende cu a haci algo hopi dificil of peligroso pa yuda otro hende.
2. Coyon
3. Cuminda special
4. Hopi biaha
5. Mal beis
6. Luga caminda nan ta analisa bo sanger

5c Un heroe

- Un heroe ta haci algo hopi dificil of peligroso pa yuda un otro hende. Un animal tambe por ta un heroe? Splica dicon si of dicon no.




5d Sustantivo

- Nos tin number pa hende, bestia, mata of cos. Wak e ehempelnan akibou.

Dokter, mama, pintor, maestra ta number di hende.
Baca, lagadishi, macaco, pisca ta number di bestia.
Cayena, wayaca, rosa, trinitaria, ta number di mata.
Bril, buki, computer, yabi ta number di cos.

- Palabra cu ta indica number di hende, bestia, mata of cos nos ta yama *sustantivo*.

- Dilanti di un sustantivo bo por pone *un* of *e*. Wak e ehempelnan akibou.
e maestra, e baca, e rosa, e bril
un maestra, un baca, un rosa, un bril




- Lesa e palabranan den e kolomnan akibou.
- Menciona cua di e palabranan ta un sustantivo.
- Corda cu dilanti di un sustantivo bo por pone *un* of *e*.


wanglo
flamingo
tuna
leon
potmoni
yongota

dieta
glas
canta
mangel
shimarucu
yora

dividivi
gawata
coki
kwihi
chauffeur
yuwana

ijscream
hopi
crepchi
payaso
tropicica
zebra





6 Skirbi bon

6a Scoge un buki

- Lesa e titulo y e cuminsamento di e siguiente dos bukinan.
- Cua buki ta parce bo mas dushi pa lesa?
- Skirbi den bo schrift dicon bo ta scoge e buki ey.



Esun cu mas curashi

Arno, Selena y Tom ta sinta riba un banki.
 “Mi ta ferfela mi mes”, Arno ta bisa. “Mi tambe”, Selena ta keha. Tom so no ta bisa nada. Pero diripiente e ta grita: “Mi sa caba kico nos por haci. Laga nos wak ken di nos tres tin mas curashi.”
 Cu wowo grandi Arno y Selena ta keda wak Tom. “Ta kico nos tin cu haci?”, nan ta puntr’e.



Heroe

Lorena ta lesa un buki di un cacho cu ta un heroe.
 E animal a salba un mucha for di un cas na candela.
 Lorena ta bira wak Akira, su cacho. Akira ta drumi dushi di dje den su macutu. Net ora Lorena ta pensa cu Akira nunca lo no bira un heroe, algo ta sosode ...



6b Scoge e palabra corecto

- Lesa e frasenan. Scoge y yena e palabra corecto.
- Skirbi e frasenan sin eror den bo schrift.
- Traha un pintura chikito na cada frase.

compaña - consola - handicap - pica - potret

1. Mama a ... Remo ora el a cay for di wipwap.
2. Mario kier saca un ... cu un yuwana riba su schouder
3. Ta ... si cu Anuar tin cu keda cas regularmente.
4. Tur biaha Iris ta ... su amigo Anuar.
5. Mucha cu un ... cu presta hopi, tin curashi.

6c Skirbi palabra


- Lesa e palabra den cada rij.
- Pensa tres palabra cu ta pas cu ne.
- Skirbi e palabranan sin eror den bo schrift.




heroe	crepchi	dieta	laboratorio

6d Skirbi un strip

- Studia e plachinan di e strip.
- Pensa un frase na cada plachi.
- Skirbi e frasenan den bo schrift.





1 Scucha y papia

Trabou pa pushi

Ivan ta un mucha masha alegre.
Caminda e ta, semper tin harimento.
E tin masha briyo tambe.
Ivan ta conoci cerca grandi y chikito.
Pero tin un cos cu nan no sa di dje.
Ta kico esey ta?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





2 Mi por lesa

Continuacion di e cuenta

Anne Frank

Pero esta un alivio! Riba un dia a bin un solucion toch. Famia Frank por a bay biba den un luga secreto tras di e oficina di Anne su tata. E luga tabata asina bon scondi cu hasta e hendenan cu tabata traha den e oficina, no tabata sa cu tabatin un apartamento eytras. Ta un cashi di buki bo mester a hala prome cu bo por a mira e entrada. Nan a yama e apartamento ey “*e cas patras*”.

Net prome cu nan a bay biba den e cas patras, Anne a haya un diario regalo. Un diario ta un schrift diki. E parece un buki. Den dje bo por skirbi tur dia kico a pasa cu bo. Anne tabata asina contento cu su diario cora cu blanco, cu el a bula brasa su tata cu su mama y duna nan un sunchi. Tur dia e tabata skirbi den su diario.

Mas cu dos aña famia Frank a keda biba scondi den e cas patras. Den dia nan no por a papia duro of haci niun zonido, sino e hendenan den e oficina por a tende nan. Tur anochi un señora cu yama Miep tabata trece cuminda pa nan. Anne su luga preferi tabata e zolder di e cas, cu ta e parti ariba den dak di e cas. Ey e por a wak for di bentana sin cu hende por a mir'e.

Pero riba un diadomingo mainta tempran Anne y su famia a tende un bochincha enorme. Nan a spanta masha! E soldanan di Hitler a kibra e porta di e cas patras y drenta. Na un manera bruto nan a detene pobercito Anne y su famia. Nan a hiba nan na un campo di concentracion, caminda cu

nan a cera tur Huidu. Ey tabata teribel. Nan tabata maltrata nan tur y apenas nan tabata haya cuminda.

Anne, Margot y nan mama a bira masha malo. Nan a hiba Anne su tata un otro caminda. Pa lunanan largo e tata no tabata tende nada di su famia. Te cu un dia el a haya e tristo noticia cu Anne, Margot y su casa no tabata na bida mas.

Despues di guera e tata di Anne a percura pa Anne su diario bira un buki di berdad. Un buki cu bo tambe por cumpra na libreria of fia na biblioteca.

Den e buki bo por lesa precies kico a pasa den e cas patras. Tambe bo por lesa con Anne a sinti su mes tur e tempo cu e tabata scondi.

Anne a skirbi den su diario cu hende nunca no mester perde curashi. Tambe el a bisa cu tur hende mester ta honesto y mester yuda otro. Maske con dificil esey por ta.

Si nos haci loke Anne pidi, nos mundo lo bira un dushi luga pa biba. Laga nos haci loke Anne ta pidi.

Anne, un heroe di berdad!



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Unda famia Frank a haya un luga di sconde?
2. Dicon e luga tabata asina bon pa sconde?
3. Con nan a yama e apartamento caminda famia Frank a bay sconde?
4. Kico Anne a haya net prome cu nan a bay biba den e cas patras?
5. Kico bo ta skirbi den un schrift asina?
6. Cuanto tempo famia Frank a keda scondi den e cas patras?
7. Dicon nan no por a papia duro of haci niun zonido den dia?
8. Ken tabata trece cuminda pa nan?
9. Cua luga den e apartamento tabata Anne su luga preferi? Splica dicon.
10. Unda a hiba Anne y su famia despues cu a detene nan?
11. Kico a pasa cu Anne, su ruman y su mama?
12. Kico e tata di Anne a haci despues di guera?
13. Kico Anne a pidi nos tur pa haci?



4 Vocabulario

Algo special

“Mami, otro biaha ora nos bay pelukeria, mi por laga tiña mi cabey?”, Sharon ta puntra.

“Dicon bo kier laga tiña bo cabey?”, mama ta puntra straña. “Bo tin asina bunita color di cabey.”

Sharon no ta bisa nada. Su lip ta cuminsa tembla.

“Ta kico a pasa?”, mama ta puntra. “Nan a tenta bo atrobe na scol?”

Sharon ta sacudi su cabes cu si. Tin mucha cu ta ter e. Principalmente e triyiso Timo, Nina y Flora. “Hey, tomati!” of “Luz di trafico!”, nan ta grita ora e pasa.

Mama ta pasa man den Sharon su cabey. “Mi yiu, no bira tristo ora nan haci bofon di bo”, e ta bisa. “Bo cabey cora ta masha bunita. Tin hopi hende cu ta laga tiña nan cabey cora, pasobra nan ta haya e color asina nechi.

Bo cabey cora ta parti di bo. Nos tur tin un cos cu ta haci nos otro for di tur hende.”

“Si”, papi ta bisa awor. “Ami ta un barigonchi.”

“Anto ami tin un marca na mi rudia”, mami ta sigui. “Tempo mi tabata mucha, mi a cay duro. Caminda e herida tabata bo ta mira un strepi awor, un cicatriz.”

Sharon ta keda keto un rato. Caba e ta bisa: “Mi amiga Tes tin purunchi. Anto e triyiso Timo, Nina y Flora tin un buraco den nan cachete.”

“Bo ta mira?”, mama ta bisa cu un sonrisa.

“Tur hende tin algo special. Un cos tipico, un cos cu ta cay na bista. Mucha cu ta tenta of ter, no sa esey. P’esey nan ta actua un tiki bobo.”

“Mama tin rason”, Sharon ta bisa contento.

“Otro biaha ora nan ter mi, mi ta haci manera mi no ta tende.”



1 Dos ruman cu a nace hunto, nos ta yama un ...



2 Tres ruman cu a nace hunto, nos ta yama un ...



3 Ora bo ... un hende, bo kier djis haci pret.



4 Ora bo ... un hende, bo ta trat’e na un manera falso of cruel.



5 Timo, Nina y Flora ta haci Sharon tristo ora nan haci ... di dje.



6 Tur hende tin algo special, algo ... cu ta cay na bista.

Tarea 1
Kico bo ta yena?
• Lesa e frase bou di cada plachi.
• Busca e palabra cu falta, den e rij akibou.
• Skirbi e palabra den bo schrift.

Tarea 2
Bo sa e contesta?
Con nos ta yama un mucha cu ta forma un morocho cu un otro mucha?
Busca e palabra den e rij akibou.

- bofon
- morocho
- pia di morocho
- tenta
- ter
- tipico
- triyiso




5 Pensa bon

5e Cua palabra bo ta scoge?

- Falta diferente palabra den e frasenan akibou. Nan a bay para den e kolom tras di e frasenan.
- Pone cada palabra bek na su luga.

Awasero

1. Michael y Sharine ta ... mama den camber.
2. Den cashi nan a ... cu un gieter.
3. Mesora nan ta ... un bon idea.
4. Michael y Sharine tin gana di ... hende.
5. Ma mama no ... laga nan bay pa caba.
6. Diripiente telefon ta ... ring den sala.
7. Aha, porfin nan chens a ...
8. Michael cu Sharine ta ... e gieter cu awa di cranchi.
9. Nan ta ... den e palo banda di e porta di cura.
10. Nan ta ... un tiki awa ora hende pasa.
11. E hendenan ta core ... nan cabes lihe.
12. Hihhi, nan ta ... cu ta awasero ta cay.



haya
kier
cuminsa
nek
topa
yuda

basha
tapa
kere
sconde
yega
yena

5f Cua frase ta pas cu otro?

- Busca cua frase ta pas cu otro.
- Skirbi e frasenan cu ta pas cu otro bou di otro den bo schrift.

- | | |
|---------------------------------------|---|
| 1. Anne Frank a bira famoso. | a. Ivan ta colga den palo. |
| 2. Anne a cose un strea riba su paña. | b. El a cana henter dia. |
| 3. E triyiso tin berguensa. | c. El a mishi cu zaag di papa. |
| 4. E turista ta cansa. | d. Tin awa abou riba suela. |
| 5. Mama ta tene su curason. | e. El a skirbi un diario. |
| 6. Wela a slip cay. | f. Nan a ter Sharon. |
| 7. Roy a corta su dede. | g. Den tempo di guera tur Hudiu mester a haci esey. |



5g Un of mas?

- Lesa e frasenan. Bisa si e palabranan cursivo ta singular of plural.
- Nota e palabranan singular y plural den dos kolom separa den bo schrift.
- Bo ta corda? *Singular:* un so → cas. *Plural:* mas cu un → casnan.

Papa

1. Awe papa no ta bay cerca su amigonan.
2. E mester traha un mesa pa pone e acuario nobo riba dje.
3. Ta Lisandro a tira bala y kibra glas di esun bieu.
4. Papa mester carga e latanan for di pickup pone den ket.
5. Despues e ta bolbe bay na e auto pa coy e hemchinan di verf.
6. Sinta plat abou, e ta corda cu e martiu ta na bisiña.
7. Anto unda Lisandro, e mucha baldadi, mes ta?
8. E ta core tras di un bala riba veld.



5h Yena e palabra corecto

Busca y skirbi e palabra cu falta den cada frase den bo schrift.


amabel – cachete – cicatriz – cura di scol – gekrul – morocho – namora – parce – pia di morocho – tipico



Eliana y Elisa

1. Eliana y Elisa ta ...
2. Nan ... otro masha hopi mes.
3. Tur dos tin cabey ... color cora.
4. Toch cada un tin algo ... cu bo ta ripara mesora.
5. Eliana tin un ... na su rudia. Esey Elisa no tin.
6. Elisa tin un scupi di Dios na su ... Esey Eliana no tin.
7. Elisa ta un tiki mas ... cu su ruman muhe.
8. Ta p'esey Vincent ta ... di Elisa.
9. Cu ne so e tin gana di sinta riba banki den ...
10. Pero ya, ta di lamenta cu un ... nunca no ta su so.





6 Skirbi bon

6e Scoge e palabra corecto

- Lesa e frasenan.
- Scoge cada bes entre *tenta of ter, tentamento of termento*.
- Skirbi e frasenan den bo schrift den e rij corecto. Wak e ehempel.



Tentamento/ termento no ta dura largo.
Tentamento/ termento ta dura largo.
Ora mi tenta/ ter un hende, e ta bira tristo.
Ora mi tenta/ ter un hende, e ta rabia, pero e por hari despues.
 Casi semper ta un grupo ta *tenta/ ter* un mucha.
 Casi semper ta un mucha so ta *tenta/ ter* un otro mucha.
 No ta dificil pa keda amigo cu mucha cu a *tenta/ ter* bo.
 Ta dificil pa keda amigo cu mucha cu a *tenta/ ter* bo.

Tenta	Ter
1. <i>Tentamento</i> no ta dura largo.	1. <i>Termento</i> ta dura largo.
2.	2.
3.	3.
4.	4.


6f Kico bo ta pensa?

- Kico ta parce bo dushi di ta un pia di un triyiso?
- Kico ta parce bo dificil di ta un pia di un triyiso?
- Skirbi bo contesta den bo schrift.



6g Traha y skirbi frase

- Lesa e palabranan den e campo di palabra di e nomber Anne Frank.
- Scoge 5 di e palabranan aki.
- Traha frase cu cada un di e palabranan cu bo a scoge.
- Skirbi e frasenan den bo schrift.



6h Traha un poster


- Tin mucha den bo klas cu nan ta ter? Esaki no ta algo bon!
- Bo tin e curashi pa stop e termento aki?
- Traha un poster y manda un mensahe positivo.



Psst ... abo ey,
bo sa bon bon cu

NO TA BON PA TER!
 Bo ta haci otro mucha tristo.
 Mostra curashi y bisa na bos halto:
 'Mi no ta ter niun mucha!'





Akim
Camara



Jacobo
Palm



Amadeus
Mozart



Steve
Jobs



An li Ho



Albert
Einstein



Akiane
Kamarik



Michael
Jackson

1 Scucha y papia

Combersacion

- Awe ta papia tocante mucha prodigio. Tin mucha cu na edad hoben ta haci algo super bon cu normalmente cierto hende grandi so por haci. Nos ta bisa cu un mucha asina tin un talento special, un don. Asina tin mucha cu ta canta of pinta super bon. Tin mucha cu por toca un instrumento perfectamente, otro cu ta bon den deporte. Tambe tin mucha cu ya ta studia na universidad. Esey ta un scol caminda hende grandi por studia pa bira por ehempel dokter of abogado.
- Ken a yega di tende di un mucha asina?
- Con bo ta kere cu un mucha asina ta sinti su mes?
- Bo por pensa otro cos cu un mucha prodigio por haci bon?
- Si bo tabata un mucha asina, kico abo lo kier a haci bon?
- Splica dicon.

Regla di combersacion

Si bo no ta compronde loke un persona bisa, bo ta pidie pa ripiti loke el a bisa.





2 Mi por lesa

Mozart y Jackson, mucha prodigio

Mozart

Hopi, hopi aña pasa tabatin un mucha homber chikito cu por a toca piano masha bon mes. Su nomber ta Wolfgang Mozart. Mozart a cuminsa toca piano for di dia cu e tabatin tres aña. Ora e tabatin cinco aña, Mozart mes tabata skirbi muziek caba. Mozart tabata un mucha prodigio. Esey ta un mucha cu na edad hopi jong por algo masha masha bon mes.

E tata di Mozart tabata kier pa su yiu bira famoso. P'esey Mozart mester a practica tur dia. Oranan largo e tabata sinta tras di piano.

Den e tempo ey, no tabatin ni radio ni television ainda. P'esey Mozart mester a biaha hopi pa tur hende por a tend'e toca. No tabatin ni aeroplano, ni auto y ni bus. E tabata biaha cu kitrin hala pa cabay. Den tur pais cu el a bay cu su famia, Mozart mester a toca pa e rey y reina. Tin biaha hunto cu su ruman muhe, cu tambe por a toca masha bunita mes.

No ta e reynan cu e reinanan so tabata gusta e muziek di Mozart, e mucha prodigio. No, hende di tur pais tabata encanta cu loke nan tabata scucha.

Nunca Mozart no a fada di sinta ora largo tras di piano. Asina hopi e tabata gusta muziek.

Dia Mozart a bira grandi, e tabata gana su pan di cada dia cu muziek. Tur caminda hendenan tabata pag'e pa e toca.

Ta pica cu Mozart a fayece na un edad hoben. E tabata malo y masha cansa. Te dia djawe nos ta toca muziek di Mozart y ainda su muziek ta zona mes bunita.

Jackson

Michael Jackson tambe tabata un mucha cu un don. El a nace na 1958 na Merca. For di chikito Michael tabata gusta muziek y baile. Mescos cu e tata di Mozart, e tata di Michael tambe tabata kier pa su yiu bira famoso. Prome Michael tabata canta den un grupo hunto cu su rumannan. Despues el a bay canta y balia su so. Michael a bira famoso cu su 'moonwalk'. Esey ta un manera special di balia. Ta parce manera e bailado ta cana bay dilanti, pero ta patras e ta bay. Ta di lamenta cu Michael tampoco no a bira mucho bieu.

Bo tambe kier balia 'moonwalk' manera Michael?
Haci lo siguiente.

Hisa hilchi di bo pia drechi.


Lastra bo pia robes bay patras.

Baha bo hilchi drechi y hisa bo hilchi robes.

Lastra bo pia drechi bay patras.

Baha bo pia robes.

Ripiti esaki.



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Cuanto aña Mozart tabatin tempo el a cuminsa toca piano?
2. Kico ta un mucha cu un don?
3. Kico e tata di Mozart tabata kier?
4. Dicon Mozart mester a biaha hopi?
5. Con nan tabata biaha? Dicon?
6. Ken tabata gusta Mozart su muziek?
7. Dicon Mozart no tabata fada di sinta ora largo tras di piano?
8. Cu kico Mozart tabata gana su pan di cada dia ora el a bira grandi?
9. Ki sorto di mucha Michael Jackson tabata?
10. Kico e tata di Michael tabata kier?
11. Kico Michael a haci despues cu e no tabata canta cu su rumannan mas?
12. Cu cua baile Michael a bira famoso?



4 Vocabulario

Akrit Jaswal

Den un pueblo chikito na India, un pais masha leu for di aki, tin un mucha homber cu yama Akrit Jaswal. Na edad di cinco aña, Akrit tabata lesa tur buki di dokter cu e por a haya. Ora e tabatin seis aña, e ciruhanonan tabata lag'e wak operacion den hospital. Un ciruhano ta un dokter cu ta haci operacion. Akrit a bira masha famoso ora, na edad di shete aña, e mes a opera un mucha. Aunke Akrit no a studia pa dokter, su mayornan ta splica, semper e tabatin interes den curpa di hende. Semper e kier a sa tur cos. Hendenan tabata biaha di hopi leu pa bini cerca dje. Na edad di 11 aña, Akrit a trata y cura hende cu malesa cu normalmente no tin cura p'e.

Tin biaha tabatin casi 300 pashent, esta hende malo, ta warda den rij pa bishita Akrit.

Diferente hende ta reconece cu Akrit ta un mucha prodigio, un genio. Esey ta un mucha cu por haci algo masha masha bon mes. Un mucha masha sabi.

Segun corant di e pais mayornan di Akrit a bende casi tur cos cu nan tabatin pa por a paga e biahenan pa nan yiu.

Tambe nan a traha un centro di salud na New Delhi pa yuda traha remedi nobo. New Delhi ta e capital, e ciudad di mas importante, di India.

Akrit tambe ta yuda na e laboratorio di e centro ey.

E tin e deseo di bira un experto riba tereno di trahamento di remedi. Un experto sa hopi.

Abo conoce un mucha mes sabi cu Akrit?



1

Akrit Jaswal ta un ... Esey ta un mucha cu por haci algo masha masha bon mes.

2

Akrit a bira famoso ora, na edad di shete aña, el a ... un mucha.

3

Un dokter cu ta haci operacion, nos ta yama un ...

4

Aunke Akrit no ta dokter ainda, hopi hende malo, esta ..., ta bay cerca dje.

5

E mayornan di Akrit a laga traha un ... na India. Den e laboratorio nan ta purba traha remedi nobo.

6

Akrit tin e deseo di bira un ... riba tereno di trahamento di remedi.

Tarea 1
Kico bo ta mira?
• Lesa e frase bou di cada plachi.
• Busca e palabra cu falta den e rij akibou.
• Skirbi e palabra den bo schrift.

Tarea 2
Bo sa e contesta?
• Ora bo ta famoso, tur hende conoce bo.
Bo por menciona algun hende cu ta famoso?
• Splica tambe dicon nan ta famoso.

- centro di salud
- ciruhano
- experto
- mucha prodigio
- opera
- pashent



5 Pensa bon

5i Yena palabra

Yena e palabra corecto. Bo por scoge for di mi – bo – e – nos – boso – nan

Akim Camara

1. Ayera ami cu mi ruman a wak un DVD. ... a wak e DVD na cas.
2. Tabata un DVD di un mucha prodigio di cinco año, Akim Camara. ... tabata toca fio masha bunita mes.
3. Na su pais e hendenan ta para den rij pa bay scucha Akim. ... ta gusta scucha e hoben.
4. Akim no tin mester di buki di muziek. ... ta toca tur piesa for di su cabes.
5. E maestra ta conta su klas di e DVD tocante Akim Camara. Despues e ta puntra e alumnonan: " ... tin gana di wak e DVD?"
6. Mi por trece e DVD scol. Si boso kier, ... por pasa e DVD mañan mes.



5j Cua ta e sustantivo?

- Palabra cu ta indica number di hende, bestia, mata of cos, nos ta yama *sustantivo*.
- Dilanti di un sustantivo bo por pone e of *un*.
- Skirbi e frasenan den bo schrift.
- Hala un strepi bou di tur sustantivo. Hacie manera e prome frase.

1. Den deporte tin mucha cu ta destaca.
2. Den baseball por ehempel tin hoben cu ta masha bon.
3. Nan por bati, picha y fango bala manera ningun otro.
4. Hopi biaha nan ta bati hasta home run.
5. Den nan ekipo nan ta un bon ehempel.
6. E coach ta duna nan extra atencion.
7. Despues nan por bira un gran pelotero.



5k Formula frase di pregunta

- Lesa e frasenan akibou.
- Traha frase di pregunta acerca.

Haci asina:

Akrit ta biba na India. Na unda Akrit ta biba?

1. Akrit Jaswal ta un mucha cu un don.
2. Akrit ta e persona di mas hoben cu a opera un pashent.
3. Tres ora largo e pashentnan a para warda Akrit.
4. Dia el a haci dos año, Akim Camara a haya un fio.
5. Den teatro el a presenta cu un orkesta grandi.
6. Si un deportista kier gana un medaya, e tin cu practica tur dia.

Kico ...
Ken ...
Con largo
Ki dia ...
Na unda ...
Con ...




5l Cua splicacion bo ta scoge?

- Scoge pa cada palabra e splicacion corecto.

- | | |
|-------------------|---|
| 1. mucha prodigio | a. Un mucha masha sabi cu tin talento special.
b. Un mucha cu ta sabi. |
| 2. famoso | a. Un persona cu tin hopi conoci.
b. Un persona cu ta masha conoci y admira. |
| 3. ciruhano | a. Un dokter cu ta opera curpa di un pashent.
b. Un dokter cu ta cura pashent cu remedi. |
| 4. experto | a. Un hende cu sa algo.
b. Un hende cu ta masha bon riba un cierto tereno. |
| 5. triyiso | a. Tres ruman cu parce otro.
b. Tres ruman cu a nace hunto. |
| 6. ter | a. Trata un hende na un manera falso y cruel te cu bo ta lag'e sinti su mes malo.
b. Haci chansa cu un hende djis pa haci un pret. |
| 7. capital | a. Un ciudad importante di un pais.
b. E ciudad mas importante di un pais. |





6 Skirbi bon

6i Indica palabra di secuencia den e cuenta

- Bo ta corda?

Un cuenta tin cu cana bon pa bo comprond'e. P'ese y den un cuenta tin un *secuencia*. Un *secuencia* kiermen: bo ta bisa kico ta sosode prome y kico ta sosode despues.

- Lesa e texto cortico akibou.
- Skirbi e palabranan cu ta duna e secuencia.

Curt

Cuater aña pasa Curt a salta e prome klas di scol basico. Despues di dos aña el a salta klas 4 tambe. Curt ta den klas 6 e aña aki.

Luna pasa henter klas a pasa un prueba skirbi. Juffrouw a duna resultado di e prueba ayera.


Awe juffrouw a bisa cu Curt a sali esun miho di klas. Vakantie ta cuminsa mañan.

Otro siman si tin scol atrobe.

Casi sigur otro aña Curt lo bay un scol pa mucha cu por siña hopi bon.

Ora e caba scol, e kier bay siña pa piloto.

Curt kier bula jumbo jet den futuro.



??????????



6j Charada

Un famia tin dos yiu homber.

E muchanan a nace hunto.

Nan tin e mesun mayornan.

Toch e muchanan no ta morocho.

Ra, ra, ra, ta kico nan ta por ta?

- Skirbi bo contesta y wak despues na pagina 43 si bo contesta ta bon.

6k Lesa y skirbi

- Lesa e frasenan akibou y skirbi e palabranan cu tin un color, nechi y sin eror den bo schrift.

Akiane Kramarik

1. No ta tur dia bo ta topa un **muchu** cu un **don** manera Akiane.

2. Akiane ta un **pintor hoben**.

3. E ta pinta **potret** for di dia cu e tin cuater aña.

4. Awor Akiane tin **diescinco** aña.

5. **Su cuadronan** ta colga den **galeria** rond mundo.


6. Den un galeria bo por mira y compra obra di arte manera cuadro of **escultura**.

7. Na cada pintura Akiane ta traha un **poema** tambe.

8. Tur su poemanan tin un **mensahe**.

6l Dictado





1 Scucha y papia

Combersacion

Un sorpresa pa Nadir

Klas di Nadir ta masha tristo.
Nan juffrouw a caba di duna nan e noticia cu Nadir tabata envolvi den un accidente di auto.
El a haya un sla duro na su lomba.
Awor e no por move mucho mas.
Nadir a fractura su lomba na un manera serio.
E tin cu keda drumi un tempo largo. Por lo pronto e no por bin scol.

Nadir tabata un ehempel pa e muchanan den su klas. E tabata contento tur dia y e tabata traha su huiswerk semper.

Nadir su amigonan Edo y Fara ta sinti Nadir su falta masha hopi. P'esey nan a pensa un plan.

Ta kico Edo y Fara ta bay haci?
Ta ki plan nan tin?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





2 Mi por lesa

- Tur cuenta tin un *titulo*. E titulo ta conta bo algo di e cuenta.
- E *plachi of ilustracion* na un cuenta tambe ta bisa bo algo.
- Lesa titulo di e siguiente cuenta y mira e plachinan.
- Bo sa caba kico e cuenta aki ta trata?

Un medaya pa Yuk

Ta keto. Tur hende den cas ta haci meyanochi caba. Ta Yuk so ta lanta ainda. E ta drumi den su macuto den cushina y e ta wak rond. Yuk no por pega soño pa caba.

Pero hepa, ta kico esey? Ta kico e ta tende ey? Ta ki zonido esey? Yuk su horeanan ta para. N' ta stem di un hende e ta tende? Pero tur hende den cas ta drumi! Lihe Yuk ta core sali for di su macuto. "Haci lihe", e ta tende. "Coy e vaas di plata y e cadena di oro cu tin riba mesa." Zonido di e stem ta bin for di sala. Agita Yuk ta cuminsa blaf. "Ladron, ladron den sala!", e ta blaf, mientras e ta core bay den sala. "Boso yama polis, mi ta bay nan tras."

Yuk ta compronde cu e tin cu actua lihe. Ora e dreña sala, e ta mira net con e ladronnan ta bula bentana. Yuk no ta perde pa gana. Mesora e ta bula nan tras. "Un cacho!", e ta tende un di e ladronnan bisa e otro. "Haci lihe, bula den auto." Yuk ta yega net laat. E ladronnan ta bula den auto y nan ta dera trot. "Boso no ta scapa!", Yuk ta blaf, mientras e ta bay nan tras.

E auto di e ladronnan ta pasa cu un speed dilanti di banco y supermercado. E ta raspa pasa banda di un agencia di seguro y warda di polis. Net na e momento ey tin un polis para pafo. E ta mira un auto pasa bela yen. Su tras tin un cacho cu ta core lenga afo.

Hepa, e ta pensa. Tin un cos straño ta pasando. E cacho lo no ta core tras di e auto pornada. E bestia ta muera morto cansa. Mi kier sa kico ta kico.

Cu luz cu ta cende paga y sirena duro duro e polis ta sali tras di e auto. Na e luz di trafico tin un fila y e auto di e ladronnan tin cu para. Mesora Yuk ta bula contra porta di e auto. Straña e ladronnan ta drey wak. Nan ta mira un cacho furioso cu djente grandi y skerpi. "Grrr, sali for di e auto", Yuk ta gruña. Cu su djentenan e ta ranca na man di e porta. "Bay fo'i djaki!", e ladronnan ta grita cu stem tembla. Pero Yuk no ta move for di ey nan. Net ora e luz ta cambia bira berde, Yuk ta haya yudansa. "Baha for di auto", e ta tende un stem pisa ta bisa diripiente. Ta e polis. E malhechornan ta spanta hera muri. Nan no por huy bay niun caminda mas ...

Un siman despues tin fiesta na warda di polis. Yuk ta haya un medaya, pasobra el a logra cu polis por a aresta dos ladron. Polis tabata busca nan pa basta tempo caba. Riba e medaya tin skirbi: Heroe Yuk. Bo mes por compronde cu Yuk ta masha contento. Y su doño? E ta masha orguyoso cu e tin e cacho di mas balente di mundo. No ta hende so por ta heroe. Bestia tambe!



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Tur hende den cas ta drumi. Kico Yuk ta haci?
2. Dicon Yuk su horeanan ta para?
3. Kico Yuk ta tende?
4. For di unda e zonido di stem di hende ta sali?
5. Kico Yuk ta haci ora e ripara cu tin ladron den cas?
6. Yuk ta keda para ora e mira e ladronnan bula bentana?
7. Kico Yuk ta haci ora e ladronnan core bay den auto?
8. Ta kico e polis ta pensa ora e mira e auto pasa bela yen cu un cacho su tras?
9. Dicon e auto di e ladronnan tin cu para?
10. Kico Yuk ta haci ora e auto para?
11. Di ken Yuk ta haya ayudo?
12. Kico ta sosode un siman despues na warda di polis?
13. Con Yuk ta sinti su mes?
14. Con su doño ta sinti su mes?



4 Vocabulario

Un cinta di merito

Tin tur sorto di heroe. Ora un heroe ta un hende grandi, casi semper e ta haya hopi atencion. Su portret ta sali den corant. Y bo por mir'e na television.

Pero tin heroe hoben tambe. Ta pica cu hopi biaha nan no ta haya mucho atencion aunke nan merece esey si. Tuma Seti por ehempel.

Dia su mama a cay flauw, Seti mes a yama ambulans. Danki na Seti, su mama a haya ayudo mesora y el a bira bon. Seti ta cla pa yuda tur caminda. Tur weekend bo ta haya Seti como boluntario den un centro pa mucha handicap. Curpa di un mucha handicap no ta funciona mes bon cu curpa di un mucha salud. Algun mucha ta sinta den rolstoel. Pero tambe tin mucha ciego of cu otro handicap. Den e centro Seti ta yuda cu casi tur cos. Tin biaha bo ta hay'e den cushina.

Otro biaha e ta yuda duna mucha chikito cuminda. Y ora e muchanan haya les di landa, Seti ta asisti e instructor di landamento.

Pero Seti ta haci mas. E ta un di e muchanan cu tur aña ta cana bende stampia. Esey ta pa haya fondo, esta placa, pa proyecto special pa mucha. Semper Seti ta un di esnan cu ta bende mas tanto stampia.

Bon mira Seti ta un heroe. E lidernan di e centro pa mucha kier mustra Seti cuanto nan stim'e. Tambe nan kier mustr'e con hopi nan ta aprecia loke e ta haci. P'esey nan ta pidi gobernador pa duna Seti un cinta di merito pa mucha.

Un cinta di merito ta un medaya, cruz of strea colga na un cinta bunita. Ora un hende haci cos bon, e por haya un di e cintanan ey.

Seti lo keda contento sigur.



1 Tin biaha un mucha cu ... ta biba den un centro special.



2 Un hende cu ta duna les di landa, ta un ...



3 Tin biaha Seti ta ... e instructor.



4 Un biaha pa aña Seti ta yuda bende ...



5 Seti kier haya ..., esta placa, pa proyecto pa mucha.



6 ... ta duna Seti un ...

Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

- Un boluntario ta yuda hende of animal sin haya pago pa su trabou. Abo tambe kier ta un boluntario? Kico abo lo kier haci como boluntario y na unda bo lo kier yuda?

• asisti

• cinta di merito

• fondo

• gobernador

• handicap

• instructor di landamento

• stampia



5 Pensa bon

5m Traha frase cortico

- Traha di un frase largo dos frase cortico.
Cada bes un palabra ta keda afo. Wak e ehempel prome.
Bestia di cas ta bay den un asiel di bestia, ora nan doño no kier nan mas.
Bestia di cas ta bay den un asiel di bestia. – Nan doño no kier nan mas.



Yuda den asiel di bestia

1. Tamika ta yuda den e asiel di bestia, pasobra e stima bestia masha.
2. Den e asiel tin masha hopi cacho, pero tambe tin tur sorto di pushi.
3. Tamika ta cuida e animalnan bon, pa nan ta fuerte y salud.
4. E gusta baña e cachonan y despues e ta hinca nan den nan hoki bek.
5. Awe Tamika ta tristo y alabes contento, pasobra su bestia preferi ta bay haya un doño nobo.
6. Varios aña Tamika ta yuda tur weekend, p'ese y merece un cinta di merito.

5n E contesta ta bon of fout?

- Lesa e frasenan y bisa si nan ta bon of fout.

1. E palabra *stampia* ta un sustantivo.
2. E palabra *yuda* ta un sustantivo.
3. Dilanti di un sustantivo bo por pone e of *un*.
4. E palabra *heroenan* ta skirbi den plural.
5. E palabra *boluntario* ta singular.
6. E palabra *laboratorio* ta skirbi den plural.
7. Pa indica secuencia nos ta uza palabra manera *promé, despues y finalmente*.
8. Memey di un frase nos ta pone un punto.
9. Tur nomber nos ta skirbi cu mayusculo.
10. Na final di tur frase tin un punto, un signo di pregunta of un signo di sclamacion.

- bon – fout
- bon – fout
- bon – fout
- bon – fout
- bon – fout
- bon – fout
- bon – fout
- bon – fout
- bon – fout
- bon – fout



5o Cu cua palabra bo ta caba e frase?

1. Setty ta un ...
2. Dia su mama a cay flauw, Setty a yama ...
3. Tur weekend e ta yuda den un centro pa ...
4. Ora e muchanan bay landa, Setty ta asisti e ...
5. Tur aña Setty ta bende ...
6. Esey e ta haci pa haya ...
7. Ta uza e placa pa ...
8. Bo tambe kier yuda como ...?
9. Pa tur su trabou Setty merece un ...
10. E ta hay'e di ...
11. Gobernador ta para na cabes di nos ...
12. Setty ta haya un bunita cinta cu un ...

- mucha cu limitacion
- heroe
- ambulans
- instructor di landamento
- proyecto
- boluntario
- stampia pa mucha
- fondo
- gobernador
- isla
- medaya
- cinta di merito



5p Cua palabra ta pas cu ne?

- Den e prome frase tin un palabra cursiva.
Cua palabra (sustantivo) ta pas cu ne?
Bo por yena e sustantivo den e di dos frase.
- Wak e ehempel prome.

1. Kira ta *canta*. E *cantica* ta hopi bunita.
2. Akim ta *toca* fio. E ta un bon ... di fio.
3. Michael ta *balia*. E ta un ... famoso.
4. Mami a *kima* su man na stoof. E ... ta haci dolor.
5. Papi a *soña* henter anochi. Tabata un dushi ...
6. Akiane a *pinta* un cabay. E ... ta colga na muraya.
7. Setty ta *yuda* haci hopi cos. Su ... ta bonbini.
8. E ciruhano a *opera* un hende. E ... a bay bon.





6 Skirbi bon

6m Proyecto pa mucha

- Tur aña e muchanan di scol ta bende carchi di Pasco y stampia special. Esey nan ta haci pa haya fondo, esta placa, pa proyecto special pa mucha.
- Kico abo kier pa e hendenan haci pa mucha? Skirbi esey den bo schrift y skirbi acerca dicon bo kier e proyecto ey.

6n Carchi di Pasco

- Diseña (pinta) un bunita set di carchi di Pasco cu nan por uza e aña aki.
- Skirbi acerca dicon bo a scoge pa e pintura ey.



6o Cinta di merito pa bon trabou

- Setty a haya un cinta di merito pa mucha, pasobra el a haci hopi cos bon.
- Bo tambe conoce un mucha cu ta un heroe?
- Bo ta haya cu e merece un cinta di merito?
- Pa logra esey, bo mester skirbi un cuenta cortico tocante kico el a haci.
- Skirbi e cuenta den bo schrift.

E preguntanan akibou por yuda bo.

- E mucha gusta yuda hende?
- Kico el a haci of ta haci?
- Dicon bo ta haya cu e ta un heroe?
- Dicon e merece un cinta di merito?



7 Tarea varia

7a Traha un frase largo

- Akibou tin cada bes dos frase.
- Pega e frasenan na otro.
- Haci uzo di e palabranan akibou.




aunke – mientras – pasobra – p'esey – sino – y

1. Tin mucha chikito cu por haci algo hopi bon cu otro no por.
Ta yama nan mucha prodigio.
2. Akrit ta un mucha prodigio asina.
Na edad di shete aña el a opera un hende.
3. Den e cas patras Anne tabata skirbi den su diario.
Su ruman Margot tabata lesa buki.
4. Den e campo di concentracion nan tabata zundra Anne.
E no tabata haya cuminda drechi tampoco.
5. Mozart no tabata keha.
E mester a toca piano hopi ora pa dia.
6. Akim no ta toca fluit.
E ta toca fio.

7b Kico tin para akibou?

- Skirbi e palabra den bo schrift.



-chi



-glo




n=r



-rad

Contesta di charada 6j

- Nan tin un ruman muhe mas cu tin e mesun edad.
Nan ta un triyiso.



1 Scucha y papia

Combersacion den kring

- Bo a scucha e cuenta *Con Nanzi a casa cu un prinses* cu bo maestra/o a lesa pa bo.
- Awe bo ta bay papia den kring tocante e cuenta aki.
- Cuenta di Nanzi ta masha bieu.
Cuenta di Nanzi ta cuenta folklorico.
- Shon Arey tabata kier pa su yiu muhe casa cu un hende homber cu hopi curashi.
Cua test Shon Arey tabata kier pa e hende homber pasa?
- Bo por conta con e test tabata?
- Kico bo a haya di e idea ey di Shon Arey?
- Kico Nanzi a pensa ora el a tende di e test?
- Nanzi a bay palacio cu un plan pa e logra casa cu e prinses. Splica con e plan tabata.
- Con bo ta haya e plan di Nanzi?
- Nanzi a logra casa cu e prinses. Kico el a haya regalo?
- Kico bo a siña di e cuenta?

Regla di combersacion

Nos ta wak otro den cara ora nos ta conta otro algo.



2 Mi por lesa

E sombre

Mo Nando tin un sombre bieu. E sombre ta asina gasta cu ni waya e no por waya mas cu ne. “Ay, e sombre aki mi por bien tir’e afo. Toch e no ta sirbi mas”, Mo Nando ta bisa riba un bon dia, ora e lanta for di soño. Dicho echo! Manera e tende truck di sushi pasa, Mo Nando ta zwaai su sombre bent’e aden.

Pero ta lanta un biento fuerte y e sombre di Mo Nando ta bula for di e truck bay laira y cay riba caya. Net na e momento ey, bisña Maria ta pasa. “Hey”, Maria ta bisa asombra, “esey ta e sombre di Mo Nando.” Mesora e ta coy e sombre y ta bay cas di Mo Nando. “Bisña”, e ta grita fo’i djaleu, “mi a haya bo sombre riba caya. Casi sigur bo a perde na caminda.” “Masha danki, Maria”, Mo Nando ta bisa mientras e ta tuma su sombre. “Mi ta contento cu bo a hay’e.”

E mesun atardi Mo Nando ta bay Playa. Ey e ta cumpra un sombre nobo. Na caminda e ta pasa banda di waf. Ora e mira e lama blauw, e ta zwaai su sombre bieu bent’e den awa.

Pocopoco e sombre ta drif bay na un boca djis eybanda. Pa casualidad Ricky, sobrino di Mo Nando, ta na lama. “Hey”, Ricky ta grita, “ata e sombre di Mo Nando!”


Ricky no ta perde pa gana. E ta landa bay na e sombre y sac’e for di awa. Esaki lo bira un sorpresa pa Mo Nando, e ta pensa. Sigur lo e ta contento ora e haya su sombre bek.

Mo Nando ta gradici Ricky masha ora e pasa anochi. Ma Ricky no a caba di sali for di porta di cura, cu Mo Nando ta benta e sombre den un huki di camber. “Ta dicon e sombre plega aki ta keda bin bek?”, e ta bisa un tiki desespera.

Su siguiente dia Mo Nando ta bay tienda. Na caminda e ta mira un pidido di limosna ta pidi placa. “At’aki mi shon”, Mo Nando ta bisa. “Placa mi no tin pa bo. Pero bo por haya e sombre aki. E ta tur gasta si, pero podise e por proteha bo un tiki contra solo.”

Contento e pidido di limosna ta bisti e sombre. Pero e no ta gosa mucho di dje. Pasobra asina e hendenan di bario a mir’e ta cana, nan ta cuminsa grita: “Ladron, ladron, bo a horta Mo Nando su sombre.” Nan ta ranca e sombre for di cabes di e pober homber y core bay cerca Mo Nando cu ne.

“Bo n’ ta haya! E sombre aki mester ta magico”, Mo Nando ta suspira ora e hendenan bay. “Ta masha straño cu e ta keda bin bek cerca mi.” Y na e mesun momento Mo Nando ta bisti su sombre bieu y ta tira esun nobo afo. Pero pa straño cu por zona esun nobo si nunca niun hende no a trece bek pè.



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Con e titulo di e cuenta aki ta?
2. Dicon Mo Nando kier tira su sombre bieu afo?
3. Na unda e ta benta su sombre?
4. Kico ta pasa ora lanta un biento fuerte?
5. Kico bisña Maria ta haci ora e mira e sombre?
6. Mo Nando ta yama Maria danki. Bo ta kere cu e ta contento di berdad? Splica dicon si of dicon no.
7. Dicon Mo Nando ta bay Playa atardi?
8. Kico e ta haci cu su sombre ora e ta na Playa?
9. Unda Ricky ta ora e haya e sombre?
10. Kico Ricky ta haci cu e sombre?
11. Kico Mo Nando ta haci cu e sombre ora Ricky sali for di porta di cura?
12. Ken Mo Nando ta duna e sombre?
13. Kico e ta bisa e homber?
14. Dicon e pober homber no ta gosa di e sombre?
15. Kico Mo Nando ta bisa y haci ora e sombre bolbe bini bek cerca dje?
16. Kico bo ta pensa si bo tin un sombre cu cada biaha ta bin bek cerca bo?
17. Kico Mo Nando por a haci pa e sombre no bin bek?



4 Vocabulario

Piscasito y e cacho

Hopi tempo pasa tabatin un pisca chikito cu yama Piscasito. E tabatin gana di disfruta di un poco solo. P'esey el a bula sali for di lama y bay drumi dushi asina riba un baranca.

Ora Piscasito tabata drumi ta tuma solo, un cacho grandi a cana pasa.

"Holo!", e bestia a grita. "Un pisca cu ta drumi tuma solo. Lo mi por gara e pisca facilmente. Mi tin gana di un cuminda dushi asina." Pero net na e momento ey, e pisca chikito a habri wowo.

El a spanta hera muri ora no masha leu di dje el a mira un cacho peligroso para keto ta wak e.

Un rato asina el a perde rosea, pero den un frega di wowo el a bula bek den lama.

"Ha ha ha cacho", el a chercha yen di briyo. "Bo kier a gara mi, no? Pero mi ta mucho mas rapido cu bo. Dicon bo no ta bula mi tras? Of bo no ta tribi drenta awa?"


E cacho tabata masha rabia. E tabata furioso, pero en berdad e no a tribi bula den lama.

"Warda bo ta mira, pisca fastioso!", el a grita, "mi ta haya bo si!"

E pisca chikito tabata asina ocupa cu e cacho, cu e no a ripara cu na e momento ey un pisca grandi y sumamente peligroso tabata acerca poco poco.

Prome cu e pisca chikito por a ripara kico ta pasando, e pisca grandi a gulie den un hap. Mientras Piscasito a disparce den barica di e pisca grandi, el a tende e cacho ta grita: "Un pisca cu un boca mas grandi cu esun di mi a come bo.

Ayo, Piscasito! Esun cu hari ultimo, ta hari miho."



Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.



Piscasito kier a ... di un poco solo.



P'esey el a subi riba baranca pa e ...




El a ... , ora el a mira un cacho peligroso.



... el a bula bek den lama.



Djaleu y yen di briyo el a hari y ... e cacho.




E cacho peligroso a para wak Piscasito furioso, pero e no a ... bula den lama.

Tarea 2

- Na final di e cuenta e cacho ta bisa: "Esun cu hari ultimo ta hari miho."
- Kico e cacho kiermen?

Tarea 3

- Abo a yega di spanta hera muri?
- Skirbi den bo schrift na ki momento esey tabata.



5 Pensa bon

5a Bo tabata sa?

Cuenta di fantasia

Cuenta di mago cu ta tover, pampuna cu ta cambia den kitrin, haraña cu ta casa cu un prinses y pisca cu ta tuma solo. Tur ta fantasia? Exactamente! Tin biaha nos tin cu yora ora un cuenta ta bunita of tristo, of morde huña si tin tension. Sinembargo, e figuranan den un cuenta asina no ta existi. Aunke nan parece real, nan no ta biba manera abo of ami. Nan a sali for di fantasia di hende.

Tin cuenta di fantasia cu ta *cuenta folklorico*.

Cuenta folklorico ta cuenta *sin autor conoci*. Nan ta cuenta *anonimo* y nan ta masha bieu. Un tata a yega di conta su yiu. E yiu ey a bolbe conta su mes yiu y nieto y asina a sigui. Nan ta cuenta cu a pasa oralmente (papia) di generacion pa generacion. Tur hende ta cambia e cuenta un tiki. Finalmente niun hende no sa ta ken a conta e cuenta prome.

5b Cua palabra no ta cuadra?

1. Cuenta di hada: hada – buki – dieta – kabouter
2. Mucha prodigio: hoben – furioso – sabi – talento
3. Cuenta folklorico: fantasia – instructor – Nanzi – Shon Arey
4. Heroe: chercha – curashi – peliger – yuda



5c Cua palabra bo ta scoge?

- Scoge y yena e palabra corecto.

1. Shon Arey tabatin un yiu muhe mas ... cu solo.
2. P'esey e no tabata kier pa e casa cu ... mucha homber.
3. E mester tabata un mucha homber cu ...
4. E mester a pasa un ... masha dificil.
5. E tabatin cu come un macutu yen di ... sin bisa 'hsp'.
6. Nanzi a haci ... el a nace ta bisa 'hsp' ora e ta papia.
7. Nanzi ta logra su plan y e ta casa cu e ...

promete
comosifuera
cualkier
prinses
bunita
curashi
prueba

5d Artículo



- Bo ta corda?
- Palabra cu ta indica number di hende, bestia, mata of cos nos ta yama *sustantivo*.
- Dilanti di un sustantivo bo por pone *un of e*. E palabranan *un y e* nos ta yama *articulo*.

e jaagdo of *un* jaagdo; e prikichi of *un* prikichi
e bringamosa of *un* bringamosa; e tas di lomba of *un* tas di lomba

- Lesa e siguiente cuenta cortico.
- Busca y bisa cua ta e sustantivonan den e cuenta.
- Despues bo tin cu busca articulo den cada frase di e cuenta.

Un cahita di prenda

1. Marina tin un cahita masha precioso.
2. Asina bo habri e caha, ta zona un wals bunita.
3. Un bailarin ta sali y e ta balia riba tono di e musica.
4. Den e cahita Marina ta warda tur su prendanan.
5. Den e lachi mas ariba tin un cadena bunita y un armband.
6. E holoshi di man cu wela a regal'e tambe ta eyden.
7. Marina ta warda un renchi di horea cu piedra blauw den lachi number dos.
8. Tambe tin un espacio special pa renchi di dede.
9. Marina gusta e cahita di prenda.




5e Cua palabra ta pas cu ne?

- Lesa e splicacion y busca e palabra(nan) cu ta pas cu ne.

chercha – disfruta – furioso – rapido – tribi – tuma solo

- | | |
|-------------------------|---------------------------|
| 1. Masha rabia | 4. Risca algo |
| 2. Drumu den solo | 5. Gosa di algo |
| 3. Den un frega di wowo | 6. Haci bofon di un hende |





6 Skirbi bon

6a Drecha palabra

- E letternan di e palabranan a bruha un tiki.
 - Drecha e palabranan y skirbi nan sin eror den bo schrift.
- Ehempel: *ranbaca – baranca*

- | | | | |
|-------------|--------------|--------------|--------------|
| 1. zinan | 4. lafabu | 7. coymoro | 10. tashibi |
| 2. damincu | 5. capissito | 8. soligrope | 11. bitri |
| 3. saprinca | 6. cushira | 9. nalimos | 12. raltucul |



6b Ordena potret

- Un cuenta tin cu cana bon pa bo comprend'e.
- P'esey den un cuenta tin un *secuencia*.
- Un secuencia kiermen: bo ta bisa kico ta sosode prome y loke ta sosode despues.

- Den un album di potret tambe bo mester plak potret den e secuencia corecto.
- Amika ta bay traha un album di potret. Yuda Amika ordena su potretnan. Cua potret ta bin prome y cua ta sigui?

- Potret di Amika na beach cu grupo 6.
- Amika ta un kleuter. E ta bay scol pa prome biaha.
- Amika ta gatia. E tin nuebe luna.
- Amika ta siña lesa.
- Hoera! Amika ta supla tres bela riba un bolo.
- Amika tin dos aña y e ta bay Corsou pa prome biaha.
- Fiesta di despedida di grupo 5.
- Amika a caba di nace.
- Potret di Amika dia el a cumpli un aña.
- Amika tin un bunita raport. E ta bay grupo 7.



6c Skirbi palabra cu -cion, -sion, -ccion of -xion

- Scoge cua combinacion di letter ta yena patras pa forma un palabra. Skirbi e palabranan den bo schrift.
- Despues bo ta scoge 5 palabra y traha un frase cu cada palabra.

- | | |
|-----------------|----------------|
| 1. prote... | 11. refle.... |
| 2. cone... | 12. cole..... |
| 3. aten... | 13. bendi.... |
| 4. constru..... | 14. ten.... |
| 5. crucifi.... | 15. suspen.... |
| 6. confe.... | 16. condi.... |
| 7. deci.... | 17. ero.... |
| 8. destru..... | 18. core... |
| 9. forma.... | 19. admi.... |
| 10. kiboca.... | 20. atra..... |



6d Describi e plachi

- Wak e siguiente plachi bon. Ta un plachi di un mucha.
- Describi e mucha. Esta, bisa con e mucha ta.
 - Ta un mucha homber of un mucha muhe?
 - Con su cara ta?
 - E mucha tin cabey largo of cabey cortico?
 - Ki color di cabey e tin?
 - Ki sorto di paña e tin bisti?
 - Kico e mucha ta haci?
- Despues bo ta describi e mucha den algun frase den bo schrift.





1 Scucha y papia

Combersacion

Reno, Rosita y Mora e heks di awa

Reno y su ruman muhe Rosita ta hunga riba un baranca cant'i un lago grandi y hundo.

Nan ta core hunga wega di man, ora diripiente nan ta slip cay den awa.

"Auxilio! Yuda nos!", Reno y Rosita ta grita spanta.

Pero ningun hende no ta tende e pover muchanan.

Den fondo di e lago, Mora un heks di awa, ta warda nan.

E ta coy e muchanan tene. "Ha, ha, ha!", e ta bisa cu un sonrisa falso riba su cara, "awor boso ta keda cerca mi pa semper."

Ta kico ta bay pasa cu e muchanan?

Nan mester keda cerca Mora pa resto di nan bida?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





2 Mi por lesa

- Lesa e titulo di e siguiente cuenta y wak e plachi.
- Bo sa caba tocante kico e cuenta ta bay?

E sopi di piedra

Cansa Juancho ta cay sinta riba un banki den parke. Henter dia el a cana rond. Juancho tin un hamber feroz. Su barica ta gruña. “Mare mi por a haya un bon plato crioyo pa come”, e ta suspira. Pero placa pa compra cuminda Juancho no tin. Juancho ta sinta basta rato caba ta kibra su cabes. Con e por yega na sikiera un dushi sopi? Diripiente su cara ta claría. “Mi tin un idea!”, e ta grita contento.

Mesora Juancho ta bula lanta. Den e parke e ta busca un bunita piedra grandura di un appel. Despues e ta cana bay na un casita djis banda di e parke. Ey e ta bati na porta.

Ora un pachi bieu habri p’e, Juancho ta bisa: “Bon dia, Pachi. Pachi por tin un hemchi cu awa pa mi?” “Un hemchi cu awa?”, Pachi ta puntra asombra. “Ta kico bo kier haci cu esey?” “Wel”, Juancho ta splica, “mi kier laba e piedra aki. E piedra mester ta limpi limpi.”

“Bo ta haci masha molester pa un simpel piedra”, Pachi ta bisa. “Claro”, Juancho ta responde. “Pachi mester sa cu esaki no ta un piedra comun. Ta un piedra magico. Un piedra di sopi.”

Straña Pachi ta keda wak Juancho. “Kico bo kiermen?”, e ta puntra. “Bo kiermen cu bo por traha sopi cu e piedra?” “Sigur no”, Juancho ta responde. “Un sopi delicioso. E sopi mas dushi na mundo.”

Pachi ta keda boca habri. “Tur hende por traha sopi cu e piedra ey?”, e ta puntra. “Si, si”, Juancho ta contesta, “Con tal cu bo sa con bo tin cu hacie.” “Bo kier conta mi con bo ta prepara e sopi ey?”, Pachi ta bolbe puntra. “Cu gran placer”, Juancho ta bisa cu un sonrisa grandi. “Laga nos cuminsa cu laba e piedra.”

Mesora Pachi ta cana bay den su cushina. E ta coy un hemchi y ta yen’e cu awa cu habon.

Juancho ta hinca e piedra aden y ta lab’e te ora e ta limpi limpi. Pachi ta para acerca y ta wak cu asombro kico Juancho ta haci.

“Bon”, Juancho ta bisa ora e piedra ta briya manera un diamanta, “mi ta cla. Awor nos por cuminsa cushina. Pachi tin un wea grandi pa mi?” “Sigur no, mi shon”, Pachi ta contesta.

Juancho ta yena e wea cu awa. E ta pon’e riba candela. Poco poco e ta pone e piedra aden.

E cuenta ta continua.



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e cuenta aki?
2. Dicon Juancho ta asina cansa?
3. Juancho no ta cansa so. Kico mas falta Juancho?
4. Ki sorto di piedra Juancho ta busca den e parke?
5. Unda Juancho ta cana bay cu e piedra?
6. Kico Juancho ta pidi Pachi?
7. Con Pachi ta haya Juancho su idea pa laba e piedra?
8. Kico Juancho ta splica Pachi?
9. Dicon Pachi ta keda boca habri?
10. Juancho kier conta Pachi con e ta bay traha e sopi?
11. Kico Juancho ta haci cu e awa cu habon?
12. Ki ora Juancho ta cla pa cuminsa cushina?



4 Vocabulario

Kanchil, Macaco y e bacobanan

Kanchil, un bina miniatura, y Macaco ta bon amigo. Tur caminda bo por mira nan hunto. Hasta ora nan ta haci cos cu no ta permiti, manera piki fruta den hofi di Shon Toni. E dos animalnan ta inseparabel.

Riba un bon dia ora Kanchil y Macaco ta den e hofi atrobe, algo teribel ta pasa. Shon Toni ta laga su cacho los.

Macaco ta bula den palo mesora. Pero pober Kanchil mester core pa su bida. Ora e kier bula pasa riba e waya di sumpiña cu tin rond di e hofi, su pia ta pega den e waya. Net na e momento cu e cacho ta bay dal e un mordi Kanchil ta logra los su pia.

For di e dia ey Macaco y Kanchil no ta risca bay e hofi mas. E dos amigonan ta dicidi di planta nan mes mata di bacoba.

Dia e prome cacho di bacoba a aparece na e mata, e dos amigonan a bula na laira di contento.

Asina e bacobanan ta hecho, Macaco ta subi e palo cu un macutu grandi. Kanchil ta para trunkil abou ta warda Macaco yena e macutu.

Pero Macaco ta lubida riba Kanchil. Den palo e ta sinta come un bacoba tras di otro. E cascanan e ta tira den e macuto.

Ora Kanchil ripara kico Macaco ta haci, esaki a core limpi bay caba.

Un luna despues sobra di e bacobanan tambe a hecha. Atrobe Macaco ta subi den palo. Atrobe e ta cuminsa come un bacoba tras di otro.

Ora Kanchil mira kico ta pasando, e ta grita furioso: "Macaco falso, haragan golos!" Macaco tambe ta rabia awor y ta cuminsa yobe Kanchil cu bacoba.

Hepa, esaki ta un bon manera pa mi haya e bacobanan, Kanchil ta pensa. P'esey e ta sigui grita te ora Macaco benta e delaster bacoba abou. Despues Kanchil ta piki tur bacoba y cana bay trunkil. Macaco ta keda atras nanishi largo.



Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

Bo sa e contesta?

- Macaco ta keda atras nanishi largo ora Kanchil cana bay cu tur e bacobanan. Purba splica kico kiermen *keda atras nanishi largo*.
- Describi e personahenan principal den e cuenta aki y nan caracteristicanan.



5 Pensa bon

5f Cua palabra ta nifica casi mescos?

- Busca e palabra cu ta nifica casi mescos cu palabra cursiva den frase.
- Bo por scoge for di:

benta – entrega – forsa – gruña – herida –
invita – susha – uza – wanta

1. Nanzi a *combida* hopi hende na su fiesta di casamento.
2. Na fiesta refresco a basha y *mancha* su bachi.
3. E barica bashi di e pidido di limosna ta *ronca*.
4. El a *gasta* tur su placa.
5. Nando a *tira* su sombre den huki di camber.
6. Nando ta dicidi di *duna* e pidido di limosna su sombre.
7. Kanchil a *haci* su pia *daño* ora el a bula pasa riba e waya.
8. Kanchil no por *soporta* mas cu Macaco ta come tur bacoba.
9. Mora, e heks di awa, ta *obliga* e muchanan traha p'e.

5g Caba frase

- Caba e siguiente frasenan.

1. Kanchil mester core pa su bida, pasobra ...
2. Macaco ta subi den e palo di bacoba, mientras cu ...
3. Kanchil ta ripara kico Macaco ta haci, p'ese y ...
4. Mo Nando ta purba tira su sombre afo, pero ...
5. E pidido di limosna ta bisti e sombre di Mo Nando, aunke ...
6. Mo Nando ta bisa: "E sombre bieu mester ta magico, pasobra ..."
7. Reno y Rosita ta hunga dushi cu otro, ora cu ...
8. Mora, e heks di awa, ta bisa: "Boso ta haya cuminda, basta cu ..."
9. E dos rumannan ta logra huy for di e cueba, asina cu ...
10. Mora, e heks di awa, ta purba subi e sero di spiel, ma ...
11. Juancho tin un hamber feroz, pasobra ...
12. E ta hinca e piedra den un hemchi y ...



5h Articulo y sustantivo

- Cua palabra ta un articulo y cua palabra ta un sustantivo?
- Skirbi tur frase den bo schrift.
- Hala un strepi oraño bou di cada articulo.
- Hala un strepi blauw bou di cada sustantivo.

E tres flohonan

1. Den un pueblecito tabata biba tres homber floho: Simon, Sony y Gustavo.
2. E rey di e pais tambe kier a conoce e tres flohonan.
3. Riba un dia el a bay busca nan cu algun solda.
4. E cabayeronan tabata drumi den un hamaca den un hofi.
5. "Cua di boso ta gusta sinta pornada mas tanto?", e rey a puntra.
6. "E ganado ta haya un saco yen di placa."
7. Mesora e contesta di Simon tabata: "Ami ta esun."
8. "No", Sony di, "abo no. T'ami ta e homber cu Shon Rey mester."
9. Gustavo so no a habri su boca.
10. E soldanan a kere cu e floho aki no a scucha e pregunta bon.
11. Pero e rey si tabata sa ken ta e ganado.




5i Yena e palabra corecto

- Busca y skirbi e palabra cu falta den cada frase den bo schrift.

cacho di bacoba – magico – haragan golos – hecha – inseparabel –
man di bacoba – peculiar – risca – waya di sumpiña

1. Dos amigo cu semper ta hunto ta ...
2. Na e palo di bacoba tin ...
3. Na cada ... tin mas o menos shete bacoba.
4. Bo no por piki e bacobanan mesora; nan tin cu ... prome.
5. E cacho ta peligroso, p'ese y Kanchil y Macaco no ta ... bay na e hofi mas.
6. Ora Kanchil kier a bula pasa riba e ..., su pia a keda pega.
7. Kanchil a yama Macaco pa ..., pasobra el a come tur bacoba.
8. Ta masha ... cu e sombre di Mo Nando ta keda bini bek cerca dje.
9. E sombre di Mo Nando mester ta ...





6 Skirbi bon

6e Caba e cuenta

- Akibou bo ta lesa un cuenta. E prome cuater frasenan ta bon, pero e otro frasenan a bruha un tiki.
- Drecha e cuenta y skirbie den e secuencia corecto den bo schrift.

Chikita

Un dia tabatin un pareha cu tabata kier un yiu.
Nan a bay cerca un hada.
E hada a duna nan un simia.
Nan a plant'e den un pochi di mata.

Den e cayena precioso tabatin un baby chikiritico.
Despues di algun dia un mata di cayena a sali.
E mata tabatin un conopi di flor.
E tabata mes grandi cu bo pinki.
Mainta trempan e conopi di flor a habri.
P'ese y pareha a yama nan yiu Chikita.

6f Kico bo ta pensa?

- Bo a yega di scucha of lesa un cuenta di fantasia?
- Cua ta bo cuenta di fantasia favorito?
- Skirbi e cuenta aki den algun frase.
- Skirbi dicon e ta bo cuenta preferi.
Hacie asina.
- Mi cuenta di fantasia favorito ta ...
- E cuenta ta bay tocante di ...
- E ta mi cuenta favorito, pasobra ...
- Bo por splica e uzo di e letter k den e siguiente palabranan?
chikito – pinki



6g Pone palabra den secuencia di alfabet

- Den e cuenta akibou tin diferente palabra cursiva.
- Skirbi e palabranan den e secuencia corecto segun alfabet.

a-b-c-d-e-f-g-h-i-j-k-l-m-n-ñ-o-p-q-r-s-t-u-v-w-x-y-z

Sorto di cuenta

1. Mi ruman grandi Ivo sa fia buki na biblioteca.
2. E ta lesa storia largo tocante pirata.
3. Un buki di charada of vampiro tambe e ta aprecia.
4. Ami gusta lesa di Nanzi, Kanchil of di e gigante cu brasa fuerte.
5. Dia mi tabata chikito mi tabata keda drumi cerca mi wela Elsa.
6. Sinta den su stoel di zoya e tabata lesa cuenta di hada pa mi.
7. Su bos tabata yen di cariño.
8. Anto ora un cuenta caba, como ñapa e tabata canta un cantica.
9. Mi tabata bay pais di soño dushi umbes.

6h Tres silaba

- Lesa e cuenta akiriba un biaha mas.
- Cua di e palabranan tin tres silaba?
- Skirbi e palabranan ey den bo schrift.

6i Describi e plachi

- Wak e plachi akibanda bon. Ta plachi di un animal.
- Describi e animal den algun frase den bo schrift.
- Ki sorto di animal e ta?
- Ki sorto di paña e tin bisti?
- Unda bo ta kere e animal ta?
- Kico e ta haci?
- Bo ta haya cu nan mester bisti animal paña ora nan tin cu actua?
- Skirbi dicon si of dicon no.





1 Scucha y papia

E wea malcontento

Den cushina di Mama Elena tabatin hopi wea, panchi cu paila. Y den nan tabatin un wea di funchi. Den dje Mama Elena tabata hala funchi tur dia pa su casa y su yiunan.

Anto ora caba, e ta basha awa den e wea di funchi, laga e awa para un rato. Di mes tur colocolo ta kita. Cu un spons y un tiki habon, Mama Elena ta laba e wea di funchi, sec'e y ward'e atrobe riba reki.

Riba un dia, net ora Mama Elena ta drenta cushina, e ta tende un zundramento.

Mesora el a bira cara pa e reki. Luga ta e wea di funchi tabata kik: "Tur dia funchi, funchi, funchi. No por cushina un otro cos den mi?"

Un bon stoba of un bon sopi di pisca? M'a fada di funchi tur dia. Dicon mi tin tanto mala suerte asina?"

Mama Elena a para scucha y a contesta: "Ta bon, mi shon! Mañan mes mi ta cushina un bon stoba di papaya den bo."

Su manece, Mama Elena a cushina stoba di papaya den e wea di funchi. E wea a gosa un mundo. Pero ora tur hende a caba di come, a yega e momento pa laba e wea. Un tiki dje cuminda a kima djis un poco y pega den bom di e wea. Mama Elena mester a rasp'e prome cu cuchiu.

"Ay, ay, mi curpa!", e wea di funchi tabata yora segun e cuchiu ta raspa su cuero. Mama Elena a sigui limpia e wea cu pida waya di hero pa kita e cuminda cu a pega. "Est'un dolor", e wea tabata keha. "Ta basta, Mama Elena. No frega duro asina. Mi ta sinti dolor."

E anochi ey e wea di funchi a pega soño riba e reki cu awa na wowo. Henter su curpa tabata haci dolor. E dia siguiente, asina Mama Elena a drenta cushina, e wea di funchi di: "Mama Elena, cushina funchi mes den mi. Mi no kier mira stoba cu wowo mas."

Y asina a bin sosode cu tur dia mama Elena a sigui hala funchi den e wea. Anto ora e funchi ta tota, e wea ta canta contento di dje.



Combersacion

- Bo a scucha e cuenta E wea malcontento cu maestra/o a lesa pa bo. E cuenta ta di un autor masha conoci di Corsou. Su nomber ta Pierre Lauffer. El a skirbi hopi buki di cuenta y poesia na Papiamento.
- Awe bo ta bay papia den kring tocante e cuenta aki.
- Pakico e wea tabata zundra?
- Dicon e wea ta malcontento?
- Kico Mama Elena a bisa ora el a tende e wea ta kik?
- Kico Mama Elena a cushina den e wea su manece?
- E wea tabata contento cu e cambio? Dicon si of dicon no?
- Kico a pasa despues cu e wea?
- E tabata malcontento ainda?
- Abo a yega di hala funchi? Conta con esey a bay.
- Abo conoce un hende cu tambe ta of tabata malcontento? Dicon e ta of tabata malcontento?
- Kico bo por siña di e cuenta aki?

Regla di combersacion

Ora un hende conta nos un cuenta, nos ta scucha cu atencion te na final.



2 Mi por lesa

Continuacion di e cuenta

E sopi di piedra (2)

Pachi ta pone bon atencion. E kier sa precies con ta traha sopi cu un piedra. Juancho ta trahando e sopi pa Pachi siña.

“Mi mester di salo cu peper y bloki di buyon”, Juancho ta murmura despues di un rato. Mesora Pachi ta habri cashi di cushina y saca e cah'i salo, e boter chikito cu peper y e cahita cu bloki di buyon. Juancho ta agrega tur ingrediente un pa un.

E awa ta cuminsa herbe. “Hm”, Juancho ta bisa, cu un plooi grandi riba su frenta, “nos mester di selder tambe.” Lihe Pachi ta saca un taki di selder for di frishider.

Juancho ta drey den e wea, mientras Pachi ta para fascina ta wak. Casi bo no ta mira e piedra mas den bom di e wea.

“Hepa”, Juancho ta bisa despues di un rato. “Riba mesa mi ta mira un tayo cu un bon pida di galiña. Casi sigur Pachi kier a duna e cacho algo di come, no?” Pachi no tin niun intencion di duna e cacho su pida galiña. Pero e no ta bisa nada. Miedo cu e tin cu e sopi di piedra no ta sali bon. E ta pensa cu e tin cu haci precies loke Juancho bisa. Sin protesta e ta duna Juancho e tayo. E galiña tambe ta bay den wea.

E sopi ta cushina y un holo dushi ta plama den cushina. Juancho ta coy un cuchara y purba e sopi. “Hm”, e ta bisa, “e sopi ta smaak bon, pero falta batata, siboyo y tomati si.” Pachi no ta pensa dos biaha. Mesora e ta duna Juancho loke e ta pidi. Juancho ta casca e batatanan y e siboyo. Despues e ta corta tur cos y tira e ingredientenan aki tambe den e wea.

“Bon”, Juancho ta bisa despues di mey ora. “Mi ta cla. Unico cos cu nos tin cu haci ainda, ta come e sopi.”

Esey e no tin mester di bisa dos bes. Bon hambra Pachi ta cay sinta na mesa. Nan dos ta come y come di e sopi di piedra te ora no tin niun lek mas den e wea.

“E sopi aki si a baha bon”, Pachi ta bisa.

“Nunca mi no a yega di come un sopi dushi asina. Bo no por bende mi e piedra di sopi?” “No, Pachi, mi no ta bende”, Juancho ta contesta. “Pachi ta haye di regalo cerca mi. Bo por cushina sigur mil biaha sopi cune ainda, basta Pachi hacie na mi manera.”

Y asina mes ta sosode. Henter su bida largo Pachi ta keda cushina e delicioso sopi di piedra segun e receta di Juancho. Y semper bay e sopi ta keda baha mes bon!




3 Bo a compronde?

- Lesa e cuenta prome.
- Despues contesta e preguntanan.

Pregunta

1. Dicon Pachi ta paga bon atencion?
2. Kico Pachi ta saca for di cashi di cushina?
3. Kico Juancho ta bisa ora e awa ta cuminsa herbe?
4. Dicon Pachi no ta tribi bisa Juancho cu e tayo cu galiña no ta pa su cacho?
5. Bo ta kere cu Juancho mes a kere cu e galiña tabata pa e cacho di Pachi? Splica dicon si of dicon no.
6. Kico Juancho ta bisa ora e purba e sopi?
7. Con e sopi di piedra ta smaak? Splica con bo por sa esey.
8. Kico Juancho ta bisa ora Pachi pidie pa cumpra e piedra di sopi cerca Juancho?
9. Bo ta kere cu e piedra di sopi ta un piedra magico di berdad?
10. Bo ta kere cu Juancho a nek Pachi un tiki? Splica dicon si of dicon no.





4 Vocabulario

Barbulet Colorito

Den un pais leu for di nos isla, tin un parke masha special. Eynan tin miles di barbulet. Den e parke aki Colorito ta biba. E ta un barbulet chikito yen di color precioso.

Tur anochi Colorito ta drumi dushi riba e tapijt di yerba den e parke. Pero un mainta, ora e lanta for di soño, Colorito ta papa muha pa motibo di e serena cu a cay marduga. Colorito ta sacudi su halanan pa kita e gotanan for di su curpa y e ta bula bay pa dal un keiro.

“Barbulet Colorito! Barbulet Colorito!”, e flornan ta grit’e.

“Na unda bo colornan a keda?” Straña Colorito ta drey wak su curpa y e ora ey numa e ta ripara cu su halanan ta blanco blanco. Colorito ta bira asina tristo cu e ta cuminsa yora. E ta yora sin stop y ningun bestia no por consol’e. E parhanan ta canta p’e y e nubianan ta kinipi wowo p’e. Pero nada no ta calm’e. Net na e momento ey un bichi candela, cu gusta pinta, ta pasa cu su palet yen di color y su penseel. “Kico ta pasando aki?”, e ta puntra. Tur barbulet, flor y parha ta grita den koor: “Colorito a perde su colornan!”

Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

“Ay, Colorito, esey no ta niun problema”, e bichi candela ta consol’e. “Bin, lo mi duna bo halanan nan color bek!”

Colorito ta bula bay derechito cerca e bichi candela. E ta span su halanan y ta keda para te ora e ta cla. Contento di dje e ta bula bay cu su colornan briyante.

Pero ay, un nubia scur ta tapa e solo y strena ta cuminsa zona. Pipita grandi di awasero ta bin abou for di shelo. E verf ta cuminsa choria for di e halanan di Colorito.

“Kico mi tin cu haci awor?”, Colorito ta snik. “Mi ta sin color atrobe!”

Net na e momento ey awa ta stop di cay. Un rayo di solo ta sali y un arco iris colorido ta sali na horizonte.

“Arco iris, arco iris, bo tin asina tanto color! Bo no por regala mi algun color?”, Colorito ta puntra.

Arco iris ta haya duele di e barbulet tristo y ta bis’e: “Si dushi, mi ta regala bo algun color.”

Loco di contento Colorito ta bula bay cerca arco iris mesora.

Y asina ta cu te dia djawe bo por mira Colorito bula feliz di dje cu tur su colornan precioso.

Tarea 2

Bo sa e contesta?

- Kico ta e diferencia entre un pintor y un verfdo?



Colorito gusta drumi riba e ...



Pero ... ta cay y ta kita tur color di Colorito.



Barbulet, flor y parha ta grita den ...: “Colorito a perde su colornan!”



Bichi candela ta uza su ... y ... pa pinta yen di color pa Colorito.



Awasero ta cay. E verf ta cuminsa ... for di e halanan di Colorito.



Un arco iris briyante ta sali na

Tarea 3

- Nos ta papia di un tapijt di yerba. Con nos ta yama un cantidad di flor cu ta crece abou cerca di otro? Busca e contesta den e rij akibou.

Tarea 4

- Abo lo kier ta un barbulet? Splica dicon si of dicon no.
- Bo sa na unda barbulet sa drumi normalmente?



5 Pensa bon

5j Duna e palabra contrario

- Duna e palabra contrario di e palabranan cursiva.
- Wak e ehempel. E wea di funchi ta masha *grandi*. → *grandi* – *chikito*

E wea di funchi

1. E wea di funchi tabata *malcontento*.
2. E tabata *keha* masha hopi mes.
3. E wea tabata kik cu e tin masha *mala suerte*.
4. Mama Elena a pensa cu e no ta *perde nada*.
5. El a cushina un stoba *sabroso* den e wea.
6. Pero e cuminda a *pega* den bom di e wea.
7. Mama Elena a *limpia* e wea cu un cuchiu.
8. Pero e cuchiu tabata masha *skerpi*.
9. P'esey e cuchiu a *raspa* cuero di e wea.
10. Ora el a caba di limpia e wea, esaki tabata *lombra*.



5k Cua palabra bo ta scoge?

- Scoge y yena e palabra corecto.

choria – consola – halanan – feliz – horizonte – palet –
penseel – pintor – precioso – regalo – serena –
tapijt di yerba

Colorito

1. Ora ... cay marduga, mainta tur mata ta un tiki muha.
2. Como cu barbulet Colorito a drumi riba e ..., el a keda papa muha.
3. Ora el a perde su color, ningun hende no por a ... Colorito.
4. Nan a pidi e ... bichi di candela pa duna Colorito su colornan bek.
5. E tabata cana cu su ... yen di verf di tur color.
6. Cu su ... el a pinta tur color di nobo.
7. Pero un pal'i awa a pone cu e verf a cuminsa ...
8. E verf a kita for di e ... di Colorito.
9. Un arco iris colorido cu a sali na ..., a yuda Colorito.
10. El a duna Colorito algun color como ...
11. Te dia djawe bo por mira Colorito bula cu tur su colornan ...
12. Colorito ta ... y contento.

5l Bo tabata sa?

Cuenta di fantasia cu autor conoci.

Tin cuenta di fantasia cu *no* ta cuenta folklórico. Nan tin autor conoci y nan ta e cuentanan skirbi. Nan *no* ta e cuentanan cu a pasa oralmente (papia) di generacion pa generacion. Ta dushi cu e cuentanan aki t'ey. Asina tambe nos por drenta den mundo di maraviya y soña bay.

5m Busca palabra

- Den cada un di e siguiente frasenan tin un palabra scondi. E palabra tin di haber cu cuenta di fantasia.
- Busca e palabranan ey y skirbi nan den bo schrift.



Ehempel

Mi juffrouw a compra un globo nechi. → bonechi


1. Riba e sero tin un cas gigantesco.
2. E lama gordo no ta logra subi e sero.
3. Mama ta wak e bahada di solo.
4. Ayera mi tanta a compra un bolo di batrey.
5. Tur e hendenan opera mester keda hospital.
6. Sarah a compra un saya biña pa su fiesta.
7. Mi no por bisti e carsonnan ey. Nan ziper ta kibra.

5n Cua palabra nobo bo por traha?

- Akibou tin algun palabra forma cu *di*.
 - Traha cada bes dos palabra mas forma cu *di*. Cuminsa cu e ultimo palabra.
- Ehempel: tas di *scol* – *scol* di *musica* – *musica* di salsa

- | | |
|----------------------------|------------------------------|
| 1. paña di <i>popchi</i> – | 4. blachi di <i>mata</i> – |
| 2. taira di <i>auto</i> – | 5. leishi di <i>potret</i> – |
| 3. man di <i>porta</i> – | 6. pia di <i>mesa</i> – |





6 Skirbi bon

6j Lesa y skirbi

- Lesa e frasenan akibou y skirbi e palabranan cu tin un color, nechi y sin eror den bo schrift.
1. **Serena** ta cay y e ta muha e **tapijt di yerba**.
 2. **Barbulet** Colorito ta perde tur **color**.
 3. Ningun hende no por a calma ni **consola** Colorito.
 4. **Bichi di candela** ta un **pintor**.
 5. E ta cana pasa cu su **palet** yen di verf di tur color.
 6. Barbulet, flor y parha ta grita den **coro**: "Yuda Colorito!"
 7. Cu su **penseel** bichi di candela ta pinta e halanan di Colorito.
 8. Pero awa ta pone cu e verf ta **choria** for di e halanan.
 9. **Arco Iris** ta regala Colorito algun color.



6k Dictado

6l Charada

1. Dicon kabouter semper ta hari ora nan ta hunga bala?
 2. Kico ta blanco y ta para den huki?
- Wak na pagina 83 si bo contestanan ta bon.




6m Describi e plachi

- Wak e plachi bon. Ta plachi di un palo.
- No ta un palo comun.
- Describi e palo den algun frase den bo schrift.
- Bo ta kere ta un palo magico? Dicon si of dicon no?
- Kico ta colga na e palo aki?
- Unda bo ta kere cu bo por haya un palo asina?
- Abo lo kier un palo asina den bo cura? Splica dicon si of dicon no.
- Kico mas bo kier pa crece na e palo?
- Duna e palo un number special.



6n Skirbi frase pa un cuenta di fantasia

- Bo ta prepara pa skirbi un cuenta di fantasia.
- Den e cuenta bo por laga kabouter, hada, hadita, tovenaar, gigante, animal of mata cu ta papia, hunga un rol.
- Traha un campo di palabra, skirbi e titulo memey y hala ocho liña den diferente direccion.
- Awor bo ta skirbi palabra cu tin di haber cu bo cuenta.
- Traha un frase cu cada palabra cu bo a skirbi.





1 Scucha y papia

Cuki magico

Hadita Iriana ta biba den un hofi magico. E hofi ta un luga cu palo yen di fruta y mata cu yen di flor precioso. Eynan hada y hadita ta biba contento di nan, hunto cu miles di parha y barbulet.

Hadita Iriana tin masha hopi amiguito. Semper nan ta hunga hunto. Pero riba un dia algo teribel ta sosode. Iriana ta disparce y niun hende no por hay'e. Henter mondi ta aribabou. Nan ta busca tur caminda, pero Iriana ta keda perdi.

Tur hada y hadita ta masha tristo. Hasta e floran ta laga nan cabes colga. Net ora nan tur a perde speransa, un barica geel ta bin cu un noticia. E ta conta cu ora el a bula pasa banda di e cas di gigante Oto, el a mira cu den e toren tin luz cendi. For di un distancia el a mira Iriana sinta den un huki di e toren.

Tur hada, animal y flor ta loco di contento. Awor nan sa unda Iriana ta. Pero nan ta un tiki tristo tambe. Con nan por libra Iriana? Oto ta asina grandi y e tin masha hopi forza ...

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





2 Mi por lesa



- Tin diferente sorto di texto.
- Tin texto di cuenta.
 - Tin texto pa amplia bo conocemento.

Dicon flor di yabi no ta encanta mas

Den un pais leu for di nos isla, ta crece un flor geel chikito. E yama flor di yabi. Antes e flor maravioso aki tabata encanta. Si bo a logra pikie na e momento adecua, e tabata cambia den un yabi precioso. Cu e yabi ey bo por a habri tur luga cu tin un tesoro warda.

Ma riba un dia tur cos a cambia. Esey tabata e dia cu Chito, un cuidado di bestia, a mira un serito cu masha hopi flor di yabi. El a piki un di e floran y a peg'e riba su sombre. Inmediatamente su sombre a bira masha pisa mes. Ta kico ta pasando? Chito a puntra su mes. Un flor comun no ta pisa casi nada, toch? Laga mi wak e flor un biaha mas. Pero ora Chito a kita su sombre, el a keda boca habri. E flor geel chikito a desaparece. Na e luga caminda Chito a peg'e, tabatin un yabi di oro.

Cu cuidou Chito a los e yabi. Na e momento ey rayo di solo lombrante a aparece. Casi Chito no por a tene su wowo habri. Toch el a loer door di su cabey di wowo.

E, e, un cos bunita asina si e no a mira nunca. Riba e top di e sero, miles di rayo di solo tabata zweef y memey di e rayonan tabatin un hada masha bunita.

“Bo no mester tin miedo, Chito”, e hada a bis'e. “E yabi cu bo tin den bo man, ta un yabi di suerte. Pon'e riba e baranca riba e sero aki. Asina bo haci esey, e baranca lo habri y cambia den un cueba cu tesoro. Coy cuanto cos precioso cu bo kier. Pero un cos si, corda bay cu e yabi atrobe.” Na mes momento e hada a desaparece.”

Chito no tabata sa si ta soña el a soña of si e tabata lanta. El a subi e sero pura. Cu masha cuidou el a pone e yabi riba e baranca. Mesora e piedra grandi a habri. Chito no por a kere su wowonan. El a mira un cueba hundo cu tur sorto di prenda briyante y moneda di oro.

Pura Chito a drenta den e cueba. El a kita su camisa y habrie abou. El a yen'e cu tur sorto di prenda y moneda. Despues el a mara e paña sera cu un conopi y cana sali for di e cueba. “Hura, mi ta rico!”, el a grita contento. Pero den su alegria Chito a lubida e cos mas importante. E yabi cu mester habri luga di tesoro a keda abou den e cueba.

Mientras Chito tabata cana bay cas, poco poco e cueba a cera cu e yabi di tesoro aden. Mesora el a cambia y bira un baranca bek. For di e dia ey e floran di yabi a perde nan forza magico. Y ningun hende no a mira e yabi di oro nunca nunca mas.



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Ki sorto di texto esaki ta?
Scoge entre:
 A. Un cuenta
 B. Un texto pa amplia bo conocemento, esta un texto cu ta siña bo algo.
3. Ki sorto di flor e flor di yabi tabata antes?
4. Kico tabata pasa ora bo piki e flor na e momento adecua?
5. Ki dia tur cos a cambia?
6. Unda Chito a pega e flor cu el a piki?
7. Dicon Chito a kita su sombre?
8. Ki ora Chito ta keda boca habri?
9. Unda e hada cu Chito a mira tabata?
10. Kico e hada a bisa Chito?
11. Kico Chito no mester a lubida?
12. Unda el a pone e yabi?
13. Kico Chito a haci den e cueba?
14. Kico el a lubida den su alegria?
15. Dicon ningun hende no a mira e yabi di oro mas?
16. Kico abo lo haci si bo haya un yabi cu ta habri un cueba di tesoro?



4 Vocabulario

Dicon lama ta salo

Hopi tempo pasa tabatin dos ruman homber, Eric y Elvis. Eric tabata un homber misionario. E tabatin tur cos na abundancia. Elvis si tabata pover.

Riba un dia Elvis a pidi su ruman algo di come. Erik a conteste: “Mi ta duna bo un baca, pero despues mi no kier mira bo nunca mas.” Elvis a bay di acuerdo. El a tuma e baca y a cana bay cas.

Na caminda el a pasa den un mondi. Ey el a topa un kabouter cu tabata vigila e mondi. E kabouter a bisè: “Den e mondi aki tin un tovenaar ta biba. Casi sigur e kier bo baca. No dunè e bestia sin mas. Cambiè pa un molina di man. Despues mi ta siña bo con pa traha cu e mulina.”

Elvis a sigui cana. Un rato despues el a topa cu e tovenaar. Ora e tovenaar a pidie e baca, Elvis a cambiè pa e molina di man.

Prome cu el a sali for di e mondi, e kabouter a splicè: “E molina aki ta traha tur cos cu bo pidie. Pero un cos si, e molina ta stop solamente ora bo bisè: “Danki molina.”

Ora Elvis a yega cas, su casa a keda masha encanta. Despues di un par di dia nan a pone un fiesta. Eric, cu tambe tabata invita, a bira masha jaloers ora el a mira cu Elvis a bira mas rico cu ne.


Mesora el a puntra su ruman: “Con bo a haci pa bira rico?”
“Mi tin un molina magico”, Elvis a responde y el a contè tur cos cu su molina por haci.
“Mi por compra bo mulina?”, Eric a puntrè. Prome Elvis no tabata kier. Pero despues di hopi rogamento el a bendè toch.

Mes anochi Eric a sali pa lama cu su barco. Ora su koki tabatin mester di salo, Eric a pidi e molina pa traha salo. E molina a hacie mesora. Pero Eric no tabata sa con e mester a stop e aparato. Esey Elvis a lubida di bisè.

E molina a keda traha y a yena e barco yen yen di salo. Eric a rabia asina tanto cu el a benta e molina den awa. Asina ta cu te awe ainda e molina ta traha keto bay. Y ta pèsey rond mundo lama ta salo.



1 Un homber ... ta un homber masha rico.



2 Un ... bo ta drey cu bo man. Asina e ta funciona.



3 Un ... ta percura pa niun hende cu mal intencion no drenta un luga.



4 Ora bo ta ... cu un hende, bo ta dun'e rason.



5 Ora bo ..., bo ta masha contento.



6 Ora bo ... un hende, bo ta pidie algo cu masha urgencia.

Tarea 1


Kico bo ta yena?

- Lesa e frase bou di cada plachi.
- Busca e palabra(nan) cu falta, den e rij akibou.
- Skirbi e frasenan den bo schrift.

Tarea 2

Bo sa e contesta?

- Den e cuenta bo a lesa tocante un molina di man. Cuanto sorto di molina mas bo conoce?
- Skirbi e sortonan den bo schrift.



5 Pensa bon

5o Cua nificacion ta pas?

- Akibou bo ta lesa algun dicho y proverbio.
- Busca nan nificacion den e rij na banda.



- | | |
|--|--|
| <ol style="list-style-type: none"> 1. Bay manera salo den awa. 2. Duna ta duna. 3. Papia ta oro, keda keto ta diamanta. 4. Sopi pura ta sali salo. 5. Ora hero ta cayente, mester strica. | <ol style="list-style-type: none"> a. Tin biaha ta miho bo keda keto. b. Mester probecha di situacion faborabel. c. Disparce lihe. d. Loke bo duna un hende bo no por exigí bek. e. Ora bo haci algo pura, e por sali malo. |
|--|--|

5p Cua palabra bo ta scoge?

- Scoge y yena e palabra corecto.

abundancia – barco – luhoso – intencion – molina di man – salo – stop – misionario – roga – traha – vigilante

Awa di lama

1. Erik tabata masha rico. E tabatin tur cos na ...
2. Den mondi Elvis a topa un kabouter ...
3. E tabata percura pa niun hende cu mal ... no drenta e mondi.
4. Elvis a cambia su baca pa un ...
5. Elvis a bira un ..., pasobra e molina a hacie rico di un dia pa otro.
6. For di e momento ey Elvis tambe por a biba den un cas ... y espacioso.
7. Erik a ... Elvis pa bend'e su molina di man.
8. E mesun anochi Erik a sali pa lama cu su ...
9. Ora e tabata riba lama, Erik a laga e molina traha ...
10. Pero e no por a ... e molina y a bent'e den lama.
11. Te awe e molina ta ... ainda, p'ese y lama ta salo asina.



5q Traha rij

- Lesa e cuenta **Strea moneda** cu atencion.
- Despues bo ta pinta dos paraplu den bo schrift. Wak e ehempel akibou.
- Bou di un paraplu bo ta skirbi tur e articulonan cu bo ta haya den e frasenan.
- Bou di e otro paraplu bo ta skirbi tur e sustantivonan.

1. un
2. -



1. tempo – mucha
2. number – Suzy



Strea moneda

1. Hopi tempo pasa tabatin un mucha pover.
2. Su number tabata Suzy.
3. Suzy no tabatin un cas pa biba aden.
4. E pobercito tabatin solamente e pañanan na su curpa.
5. Riba un dia Suzy a haya un sandwich cerca un bon hende.
6. Canando den bario el a topa un pidido di limosna.
7. “Mi tin hamber”, e shon a bis’e.
8. Suzy a dun’e su pan y a sigui cana.
9. Riba su caminda el a topa un chabalito cu tabata yora.
10. E mucha a snik: “Mi cabes ta morde di e solo cu ta kima.”
11. Suzy a haya duele y a dun’e su pechi.
12. Anochi finalmente Suzy a yega na un plenchi.
13. Ey el a topa cu un señora bieu.
14. Cu un cara tristo e señora a bis’e: “Mi no tin nada pa tapa contra friu.”
15. Suzy a dun’e su poncho.
16. Cansa el a cay sinta riba un banki.
17. Pero diripiente un strea tras di otro a cay for di shelo.
18. Tur e streanan a cambia bira moneda di oro.
19. Asina Suzy a bira un mucha rico.





6 Skirbi bon

6a Cua letter falta?

Den e cuenta akibou tin letter cu a cay afo. Skirbi e palabra cu falta letter, den bo schrift. Bo por uza e letternan mas cu un biaha. Scoge for di e siguiente letternan.

ay – ey – eu – ia – ie – ieu – iu – ou – au – oy – ui – ue – ei – ai – ui – uy



Aventura bou di awa

1. Riba un d... dos ruman, Reno y Rosita, tabata hunga riba un baranca.
2. Dirip...nte nan a c... den awa.
3. "...xilio! Yuda nos!", nan a grita.
4. No mucho l..., den fondo di e lago, Mora, un heks di awa, tabata biba.
5. Mesora el a c... e muchanan preso.
6. El a cera nan den un c...ba bou di awa.
7. Mora a laga e pover muchanan traha te bira bl...w
8. Nan mester a peña su cab... y sk...ro su halanan di rabo.
9. Mora tabata duna Reno y Rosita solamente funchi fr... pa come.
10. Despues di algun dia Reno y Rosita a cuminsa bira desespera y impac...nte. Nan kier a bay nan cas.
11. Un m...nta, ora heks Mora a lubida di cera e c...ba, nan a h...
12. Ora Mora a ripara cu Reno y Rosita a b..., el a sig... nan tras.
13. Den nan ansha e muchanan a laga un spiel magico c... ab...
14. E spiel a camb... bira un sero halto; un sero cu ta slip.
15. Heks Mora a purba subi e sero, pero e muchanan a disparce dia b...



7 Tarea varia

7a Describi e plachi

- Wak e plachi bon. Ta plachi di un obheto. Con nos ta yama e obheto aki?
- Describi e obheto den algun frase den bo schrift.
 - Nombra tres persona cu sa uza e obheto aki.
 - Pa kico nan ta uz'e?
 - Abo tambe tin gana di uza e obheto aki? Dicon si of dicon no?



7b Kisicosa

- Kico tin para akibou?



- chi + sa



- ki + enta



- mbu



- im + shi

7c Skirbi bo cuenta di fantasia

- Siman pasa bo a pensa caba ki cuenta bo ta bay skirbi.
- Tambe bo a traha algun frase cu e palabranan cu bo ta bay uza.
- Awor bo ta skirbi un cuenta cortico cu e frasenan cu bo a traha.
- E frasenan akibou por yuda bo cuminsa cu bo cuenta.
Un dia tabatin un ... E tabata biba ...


7d Barbulet

- Un barbulet ta cambia di forma durante su bida.
- Skirbi y pinta e forman den secuencia di hoben pa adulto.
- E tres forman ta: **barbulet – larva – pop**

* Contesta di charada 6l

1. Pasobra yerba ta kishiki bou di nan brasa.
2. Un frishider cu a haya straf.





1 Scucha y papia

Combersacion

- Awe bo ta papia tocante *dinosaurio*. E animalnan aki no t'ey mas, pero nan a existi di berdad si.
- Bo a yega di mira cine of plachi di dinosaurio y bo por conta con e bestianan aki tabata?
- Tabatin dinosaurio di diferente tamaño. Con grandi bo ta kere esunnan di mas grandi tabata?
- Tabatin diferente sorto di dinosaurio. Kico tabata e diferencia entre e animalnan aki?
- Tur dinosaurio tabatin nan propio manera pa defende nan mes. Bo sa con un dinosaurio tabata defende su curpa?
- Cierto dinosaurio tabata come mata y otro tabata jaag riba bestia. Cua sorto tabata mas peligroso bo ta kere? Dicon?
- Abo lo kier a biba den e tempo cu tabatin dinosaurio riba mundo? Splica bo contesta.

Regla di combersacion

Si nos no ta comprende otro, nos ta pidi splicacion.



2 Mi por lesa

Dinosaurio



Miyones di aña pasa tabatin un animal masha special, cu yama dinosaurio, ta biba na mundo.

Un dinosaurio ta un reptiel, mescos cu lagadishi, yuwana y colebra. Un reptiel ta un animal cu ta lastra abou y pone webo. Contrario na otro reptiel, un dinosaurio si tabata cana riba su pianan.




Un mama dinosaurio gigante no tabata broei e webonan cu el a pone. Esey tabata imposibel. E webonan lo a kibra bou di su peso inmenso. Solo tabata duna mama dinosaurio un man y tabata keinta e webonan p'e. Despues di algun tempo e chikitinnan tabata nace.



Diferente dinosaurio tabata yuda mama dinosaurio cuida su yiunan. Nan tabata wak y proteha e chikitinnan, ora mama bay busca cuminda pa su baby nan.



Hende sa cu dinosaurio a existi, pasobra nan a haya fossiel, esta imprenta di nan wesonan den piedra. Tambe nan a haya skelet completo di e animalnan aki. Cuanto sorto di dinosaurio tabatin, esey te ainda ningun hende no sa.



Si nos sa cu tabatin dinosaurio cu ta come mata y dinosaurio cu ta come carni. E comedonan di mata no tabatin djente mucho fuerte. P'esey hopi biaha nan tabata guli nan cuminda sin kauw e prome. E comedonan di carni tabatin djente grandi, bruto y masha skerpi. Semper nan tabata cla pa ataca.



Rond mundo tin museo caminda bo por mira fossiel y skelet di dinosaurio. Den un luga asina bo por haya sa hopi cos di e reptiel enorme aki. Bo tambe tin gana di bishita un museo asina?

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Ki sorto di texto esaki ta?
Scoge entre:
 A. Un cuenta
 B. Un texto cu ta siña bo algo.
3. Un dinosaurio ta un reptiel. Ki sorto di animal un reptiel ta?
4. Duna un descripcion di un dinosaurio.
5. Kico ta e diferencia entre un dinosaurio y otro reptiel?
6. Dicon mama dinosaurio gigante no por a broei e webonan cu el a

7. Mama dinosaurio tabata haya yudansa cu broeimento di e webonan. Con?
8. Dicon mama dinosaurio por a bay busca cuminda pa su baby nan tranquilamente?
9. Con nos por sa cu dinosaurio a existi di berdad?
10. Con e djentenan di dinosaurio comedo di mata tabata?
11. Kico nan tabata haci cu e cuminda cu nan tabatin den nan boca?
12. Con e djentenan di dinosaurio comedo di carni tabata?
13. Unda bo por bay pa mira skelet di dinosaurio?



4 Vocabulario

Mundo di dinosaurio

Hopi, hopi aña pasa, mundo tabata completamente otro cu awor.

Den e tempo aya tabatin bestia y mata cu awendia no t'ey mas. Un di e bestianan ey ta dinosaurio.

Tabatin diferente sorto di dinosaurio.

Algun tabata gigante. Bo tabata sa cu nan tabata hasta mas halto cu un edificio di seis piso? Nan tabata pisa mas cu diesdos olifante hunto.

Tin otro dinosaurio cu tabata mas chikito. Esunnan di mas chikito tabatin grandura di un galiña. E animalnan ey tabata masha lihe y flexibel.

Tur dinosaurio tabata biba riba tera.

Tabatin algun cu ta come mata so.

Bestia cu ta come mata so, nos ta yama herbivoro.

E dinosaurionan cu ta come mata tabatin garganta y rabo masha largo. Nan rabo nan tabata uza pa keda para riba nan pianan di patras. Asina nan por a yega na e blachinan mas halto di un palo.

E animalnan aki tabata biba den grupo, pasobra nan tabatin un tiki miedo di e dinosaurionan cu ta come bestia. Animal cu ta come carni nos ta yama carnivoru. E dinosaurionan carnivoru tabatin un cabes largo. Nan pia di dilanti tabata cortico. E pianan di patras tabata fuerte. Asina nan por a core masha duro mes. Semper nan tabata cla pa ataca.

Tur dinosaurio tabatin nan propio manera pa defende nan mes. Tabatin dinosaurio cu rabo manera un chicoti.

Cu e chicoti ey nan por a kibra pata di e animal cu ta ataca nan. Otro tabatin un casca duro riba nan curpa. Of spina fuerte na nan nek.

Dinosaurio no ta existi mas. Pero nan famia si t'ey ainda. Caiman, lagadishi, yuwana, colebra y parha, tur ta famia di dinosaurio.

Bo tabata sa cu e palabra dinosaurio kiermen lagadishi horroroso? Kico abo ta kere? Di berdad un dinosaurio tabata asina peligroso manera hopi hende ta kere?

Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.



1 Miyones di aña pasa tabata existi na mundo animal special cu yama ...



2 Mescos cu caiman, yuwana, lagadishi y colebra, un dinosaurio ta un ...



3 Un dinosaurio cu ta come mata so, nos ta yama un ...



4 Un dinosaurio cu ta come carni so nos ta yama un ...



5 Tur dinosaurio tabata defende nan curpa. Algun tabata hacie cu nan rabo manera un ...




6 Den diferente museo bo por admira ... y ... di dinosaurio.

Tarea 2

Un dinosaurio tabata pone webo y asina yiu dinosaurio ta nace.

- Dinosaurio cu curpa chikito tabata drumi riba nan webonan. Cua bestia mas bo conoce cu ta haci mescos?

- Dinosaurio gigante no por a broei nan webonan. Nan tabata tapa nan webo cu blachi of santo. Solo tabata keinta nan. Cua bestia mas bo conoce cu ta haci mescos?



5 Pensa bon


5a Verbo

- Nos tin nomber pa palabra cu ta bisa kico un hende, bestia, mata of cos ta haci. Un palabra asina nos ta yama un *verbo*.
- Les a e ehempelnan akibou.

E baby ta drumi den cama.	Kico e baby ta haci?	<i>drumi</i>
E cacho ta lembe su pia.	Kico e cacho ta haci?	<i>lembe</i>
E palo di mango ta pari hopi.	Kico e palo ta haci?	<i>pari</i>
E boter ta lora for di mesa.	Kico e boter ta haci?	<i>lora</i>

- Drumi, lembe, pari y lora* nos ta yama *verbo*.

- Aki ta sigui algun frase.
- Busca e verbo. Puntra y contesta kico e hende, bestia, mata of cos ta haci.



Famia dinosaurio

- Tata dino a traha un neishi. Kico Tata dino a haci? *traha*
- Despues Mama dino gigante a tapa e webonan cu blachi y santo.
- Mama y Tata dino tabata proteha e webonan.
- Solo tabata keinta e webonan henter dia.
- Riba un dia e webonan a kraak.
- E yiuchinan dino a sali for di e webonan.
- Mesora nan a come blachi di mata fresco.

5b Scoge palabra

- Den cada frase tin un palabra cu ta muestra cu ta trata di un nomber di cariño of algo chikito. Bisa ta cua palabra esey ta.

Un pueblo special

- E welita di Fatima ta biba den un pais leu for di aki.
- E ta biba den un pueblecito bunita na Portugal.
- E pueblo ta rondona pa serito tapa cu yerba berde.
- Tur casita ta blanco cu dak cora.
- Den e curanan tin animalito y hopi flor colorido.
- Den e palonan halto tin paharito ta fluit henter dia.



5c Unda e parha ta?

Probablemente parha tambe ta famia di dinosaurio. Hopi miyon aña pasa tabatin parha primitivo na mundo. E animalnan aki tabatin djente, pata y un rabo mescos cu di reptiel. Tambe nan tabatin pluma y hala mescos cu parha.

- Unda asina e parha primitivo aki lo tabata den dia? Pensa shete *diferente* luga mas. Corda bon cu den e temponan aya no tabatin cas ni haula ainda.

- | | |
|-------------------------------------|-----------------------------|
| 1. E parha ta <i>den un cueba</i> . | 5. E parha ta pafo di ... |
| 2. E parha ta banda di ... | 6. E parha ta riba ... |
| 3. E parha ta bou di ... | 7. E parha ta cerca di ... |
| 4. E parha ta dilanti di ... | 8. E parha ta patras di ... |



5d Cua splicacion bo ta scoge?


- Scoge pa cada palabra e splicacion corecto.

- | | |
|---------------|---|
| 1. reptiel | a. animal peligroso cu ta lastra abou. |
| | b. animal cu a sali for di webo y cu ta lastra abou. |
| 2. carnivoru | a. animal cu ta come carni y mata. |
| | b. animal cu ta come carni mas tanto. |
| 3. skelet | a. weso di hende of bestia. |
| | b. weso di bestia. |
| 4. fossiel | a. piedra cu un imprenta di un animal of mata. |
| | b. piedra cu parce un animal of mata. |
| 5. herbivoru | a. animal cu ta come mata so. |
| | b. animal cu ta come carni y mata. |
| 6. dinosaurio | a. animal cu parce un bichi. |
| | b. animal cu a biba miyones di aña pasa y cu tabata un reptiel. |



5e Charada

- Kico ta mes grandi cu un dinosaurio, cu no ta pisa nada?
 - Kico bo ta bisa ora bo topa un dinosaurio cu tres cabes mainta?
- Wak na pagina 121 si bo contestanan ta bon.



6 Skirbi bon

6a Alfabet

- Akibou tin palabra cu ta cuminsa cu letter 'a'.
- Pone e palabranan di cada rij tras di otro segun alfabet.
- Awe e di dos letter tambe ta conta.
- Wak e ehempel y sigui na e mes manera.

aa – ab – ac – ad – ae – af – ag – ah – ai – aj – ak – al – am –
an – añ – ao – ap – aq – ar – as – at – au – av – aw – ax – ay – az

adres – agenda – aletria – anochi – aros

1. awacati – alumno – appel – animal – alfabet
2. ami – abeha – asfalt – aventura – ainda
3. ayudo – aunke – aire – aspirin – aeropuerto
4. atleta – Africano – avestruz – aparato – aquarium
5. aguila – amiga – awasero – Arubano – avion

6b Coregi palabra

- Den cada frase tin un palabra cu no ta corecto.
- Busca y coregi e palabra ey.
- Skirbi nan sin eror den bo schrift.

Dicon dinosaurio a disparce?

1. Dinosaurio a muri hopi tempo pasa.
2. Tin deferente splicacion pa nan morto.
3. Un di nan ta cu un pjiedra enorme a cay na mundo.
4. Un nomber difisil pa un piedra asina ta meteoriet.
5. Macha stof a lanta tapa luz di solo.
6. Mundo a bira dimasiadu friu.
7. Majoria di mata a muri.
8. E dinosaurio herbeforo tambe a muri.
9. Asina niun carnevoro no tabatin suficiente cuminda.
10. Ta cierto otro animal so a sobrevivi e desaster.



dinosaurio

-
-
-
-
-
-
-
-
-
-




6c Kico bo ta kere?

- Imagina bo cu awe un dinosaurio aparece na Aruba.
- Bo ta kere cu e lo por biba hunto cu hende?
- Skirbi bo contesta den tres frase den bo schrift.
- Skirbi den dos frase tambe dicon bo ta kere cu e lo por of no por biba cu hende.
- Despues pinta un dinosaurio acerca.

6d Busca frase cerca plachi

- Scoge cerca cada plachi e frasenan corecto.
- Skirbi number di e plachi y e frasenan cu ta pas acerca den bo schrift.



- Mi a biba hopi tempo pasa. Mi tabata masha grandi.
- Mi ta peligroso. Niun hende no kier topa mi, ora nan ta landa den riu.
- Mi ta esun di mas chikito. Mi parce mi primo, pero e ta mas grandi.
- Mi gusta biba den palo. Ta pica cu tin hende ta jaag riba mi pa traha sopi di mi.

6e Lista di cuminda

- Algun parha cu a biba den tempo di dinosaurio, tabata come carni.
- Nos warawara tambe ta un carnivoro.
- Traha un lista cu cinco bestia cu warawara ta come.



1 Scucha y papia


Caiman y Macaco

Tur dia Caiman ta drumi canto di riu. Riba un dia Macaco ta pasa eybanda. Prome e ta spanta cuminsa soda friu ora e mira e animal peligroso. Pero Caiman ta logra trankilis'e. "No tene miedo, mi amigo", Caiman ta bisa Macaco. "Den dia un caiman ta mucho floho pa jaag. Drumi so nos kier drumi tuma solo. Esey ta asina for di dia cu nos tabata comparti mundo cu nos famia dinosaurio. Ta te ora solo baha, nos ta bira un tiki mas activo. Pero abo Macaco, abo lo mi no haci daño nunca. Mi kier ta bo amigo pa semper."

Kico bo ta kere?

Caiman y Macaco ta bay bira amigo pa semper?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





2 Mi por lesa

Ornito ornitorinco

Den un parke di naturalesa na Australia, un pais masha leu for di aki, Ornito ta sosega trankil canto di un lago. Ornito gusta biba den e parke grandi. Ey e tin hopi amiguito manera koala, cangaru color maron cora y shoco cu ta ladra. Serio, e shoco ta ladra di berdad. Net ora Ornito ta bay tira un cabes, e ta tende dos turista papia. “Bon ta ki sorto di bestia e ta anto?”, e ta tende un stem bisa na bos abou. Ora Ornito bira wak, e ta mira con un señora ta mostra riba dje. “Mi ta un ornitorinco, ta ken no sa esey?”, Ornito ta bisa. Pero, ay ta pica! E pober señora no ta compronde. Entretanto el a bisti su bril pa e lesa den un buki. “Ahan”, e señora ta bisa despues di un rato, “aki mi ta lesa cu e animalito straño aki ta un ornitorinco.”

Awa ta cuminsa core for di wowo di Ornito. E turista aki no conoce un ornitorinco?, e ta pensa. Semper mama a bisa cu ornitorinco ta bestia masha special. Bestia unico. Mi sa caba kico ta bay pasa awor. E señora turista ta bay bisa cu nos tin algo di diferente bestia. E tin rason, pasobra ta eseynan ta haci nos ornitorinco special!

Nos ta pone webo mescos cu parha, pero nos no ta parha. Parha no por duna nan yiuchinan lechi, toch? Nos si por haci esey. Un ornitorinco ta un mamifero mescos cu baca, cabrito, raton di anochi y hopi animal mas. Parha ta pone webo den neishi den palo of scondi den mata. Nos ta pone webo bou di tera. Un reptiel tambe ta haci esey. Nos webonan ta blanco, geel cu blauw. Pret, no?

Bo sa cu asina un yiuchi ornitorinco sali for

di webo, e ta cuminsa lembe lechi cu ta sali for di lana di su mama? Mama ornitorinco no tin pecho. E lechi ta sali for di su porionan, esta e buraconan chikiritico den su cuero. Un yiuchi cu a caba di nace, no ta mas grandi cu un huña di bo dede. P’esey e mester di lechi p’e bira fuerte. Mama ornitorinco ta cuida su babynan bon, te ora nan tin mas o menos cinco luna. E ora ey nan ta basta grandi pa nan mes bay busca cuminda.

Con bo ta haya e boca di un ornitorinco? Bo no ta haya cu nos boca parce boca di pato? Toch nos boca ta mucho mas grandi. Cu ne nos por grawata dushi den lodo pa coba tunnel. Dia cu a parti djente nos a yega poco laat. Nos boca ta blo bashi.



Pero esey no ta stroba nos di savoria bichi, cabaron, insecto, dori y webo di dori. Ora nos bay jaag anochi, nos ta warda tur cuminda den nos banda di cara. Despues ora nos yega nos hol bek, nos ta come tur cos den tur trankilidad.

Tira un bista riba nos patanan awor. Bo a yega di mira pata di parha di awa? Hahaha, nos tambe tin flishi memey di nos dedenan.

P’esey nos por move bon den awa. Nos patanan dilanti nos ta uza pa rema. Esunnan di patras y nos rabo nos ta uza pa stuur.

Bo a ripara caba cu nos no tin pluma? Nos ta tur na lana manera un peluche. Bisa mi awor, nos no ta bestia special? Laga mi seca mi aw’i wowo pa e señora turista saca mi potret.

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Ki sorto di texto esaki ta?
Scoge entre:
 A. Un cuenta
 B. Un texto cu ta siña bo algo.
3. Na ki pais Ornito ornitorinco ta biba?
4. Dicon Ornito gusta biba den e parke grandi?
5. E turista cu ta bishita e parke, sa ki sorto di bestia Ornito ta? Splica bo contesta.
6. Dicon Ornito ta tristo?
7. Ki sorto di bestia un ornitorinco ta?
8. Unda un ornitorinco ta pone webo?
9. For di unda e lechi di mama ornitorinco ta sali?
10. Con grandi un baby ornitorinco ta?
11. Pa kico un ornitorinco ta uza su boca?
12. Unda un ornitorinco ta warda su cuminda? Dicon?
13. Cu cua animal e ornitorinco ta compara su patanan?
14. Con un ornitorinco ta stuur den awa?
15. Cua otro palabra bo por uza na luga di *special*, ora e ornitorinco ta bisa “nos no ta bestia special?”



4 Vocabulario

Animal special

Germain ta keto, mama ta pensa. Ta kico e ta haci?

Diripiente porta di cura ta habri. Mo Tuyu a yega di bishita.

Germain ta core sali mesora. “Mo Tuyu, Mo Tuyu, mi a bolbe mira un programa na television tocante bestia special. Omo no ta corda cu dos siman pasa mi a mira un programa tocante dinosaurio cu tabata biba na mundo hopi tempo pasa? Siman pasa mi a mira un programa tocante bestia special cu ta biba awor. Omo no ta corda cu mi a conta Omo algo di un ornitorinco pret? Awe e programa a sigui. Mi a siña hopi di algun animal unico cu ta biba den awa.

Un di e bestianan ey ta jawfish. E pisca aki ta biba den fondo di lama den un tunnel cu e mes ta traha. Omo sa, un tunnel ta un hol largo. Jawfish su tunnel ta vertical, esta di ariba bay abou. E ta traha e entrada di piedra chikito, cocolishi y coral. Asina e tunnel no ta basha aden. Ora tin

peliger, e jawfish ta sak den su tunnel y laga su wowonan so sali. Anto Mo Tuyu, tende un cos straño. E pisca macho ta tene e webonan den su boca pa nan broei. Ora e tin cu come, e ta pone e webonan un rato abou. Caba e ta bolbe tene nan den su boca.

Un otro animal unico ta e secat bulado. E tambe ta biba den lama. Su curpa tin forma di cilinder y na su cabes e tin dos wowo. E tin dies brasa, ocho ta cortico y dos tengla cu ta largo. Mescos cu un cameleon e por camufla su mes pa enemigo no mir’e den awa.

E ora ey e por haya diferente color. Si e ta banda di un piedra blanco, e ta bira blanco. Si e ta banda di coral geel, su color ta cambia bira geel.

Secat bulado ta spuit cu inkt ora e rabia of ora un otro bestia atac’e.

Hopi cos mi a siña den e programa, no Mo Tuyu?”

“Si, mi dushi”, Mo Tuyu ta bisa, “y awor ami a siña di bo.”



1 
Ornitorinco ta un animal ... cu ta biba na Australia.

2 
E lechi di mama ornitorinco ta sali for di varios ...
E yiuchinan ta cuminsa lembe e lechi asina nan nace.

3 
Memey di su dedenan un ornitorinco tin ... P’ese y e por landa bon.

4 
Jawfish ta biba den un ... Su cas ta ..., esta e ta core di ariba bay abou.

5 
Jawfish ta traha e entrada di su tunnel cu piedra chikito, cocolishi y ...

6 
Mescos cu un cameleon un secat bulado por ... su mes pa enemigo no mir’e.

Tarea 1
Kico bo ta yena?
• Lesa e frase bou di cada plachi.
• Busca e palabra cu falta, den e rij akibou.
• Skirbi e palabra den bo schrift.

Tarea 2
Bo sa e contesta?

- Cant’i awa ornitorinco ta coba un tunnel pa biba aden. Nan ta coba tunnel *horizontal*.
- Bo conoce mas bestia cu ta coba tunnel? Skirbi nan number den bo schrift.
- E lagadishi cameleon y un secat por camufla nan mes. Cua bestia mas por camufla su mes?


- camufla
- coral
- flishi
- porio
- tunnel
- unico
- vertical



5 Pensa bon

5f Di cua animal nos ta papia?

- Lesa e frase y bisa di cua animal ta trata.
- Skirbi e number di e frase y e animal den bo schrift. Wak e ehempel prome.



dinosaurio ornitorinco jaw fish secat bulado caiman

- | | |
|--|-----------|
| 1. Mi ta un reptiel mescos cu mi primo dinosaurio. | 1. caiman |
| 2. Mi tin algo di un pato, pero mi no ta un pato. | 2. |
| 3. Ora mi rabia, mi ta spuit inkt. | 3. |
| 4. Mi ta sinti mi dushi den mi tunnel vertical. | 4. |
| 5. Nos webonan ta blauw, geel y blanco. | 5. |
| 6. Mi tin ocho brasa cortico y dos largo. | 6. |
| 7. Bo ta haya mi banda di riu. Mi ta masha peligroso. | 7. |
| 8. Mi no t'ey mas. Mi a biba hopi tempo pasa. | 8. |
| 9. Mi ta tene webo den mi boca pa nan broei. | 9. |
| 10. Algun di nos tabata mes grandi cu un cas di seis piso. | 10. |

5g Busca e verbo

- Busca e verbo. Puntra y contesta kico e hende, bestia, mata of cos ta haci.

Bichi di candela

1. Ayera nochi mi a *mira* hopi bichi di candela.
2. E animalonan tabata saca luz.
3. Luz color geel berde tabata sali for di nan barica.
4. Algun bichi di candela macho tabata manda señal cu nan luznan.
5. Asina nan tabata cuminda nan amiguitanan.
6. E amiguitanan aki tabata bula leu aya den hofi.
7. Nan tabata contesta cu un otro señal di luz.
8. Di alegria e bichinan di candela macho tabata dal un salto.
9. Despues nan tabata bay mesora cerca nan amiguitanan.



5h Yena e palabra corecto

- Yuda Yasmin y Arnon.
- Lesa e pregunta y yena e palabra cu falta pa duna e contesta.

Yasmin y Arnon

Arnon: "Bo sa con yama e buraconan chikito den bo cuero?"

Yasmin: "Si, eseynan nos ta yama ..."



Yasmin: "Con yama un liña cu ta core di ariba bay abou?"

Arnon: "Un liña asina nos ta yama un liña ..."

Arnon: "Abo sa con yama un liña cu ta core di man robes pa man drechi?"

Yasmin: "Ha, mi sa caba! Esey ta un liña ..."

Yasmin: "Con yama un hol largo cu un animal ta coba pa pasa door di un sero?"

Arnon: "Ay, facil! Un hol largo nos ta yama un ..."

Arnon: "Bo sa con yama algo masha special of algo cu ta un so tin di dje?"

Yasmin: "Con po laga! Nos ta bisa cu esey ta algo ..."

Yasmin: "Tin bestia cu por cambia di color. Con bo ta yama esey?"

Arnon: "Nos ta bisa cu e bestia por ... su mes."


5i Na unda?

- Cua palabra(nan) ta bisa unda hende, animal of cos ta, unda nan ta haci algo of unda algo ta tuma luga?
Irena ta balia den sala. – Unda Irena ta balia? – Den sala.

E pushinan

1. Ivo cu Yanik a haya tres pushi patras di cas.
2. Nan a sconde esakinan bou di nan cama.
3. Ivo cu Yanik a drumi den hamaca.
4. Dos pushi a bay keiro riba dak.
5. E otro pushi a keda den su macutu.





6 Skirbi bon

6f Signo di puntuacion

Bo ta corda?

- Tur frase ta cuminsa cu un letter mayusculo.
- Na final di un frase tin un punto, un signo di pregunta of un signo di sclamacion.
- Awe bo ta siña un signo mas: *coma*.

Bo ta skirbi un *coma* na momento cu bo mester tuma un pauze cortico ora bo ta lesa un frase.

Ehempel

Mike, bo por coy un glas di awa pa mama?
Dushi, bo no a tende mi?
Si bo yuda mi, nos ta keda cla lihe!



- Lesa e frasenan akibou.

1. Cua di nan ta caba cu un punto? Skirbi e numbernan den bo schrift.
2. Cua di nan ta caba cu un signo di pregunta? Skirbi e numbernan.
3. Cua di nan ta caba cu un signo di sclamacion? Skirbi e numbernan.
4. Cua di e frasenan tin un coma? Skirbi e numbernan.

Animal gigante

1. E animal di mas grandi cu a yega di biba riba tera, ta dinosaurio.
2. E no tabata grandi so, pero pisa tambe!
3. Bo tabata sa cu e animal aki tabata pisa mas cu cuater bus?
4. Cua animal ta esun di mas grandi awendia?
5. Riba tera giraf ta esun di mas grandi.
6. E por bira hasta seis meter halto.
7. Esun di mas pisa ta shon olifante.
8. Pero den lama tambe tin animal enorme.
9. Esun cu ta kibra tur record, ta bayena blauw.
10. Bo sa cu e ta e animal di mas grandi y mas pisa na mundo?
11. E no ta bati olifante y giraf so, pero dinosaurio tambe!
12. Su largura por yega trinitres meter.
13. Lengua di e animal gigante aki ta pisa mes hopi cu un olifante!




6g Unda bo ta pone coma?

- Den cua frase bo ta pone un coma?
- Skirbi e frase den bo schrift y pone un coma cu color.

Barica ta gruña

1. Ayayay mi a laga mi baki di pan na cas.
2. Ta con mi ta haci awor?
3. Grrr mi barica ta gruña duro.
4. Por ta mi por haya un snechi cerca mi amiga.
5. Dia el a lubida su baki ami a yud'e.
6. Tur hende por lubida un biaha.
7. Oke mi ta bay puntr'e.
8. Su pan cu awacati y ham a smaak bon!
9. Mañan mi ta bolbe laga mi baki na cas.



6h Busca palabra

- Busca den e cadena di palabra akibou, palabra den forma plural.
- Skirbi e palabranan cu bo haya, bou di otro den bo schrift.
- Despues bo ta skirbi singular di e palabranan den un di dos rij.
- Wak e ehempel prome.

anisbarancananbukistoelnantomatidinosaurionanloempiamamacuentananclabo

barancanan baranca
.....


- Sigui di mes manera.

hanguananvrumingananlolipopmulinanantatananpopchinarrenchiremedinanrembak

sobrinoprimanansolotamareinmispelnanscolnanjuffrouwwortelreyornitorinconan

nanjawfishporionantunnelnanverticalfishifossielnanskeletcarnivorochicotireptiel





1 Scucha y papia

Combersacion

- E siman aki bo ta bay siña hopi di animal cu no a of cu ta existi di berdad.
- Awe bo ta bay papia den kring tocante dragon. Un dragon parece un reptiel. Casi tur dragon tin hala y nan ta scupi candela tambe.
- Abo a yega di mira un cine of lesa un cuenta tocante un dragon? Bo por conta algo di e cine of e cuenta aki?
- Hopi biaha dragon ta cuida un tesoro. E ta percura pa niun hende no por yega mucho cerca. Dicon bo ta kere cu ta un dragon mester cuida tesoro y no un otro bestia?
- Tin dragon cu mas cu un cabes. Kico un dragon cu mas cu un cabes si por cu un dragon cu un cabes no por?
- Den cine y den cuenta no ta tur dragon ta grandi y peligroso. Tin dragon pret y chikito tambe. Abo a yega di lesa un cuenta tocante un dragon asina? Bo por conta e cuenta?

Regla di combersacion

Nos ta sigui caminda e otro a yega.



2 Mi por lesa

Fenix, e parha di solo

Bo a yega di tende di Fenix, e parha di solo? Wel, Fenix ta un parha masha special.

Un mainta hopi tempo pasa Solo a lanta fo'i soño. Poco poco el a habri su wowo y wak rond. Na e momento ey el a mira un parha grandi, masha bunita. E animal tabatin pluma lombrante color cora y geel oro y pluma di rabo masha largo, color cora y blauw. Riba su cabes e tabatin un fronchi grandi color di oro. "Esta un parha precioso", Solo a grita excita. Mesora el a puntra: "Fenix bunita, bo kier bira mi parha? E parha di solo? Si bo bisa si, lo bo keda biba pa semper." Fenix a bira loco di contento, ora el a tende kico Solo a ofrec'e. Mesora el a hisa su cabes y cuminsa canta: "Solo briyante, naturalmente mi kier bira e parha di solo. Tur dia lo mi fluit un bunita cantica pa bo."


Pero pober parha! No ta Solo so tabata hay'e bunita. Semper bay mucha y hende grandi tabata purba di ranca un of mas di su plumanan precioso. "Mi tin cu bay for di e luga aki", Fenix a bisa tristo, dia cu nan a bolbe molestie. "Mi ta bay biba na un luga caminda no tin hende." Na e mesun momento Fenix a habri su halanan y bula bay. El a bula y bula te ora el a yega na un oasis den un desierto. Ey tabatin awa y palo berde cu fruta, pero hende si no tabatin den bisindario. "Aki si mi por biba trankil", Fenix a bisa poco poco, mientras el a cay sinta riba un rama di un palo di dader.

Añanan a pasa. Fenix a biba dushi di dje. Despues di casi cinco shen año Fenix tabata bibo ainda, pero el a bira bieu. Hopi biaha e tabata cansa. E no por a bula dje lihe ey mas tampoco. "Pff, asina si bida no ta dje agradabel mas", el a suspira riba un dia. "Mi kier bira jong atrobe. Bo sa kico, mi ta bay puntra Solo si e por yuda mi." Fenix a hisa su cabes y a fluit su cantica pa Solo. Djey el a puntra: "Dushi Solo, bo por haci mi hoben y fuerte atrobe?" Pero Solo no a contest'e. Su siguiente dia Fenix a bolbe purba, pero atrobe Solo a keda keto. Despues di un siman Fenix a dicidi di bula bay na e luga caminda e tabata biba prome aya. Podise aya Solo por a tend'e miho. Tabata un biahe largo. Fenix mester a sosega varios biaha na caminda, pasobra e tabata suak y bieu. Na cada parada Fenix tabata colecciona yerba y specerij special. E tabata warda nan memey di su plumanan.

Ora cu porfin el a yega na e luga caminda e tabata biba antes, Fenix a traha un neishi grandi den un palo di coco. Den dje el a pone tur e yerbanan y specerijnan cu el a colecciona na caminda. Djey el a busca lijm di un palo y cu ne el a traha un webo di gom y a pone esey tambe den e neishi. Despues el a bay sinta den e neishi y a canta su cantica magico pa Solo. "Solo bunita, bo por yuda mi?", Fenix a puntra ora el a caba di canta. "Bo por haci mi hoben y fuerte atrobe?" Awor si Solo a scucha Fenix. El a manda biento y nubia bay y el a cuminsa kima masha fuerte. Tur animal y hende a core bay sconde den fresco. Ta Fenix so a keda sinta. Diripiente lamper a dal y un vlam grandi

a sali for di e neishi. Fenix a cambia den un bola di candela. Algun minuut despues e candela a paga. Cu e palo di coco y e neishi no a pasa nada, pero Fenix mes a disparce. Den e neishi a keda solamente un serito di shinishi.

Diripiente biento a cuminsa supla y e serito di shinishi a cuminsa move. For di dje un Fenix hoben y mas precioso ainda a lanta. El a hisa su cabes cu su fronchi di oro, habri su halanan di colorman briyante, canta su cantica magico pa Solo y bula bay.



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Con e titulo di e texto aki ta?
2. Ki sorto di texto esaki ta?
Scoge entre:
 A. Un cuenta
 B. Un texto cu ta siña bo algo.
3. Ki sorto di parha Solo a mira riba un mainta ora el a lanta for di soño?
4. Kico Solo a puntra Fenix?
5. Kico Fenix a contesta Solo?
6. Dicon Fenix no tabata gusta cu mucha y hende grandi tambe tabata hay'e bunita?
7. Kico Fenix a dicidi riba un dia?
8. Dicon Fenix por a biba trankil di dje den e oasis den desierto?
9. Despues di cinco shen año Fenix a bira bieu. Bo por splica esey?
10. Kico Fenix a puntra Solo?
11. Dicon Fenix a dicidi di bula bay na e luga caminda e tabata biba antes?
12. Kico Fenix tabata colecciona na caminda?
13. Kico Fenix a traha ora el a yega su luga bek?
14. Solo a scucha Fenix porfin? Splica bo contesta.
15. Den kico Fenix a cambia ora un vlam a sali for di e neishi?
16. Kico a sosode ora biento a cuminsa supla y e serito di shinishi a cuminsa move?
17. Bo ta kere cu Fenix, e parha di solo, a existi di berdad? Splica bo contesta.



4 Vocabulario

E unicornio misterioso

Unicornio ta un animal misterioso. Casi nunca bo no ta top'e. Hopi tempo pasa un grupo di animal si a mir'e. E bestianan aki tabatin e custumber di bebe awa na un lago grandi den un mondi. Ey tur dia nan tabata topa y combersa dushi cu otro. Un cos tabata preocupa e bestianan. Basta dia caba awasero no a cay. Solo tabata kima fuerte. Yerba y mata a perde nan color berde bunita y a bira maron. Hasta yerba shimaron a muri. Tur caminda den pais e rooi-, riu- y lagonan tabata seco. Ta e lago grandi den mondi so tabatin suficiente awa ainda.

Pero riba un dia algo teribel a sosode. Ora mayoria di e animalnan tabata na soño ainda, un colebra falso a sali for di un cueba den bisindario. El a lastra den e yerba seco bay na e lago den mondi. Ora el a yega cant'i awa, el a hisa su cabes. Despues el a spuit un straal di veneno den e awa cristalino. E veneno a keda drif manera azeta. Mes lihe cu el a yega na e lago, e colebra a lastra bay su cueba bek.

Mesora e animalnan cu a mira tur cos sosode, a bati alarma. Di tur banda e bestianan a pura bini na e luga di desaster. For djaleu nan por a hole e veneno. "Dicon Colebra a haci un cos asina?", Coneu a puntra tur tristo. "Pasobra e ta un animal falso!", Yuwana a responde rabia. "Si nos no por bebe awa, nos ta muri sigur!", Ornitorinco a snik spanta.

"Colebra no tin cu nes. E no ta tene cuenta cu ningun otro bestia. E ta un egoista", Avestruz a bisa. "Niun animal no por yuda nos?", Blenchi a puntra un tiki schuw.

"Mi ta bay purba", nan tur a tende un stem bisa diripiente. Na mes momento miles di rayo di solo a ilumina e mondi. Casi e animalnan no por a tene nan wowo habri. Banda di e lago nan a mira un animal misterioso. "Ta Unicornio", Morocoy a bisa pocopoco. E animal bunita a hinca rudia canto di e lago. Poco poco el a hinca su cacho den e awa contamina. El a warda un momento. Despues el a lanta para atrobe. E cacho magico a haci su trabou. E veneno a bay. E awa tabata limpi limpi atrobe. Mesora e animalnan a baha nan cabes y bebe di e awa puro. Ora nan a caba di kita nan sed nan tur a grita hunto: "Un miyon di danki Unicornio!"

Pero esta pica! E animal bunita a disparce di mes manera misterioso cu el a aparece. Straña e bestianan a wak rond. "Unicornio a bin pa yuda nos", Camel, e animal di mas edad, a bisa. "Awor cu nos tur ta salba, e ta sigui su caminda".



1 Casi niun hende no a yega di mira un ...



2 Bo por a mira fondo di e lago. E awa tabata ...



3 Un colebra falso a venena e lago, ora el a spuit veneno aden. E lago a bira ...



4 Colebra ta un animal ... E no ta tene cuenta cu niun otro bestia.



5 Miles di rayo di solo a ... e mondi.



6 E animal ... a hinca su cacho magico den e lago.

Tarea 1

- Kico bo ta yena?
- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

- Un unicornio parece un cabay. Pero tin diferencia si.
- Bo por menciona tres cos cu ta diferente?



5 Pensa bon

5j Cua palabra bo por uza?

- Den cada frase tin palabra cursiva.
- Busca e palabra cu ta nifica mescos cu e palabra(nan) cursiva.
- Skirbi e frase cu e palabra nobo den bo schrift. Bo por scoge entre:

agresivo – ataca – avisa – balente – joyanan – libera – magico – ordena – picha

E prins, e fenix y e dragon

1. Fenix ta *adverti* princesa Alicia cu un dragon kier su prendanan.
2. Princesa Alicia ta sconde su prendanan, pero asina mes e dragon ta *horta* nan.
3. Prins Carlos, un hoben cu *curashi*, ta bay na e cueba di e dragon.
4. E ta *manda* e dragon duna tur cos bek.
5. E bestia *violento* ta rabia masha hopi mes.
6. Mesora e ta *bula* riba e prins.
7. Pero e canto *maraviyoso* di Fenix ta pone e dragon core bay.
8. Fenix ta logra *scapa* e prins.
9. Asina prins Carlos por duna princesa Alicia su *prendanan* bek.



5k Cua palabra bo ta scoge?

- Bisa di cada descripcion cu cua palabra e ta cuadra.
- Skirbi e number di e descripcion y e palabra cu ta pas cu ne.

crystalino – contamina – dragon – egoista – fenix – ilumina – oasis – unicornio

1. Un luga cu ta baña den luz.
2. Un hende cu no ta tene cuenta cu ningun otro hende.
3. Un animal grandi y peligroso cu ta cuida un tesoro.
4. Un tipo di cabay blanco cu un cacho magico na su frenta.
5. Awa limpi limpi.
6. Un parha cu pluma lombrante color cora y geel oro y cu un canto magico.
7. Awa riba cua tin azeta of veneno ta drif.
8. Un luga den desierto cu awa, mata y palo berde.



5l Articulo y sustantivo

- Lesa e siguiente texto cu atencion.
- Despues bo ta pinta dos paraplu den bo schrift. Wak e ehempel akibou.
- Bou di un paraplu bo ta skirbi tur e articulonan cu bo ta haya den e frasenan.
- Bou di e otro paraplu bo ta skirbi tur e sustantivonan.

Articulo

Sustantivo

1. E – un

1. unicornio – cabay – diferencia

E unicornio


1. E unicornio parce un cabay, ma tin diferencia si.
2. E animal bunita tin un cacho magico na su frenta.
3. Te ainda nos no sa si e bestia aki a existi di berdad.
4. E hendenan ta kere cu hopi aña pasa e unicornio tabata biba na e pais Italia.
5. E tempo ey e animal tabata parce un bina mas cu un cabay.
6. Den cuenta bo por lesa cu bo por mira un unicornio ora tin luna yen.
7. Bo mester ta para den cercania di un lago si.
8. Pero te ainda niun hende no a mira e animal misterioso ey.
9. Bo tabata sa cu e unicornio ta simbolo di paz y bunitesa?




5m Ki ora?

- Cua palabra(nan) ta bisa ki ora un cos ta sosode, a sosode of ta bay sosode?
Marno no a landa awe. – Ki dia Marno no a landa? – awe
- Sigui na e mesun manera.

1. Ayera nos a compra dos goudvis.
2. Siman pasa papa a haci e aquarium limpi caba.
3. Tanta Lili lo trece mata di awa otro mañan.
4. Anto diasabra nos ta bay busca cocolishi tambe.
5. Nos lo pone nan mesora den e aquarium.
6. Fin di vakantie tur cos ta cla.





6 Skirbi bon

6i Caba e cuenta

- Aki ta sigui algun frase di un cuenta.
- Skirbi ocho frase mas pa caba e cuenta.
- Caba e cuenta den bo schrift.

E roc y su yiunan

Den un pais leu for di aki tabatin un parha roc.
E parha aki tabata asina grandi cu e tabata tapa solo.
Roc tabata un haragan golos.
Semper e tabata jaag riba hende y bestia.
Cu facilidad e por a hisa dos olifante y bay cu nan.
P'esey tur hende y bestia tabatin miedo di dje.
Roc tabatin su neishi riba un sero.
E hendenan a spanta ora Roc a haya tres yiu mes haragan golos cu nan mama.
Tur mainta Roc tabata bay busca cuminda pa nan come.
Riba un dia ...


6j Alfabet

- Akibou tin palabra cu ta cuminsa cu letter 'e'.
- Pone e palabranan di cada rij tras di otro segun alfabet.
- E di dos letter tambe ta conta.
- E prome rij ta haci caba y bo mester suigi na mes manera.

ea – eb – ec – ed – ee – ef – eg – eh – ei – ej – ek – el –
em – en – eñ – eo – ep – eq – er – es – et – eu – ev –
ew – ex – ey – ez

edad – efecto – elastico – empana – evita

1. era – enano – esaki – ehempel – educacion
2. expres – ehempel – error – etapa – egoista
3. evento – edificio – elastico – eilo – echo
4. ehercito – envelop – Europa – etapa – estuche



6k Lesa y skirbi

- Lesa e frasenan akibou bon.
- Skirbi e palabranan cu tin un color, nechi y sin eror den bo schrift.


1. Un unicornio ta un animal misterioso.
2. E animal a hinca su cacho magico den e lago.
3. E lago tabata contamina cu veneno.
4. Awor e awa ta cristalino atrobe.
5. E prinses a scucha e canto magico di e Fenix.
6. Un dragon feroz a horta su prendanan.
7. Den e cueba e dragon a ataca prins Carlos.
8. Cu ayudo di Fenix prins Carlos a haya su libertad bek.

6l Dictado

6m Skirbi loke bo ta mira

- Wak e plachi akibou.
- Skirbi loke bo ta mira den cinco frase.





1 Scucha y papia

Princesa Andromeda

Hopi aña pasa tabata biba na Etiopia, un pais leu for djaki, un reina cu tabata yama Cassiopea. E reina tabata masha bunita. Su yiu muhe Andromeda tabata mes nechi cu su mama. “Dushi”, e reina a bisa su yiu riba un dia, no tin hende mas bunita cu nos dos.” Nos ta hasta mas bunita cu e nimfanan di lama.”

Awor bo mester sa cu e palacio di e reina tabata construi canto di lama. E nimfanan di lama a tende tur cos. “Ta kico reina Cassiopea ta kere!”, nan a grita indigna. “Ta nos ta esunnan di mas nechi!”

Rabia nan a landa bay cerca Neptuno, nan rey di lama. Ora Neptuno a mira con furioso e nimfanan tabata, e no por a bisa nada otro cu: “Lo mi castiga reina Cassiopea.”

Kico bo ta kere rey Neptuno ta bay haci?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





2 Mi por lesa

Selkie Marina

Na Bara, un isla chikito, tabata biba un piscado. E tabata biba den su casita riba un baranca canto di lama. Ora e tabata riba lama, semper e tabata feliz di dje. Pero anochi den su casita e tabata sinti su mes solitario.

Un atardi ora e piscado tabata sinta den su veranda, el a tende un cantamento. Asombra el a wak rond. Den esey el a descubri algun mucha muhe bunita canto di lama. Nan tabata canta y balia. Sorprendi e piscado a keda wak nan. Nunca di su bida e no a mira mucha muhe nechí asina. Banda di un baranca caminda e mucha muhenan tabata balia, el a mira cuero di cacho di awa. Un rato e piscado a keda pensa. Despues el a murmura: “Mi sa caba. Ta selkie boso ta. Boso ta cacho di awa cu por transforma boso mes den hende.” El a puntra su mes: “Kico lo pasa si mi bay cu e cuero di un di nan?” Un rato despues e piscado a baha bay canto di lama y el a coy un di e cueronan shinishi lombrante di cacho di awa.

Prome e mucha muhenan no a ripara nada. Pero ora e piscado tabata subi e baranca pa bay su cas bek, nan a descubrie. Tur spanta nan a core bay coy nan cuero. Mientras nan tabata bula den lama, nan a cambia bira cacho di awa bek. Ta Marina, un di e mucha muhenan, so a keda canto di lama. Niun caminda e no tabata mira su cuero. E tabata snik

sin niun hende ripara. E no tabata sa kico e mester a haci. Ora e piscado a tende Marina yora, el a bay cerca dje. “No yora, mucha bunita”, el a bis’e. “Mi tin bo cuero. Mi ta priminti bo, cu bo ta hay’e bek aki shete aña, si bo casa cu mi.” Un par di dia despues Marina y e piscado a casa. Despues di un aña nan a haya un yiu homber masha lief mes. Nan tabata feliz. E yiu tabata stima su mama masha. Semper Marina tabata canta cantica p’e. E canticanan tabata bunita, pero nan tabata un tiki tristo tambe.

Despues di shete aña Marina a pidi e piscado su cuero bek. Pero e pober homber tabatin asina tanto miedo di perde su casa, cu e no tabata kier a bisa Marina na unda el a warda e cuero.

Un mainta ora Marina y su yiu tabata na cas, mal tempo a forma. A dal un strena y lamper tabata corta. Biento tabata supla duro. E bentananan di e casita riba e baranca tabata sacudi bay bin. Pero diripiente a bira keto. Un rato despues nan a tende un zonido masha duro mes. For di blafon algo a cay bin abou. Tabata e cuero di Marina. “O, mi amor”, Marina a bisa su yiu, “awor mi tin cu bay lama bek.” Na e mesun momento Marina a hisa su yiu y a core bay pafo cu ne. Hunto nan a bula den e lama blauw. Nan a landa bay na un cueba bou di awa caminda Marina su famia tabata biba. Henter famia tabata loco di contento ora nan a mira Marina y su yiu.

Ta pica si cu e yiu no por a keda mucho largo bou di awa, pasobra e tabata mita cacho di awa y mita hende. Despues di un par di ora Marina y su yiu mester a landa bay bek na e costa caminda cas di e piscado tabata. Ey Marina a hisa su yiu pone riba un baranca. El a dun’e un

sunchi tierno. Djey el a bis’e: “Bay cerca bo tata, mi yiu. No bira tristo. Mi no ta bay laga bo. Ora bo mester di mi, bo ta djis canta un di e canticanan cu mi a siña bo. Anto lo mi bin mesora.” Y esaki a sosode tambe.



3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Ki sorto di texto esaki ta?
Scoge entre:
 A. Un cuenta
 B. Un texto cu ta siña bo algo.
3. Kico a pasa un dia ora e piscado tabata sinta den su veranda?
4. Kico e piscado a bisa ora el a mira e cueronan?
5. Con e reaccion di e mucha muhenan tabata ora nan a mira e piscado?
6. Dicon Marina tabata yora asina?
7. Kico e piscado a bisa Marina?
8. Ki sorto di cantica Marina tabata canta pa su yiu?
9. Dicon e piscado no kier a duna Marina su cuero bek?
10. Kico a sosode riba un dia ora tabatin mal tempo?
11. Kico Marina a haci ora el a haya su cuero bek?
12. Dicon e yiu no por a keda mucho largo bou di awa?
13. Kico Marina a bisa su yiu ora el a hib’e cas bek?
14. Kico ta e parti no real di e cuenta aki?



4 Vocabulario

E mundo misterioso di lama

Segun leyenda, cuenta hopi bieu, selkie ta biba den lama cu ta rondona e isla chikito Bara. Den awa selkie ta un tipo di cacho di awa masha special. Nan cuero ta fini manera seda. Cada tanto tempo, hopi biaha ora luna ta yen, tin selkie ta bin canto. Nan ta kita nan cuero y transforma nan mes den hende.

Un mucha muhe selkie mester tene cuidou si. Si un piscado of un mucha homber haya su cuero, e tin cu casa cu ne. Maske e ta casa, lama ta keda yama e selkie semper. Si riba un dia e haya su cuero bek, lo e bistie y drenta lama sin bolbe tera nunca mas.

Si cualke dia bo mira un cacho di awa hunga cu mucha den lama, ta posibel cu e ta un mama selkie cu a bin wak con ta cu su yiunan.

Segun otro leyenda tin hada di awa tambe den lama y lago.

Un hada di awa tin hala y e tin un cuero color di lama. Hada di awa ta masha cariñoso.

Un otro criatura di lama ta e nimfa di awa. Nimfa di awa ta bunita y nan tin un stem precioso. Tin barco cu a dal den baranca, pasobra e capitan tabata scucha e cancion bunita di un nimfa en bes di paga tino unda su barco tabata nabega.

Tambe tin hopi leyenda y pelicula tocante sirena y triton. Sirena y triton tin curpa di mitar hende y mitar pisca.

Nan tin cara, cabey, pecho y man, pero nan no tin pia.

Nan tin un rabo mescos cu di pisca pa nan por move cu ne. Sirena ta muhe y triton ta homber.

Abo a yega di lesa un cuenta of mira un pelicula tocante sirena y triton?



1 Un ... ta un cacho di awa special.



2 Ora un selkie ... su mes e ta cambia den hende.



3 Un ... su cuero tin color di lama.



4 ... no ta bunita so, nan tin un bos precioso tambe.



5 ... tin un curpa di mitar hende y mitar pisca.



6 ... tin cara, cabey, pecho y man, pero e no tin pia. Su rabo ta manera di pisca.

Tarea 1

Kico bo ta mira?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

- Purba splica kico ta e diferencia entre un hada di awa y un sirena.

Tarea 3

Bo sa e contesta?

- Cua di e palabranan no ta pas den e rij?
Skirbi e palabranan den bo schrift y marca un circulo rond di e palabra cu no ta pas.

- canta, ladra, nimfa di awa, bunita
- hala, rabo di pisca, triton, lama
- selkie, bula, cuero, transforma
- hada di awa, hala, blauw, cacho di awa

• hada di awa


• nimfa di awa

• selkie

• sirena

• transforma

• triton



5 Pensa bon

5n Con sirena Nina ta sinti su mes?

- Den cua di e frasenan akibou bo por lesa con sirena Nina ta sinti su mes?
- Skirbi number di e frasenan ey y skirbi con Nina ta sinti su mes.

- | | |
|--|--------------|
| 1. Sirena Nina ta sinti su mes solitario. | 1. solitario |
| 2. E ta sinta basta rato riba un baranca. | |
| 3. Nina ta warda su amiganan sirena. | |
| 4. E ta preocupa. Unda nan a keda? | |
| 5. Despues di mey ora Nina ta bira tristo. | |
| 6. E ta kere cu su amiganan a lubid'e. | |
| 7. Pero diripiente e ta mira amigo dolfijn. | |
| 8. E ta bin busca Nina pa hib'e cerca su amiganan. | |
| 9. Nina ta hari; awor si e ta contento. | |



5o Kico bo ta yena?

- Den cada frase falta palabra.
- Busca e palabra(nan) cu falta y skirbi e palabra(nan) den bo schrift.
Bo por scoge for di:

barigonchi – cabay di awa – casca – pisca – rabo – snuit

Cabay di awa, un bestia precioso

1. Un ... ta biba den lama.
2. Na momento cu bo mir'e, bo ta kere prome cu e ta un ...
3. Su cabes cu e ... plat ta laga bo pensa riba un cabay.
4. E tin un ... gekrul y un ...
5. Su ... ta duro, p'ese y hopi pisca no por com'e.

cameleon – curpa – mata di lama – stret – wowonan

6. Un cabay di awa ta landa cu su curpa ...
7. Manera un ... e por cambia di color.
8. Cu su rabo e cabay di awa por gara tene su mes na ...
9. E cabay di awa por drey su ... separadamente.
10. Asina e no mester bira su ... completo.



5p Traha un frase largo

- Traha cu dos frase cortico un frase largo.
- Scoge un di e palabranan for di e rij na banda. Wak e ehempel prome.

- | | |
|---|--------------------|
| 1. E selkie kier bay lama bek. E no por haya su cuero. | tanten (cu) – pero |
| <i>E selkie kier bay lama bek, pero e no por haya su cuero.</i> | |
| 2. Kendra no a practica. E no por bay toca piano. | p'ese y – ma |
| 3. Brenda tin un charla. Carlos tin un presentacion. | y – pasobra |
| 4. Mami ta pone su celular na silencio. E ta den un reunion. | ora (cu) – aunke |
| 5. Randy no ta bay leu for di costa. E ta un bon landado. | maske – pero |
| 6. Quin kier bay Sea Aquarium na Corsou. E no tin placa. | pa – aunke |
| 7. E capitan a bira e barco. El a mira e monster di awa. | si – asina (cu) |

5q Verbo

- Aki ta sigui algun frase. Busca e verbo.
Puntra y contesta kico e hende, bestia, mata of cos ta haci.




Bently y Sereto

- | | | |
|--|----------------------|------|
| 1. Bently ta come tur su cuminda. | Kico Bently ta haci? | come |
| 2. Despues e ta bay canto di lama. | | |
| 3. Bently ta supla riba su sinfonia di boca. | | |
| 4. Asina e ta yama su amiga Sereto, un selkie. | | |
| 5. Un rato despues Sereto ta bin cerca dje. | | |
| 6. Sereto ta conta di e bida misterioso bou di lama. | | |
| 7. Semper Bently ta scucha cu atencion. | | |
| 8. Despues Sereto ta despedi di Bently. | | |
| 9. Sereto ta zwaai cu su rabo. | | |
| 10. Djey Bently ta bay su cas bek. | | |

* Contesta di charadanan 5e

1. E sombra di un dinosaurio
2. Bon dia, bon dia, bon dia





6 Skirbi bon

6n Coregi e texto

- Den e texto akibou falta mayusculo, punto, coma, signo di pregunta y signo di sclamacion.
- Coregi e frasenan y skirbi e texto completo den bo schrift.

monster di lago

bo tambe ta kere cu tin monster gigante ta biba den algun lago tin hopi hende cu ta bisa cu nan a yega di mira un monster asina toch nunca niun hende no a logra di coy un di nan bo a yega di tende di nessie of e monster di loch ness e ta e monster di mas famoso nessie ta biba den un lago na un pais leu for di nos isla: escocia nan ta bisa cu nessie ta sigur 15 meter largo e tin un bulto riba su lomba un garganta largo y un cabes chikito tin hende ta bisa cu nan a saca potret di nessie bo ta kere cu nessie ta existi di berdad



6o Traha un strip

- Skirbi e palabra *monster di awa* memey riba un blachi den bo schrift.
- Skirbi otro palabra acerca cu tin di haber cu e palabra monster di awa.
- Purba traha frase cu e palabranan cu bo a skirbi.
- Cu e frasenan bo ta traha un cuenta cortico.
- E cuenta ta bira un strip. Pinta seis hoki.
- Den cada hoki bo ta skirbi un frase y bo ta pinta algo cu tin di haber cu e frase.
- Ora bo caba, bo ta kleur e pinturanan.
- Awor bo strip ta cla.



7 Tarea varia

7a Cua palabra bo ta scoge?

- Bisa di cada splicacion cu cua palabra e ta cuadra.
- Skirbi e number di e frase y e palabra cu ta pas cu ne.



barigonchi – cacho di awa – cameleon –
monster – patronchi – selkie – sirena

1. Un lagadishi cu por cambia di color pa hende of bestia no mir'e.
2. Un barica gordo.
3. E ta un mamifero cu hala. E ta biba den lama. E ta ladra manera cacho.
4. E ta biba den lama. E tin un curpa di mitar hende y mitar pisca.
5. Un bestia of un hende spantoso.
6. Adorno cu ta consisti di figura chikito manera strepi, bala bala of flor.
7. Un cacho di awa cu por cambia bira hende.

7b Busca e diferencia

- Busca e diferencia chikito entre frase a y frase b.

- 1a E nabegantenan gusta conta cuenta di monster di awa.
- 1b Un nabegante gusta conta cuenta di monster di awa.

- 2a Un secat gigante por parti un barco na dos.
- 2b Un secat gigante por kraak un barco na dos.

- 3a E selkie a haya un amigo nobo.
- 3b E selkie a haya un enemigo nobo.

- 4a Algun pisca gusta biba den awa dushi.
- 4b Algun pisca gusta biba den awa sushi.

- 5a Tin un palo halto den nos cura.
- 5b Tin palonan halto den nos cura.





1 Scucha y papia

Combersacion

- Awe ta bay papia den kring tocante *Fiesta di Luz*. Aki na Aruba ta Pasco di Nacemento ta nos Fiesta di Luz.
- Dicon nos ta yama Pasco di Nacemento Fiesta di Luz?
- Riba cua fecha ta celebra Pasco di Nacemento?
- Con nos ta celebra Pasco di Nacemento? Conta di nos costumernan di cuminda, adorno y tocamento riba e dia ey.
- Na nos pais bisña, Venezuela, tambe Pasco di Nacemento ta un Fiesta di Luz. Nan tin varios custumber mescos cu nos. E tradicion di aguinaldo y gaita a pasa di Venezuela pa nos. Bo por splica kico ta aguinaldo y gaita?
- Na Merca nan ta come calacuna y pudin special dia di Pasco. Santa Claus ta parti regalo. Bo sa unda e ta pone e regalonan?
- Con partimento di regalo ta sosode cerca nos?

Regla di combersacion

Nos ta tene nos mes na e topico.



2 Mi por lesa

Historia di nos kerstboom



Den temporada di Pasco hopi hende tin un kerstboom den nan sala. Casi semper ta un pino. Nos ta dorna e palo cu luz blanco of di color, bala colorido, cabey di angel, strea y otro adorno chikito. E kerstboomnan ta yega nos isla den container grandi for di paisnan friu.



E custumber pa dorna un kerstboom no tabata existi algun siglo pasa. E nabegantenan di tera friu si tabata dorna e mast di nan barco cu taki berde di palo di pino. Asina nan kier a mostra cu nan tabatin deseo di ta na cas pa celebra Pasco.



E prome kerstboomnan a aparece den misa basta tempo pasa. Nan tabata uza nan como decoracion ora tabatin presentacion religioso. E kerstboomnan ey no tabata dorna cu bala y luz colorido, pero cu appel.



Segun tempo a pasa, a cuminsa mira kerstboom den cas di hende tambe. Awendia bo por cumpra kerstboom na diferente luga na nos isla. E kerstboomnan ta hole masha dushi mes. Ta pica si, cu e blachinan fini ya ta cay despues di algun dia. Hende cu no gusta esey, por cumpra un kerstboom artificial.



Un kerstboom no ta completo sin bala y luz. No mucho tempo pasa ta bala y luz blanco so bo tabata mira. Awendia bo por cumpra bala y luz di tur sorto di forma y color. Tambe bo por cumpra bala di Pasco pret y hopi otro sorto di adorno. Naturalmente bo mes tambe por traha algo cu bo por colga den kerstboom.



Tur aña e surtido di acesorio di Pasco ta bira mas grandi. Bo por cumpra lampi cu ta cende paga, popchi di Santa Claus cu ta balia y grita hohoho, bela di Pasco cu holo dushi y hopi cos mas. Bo tambe gusta yuda mami y papi dorna cas y kerstboom?

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Ki sorto di texto esaki ta?
Scoge entre:
 A. Un cuenta
 B. Un texto cu ta informa y siña bo algo.
3. Kico ta topico di e texto aki? Esta, kico e texto ta trata? No uza mas cu tres palabra pa duna e topico.
4. Ki sorto di kerstboom mayoria di hende tin den nan cas?
5. Cu kico nos sa dorna nos kerstboom?
6. For di unda e kerstboomnan ta bini?
7. Cua custumber e nabegantenan di tera friu tabatin antes?
8. Dicon nan tabatin e custumber ey?
9. Na unda e prome kerstboomnan a aparece?
10. Con nan tabata dorna e kerstboomnan ey?
11. Na unda bo por cumpra kerstboom riba nos isla?
12. Kico ta un tiki fastioso di un kerstboom cu ta bin for di naturalesa?
13. Cua ta e otro diferencianan cu tin entre un kerstboom di berdad y un kerstboom artificial?
14. Tur aña e surtido di acesorio di Pasco ta bira mas grandi. Kico asina bo por cumpra?
15. Ki sorto di adorno bo ta uza pa dorna kerstboom na cas?



4 Vocabulario

Fiesta di Luz

Juffrouw Claire ta laga su klas sinta den kring. “Awe mi ta bay conta boso di celebracion di dos diferente Fiesta di Luz”, e ta bisa.

“E prome ta e fiesta Divali di e Hindunan. Na nos isla tambe ta biba Hindu. Nan ta celebra nan Fiesta di Luz, Divali, fin di october, cuminsamento di november. E fiesta ta dura cinco dia.

Riba e prome dia tur hende ta limpia nan cas. Despues ta dorna cas. Tur caminda ta pone vaas cu flor colorido. Atardi ta cende lampi y bela festivo den tur camber.

Anochi famia y amigo ta bini hunto. Prome nan ta bay resa den tempel of nan ta resa na cas mes. Ey tin un altar di cas, esta un luga special drecha caminda bo por sinta resa.

Despues ta parti cos dushi y arepa cu sucu. Hende grandi y mucha ta haya regalo. Tin contamento di cuenta, cantamento y baliamento. Mucha por keda lanta te laat.

Pa e Hindunan Divali no ta solamente Fiesta di Luz, pero tambe e fiesta di suerte y paz.”

“Hm, ta parce mi un fiesta hopi dushi”, Tirza ta bisa. “Si”, juffrouw Claire ta contesta, “pero ainda tin mas.

Na nos isla tin Hudiu tambe. Nan tin nan mes Fiesta di Luz, Hanukkah. E fiesta aki ta dura ocho dia.

Ora e Hudiu ta celebra Hanukkah, nan ta recorda cu hopi aña pasa un milager a tuma luga na nan pais, Israel.

Un dia enemigo di Hudiu a drenta den snoa, esta e misa di Hudiu. E malechornan a kibra parti di e misa. Den e snoa tabatin un lampi di azeta masha special. Semper e tabata cendi. E lampi ey nan a paga. E Hudiu tabata furioso. Nan a logra saca e enemigo for di e snoa y for di e pais.

Despues nan a reconstrui e snoa. Ora e misa tabata cla, e lampi a haya un luga masha special. Mesora e Hudiu kier a cende e lampi. Pero esta un susto. E momento ey nan a ripara cu ta un tiki azeta di lampi so a sobra. Manera un milager e lampi a cende toch y a keda cendi ocho dia largo. Asina tabatin basta tempo pa traha mas azeta di lampi. For di e dia ey tur aña na december Hudiu ta celebra e milager di e lampi. Ocho dia largo ta cende tur dia un bela di un candelaber special, e hanukiah. E di ocho dia tur bela ta cendi.

Durante Hanukkah Hudiu ta resa y nan ta canta cantica. Mucha ta haci tur sorto di wega y nan ta hunga cu un trom special, e dreidel. Tambe tin partimento di regalo y comemento di cos dushi.

Durante e dianan alegre aki tur hende ta contento y feliz.”


Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

- Bo sa e diferencia?



Divali ta e ... di Hindu.



Hopi Hindu tin un ... caminda nan por sinta resa.



E misa di Hudiu nos ta yama sinagoga of ...



Hanukkah ta fiesta di e Hudiu pa celebra e ... di e lampi cu a keda cendi.



Un ... ta un candelaber special cu ta uza pa celebra e fiesta Hanukkah.



Dia di Hanukkah mucha ta hunga cu un trom special, e ...

- Pasco di Nacemento, Divali y Hanukkah tur tres ta Fiesta di Luz. E fiestanan parce otro un tiki. Toch tin diferencia grandi. Bo por nombra algun?

Tarea 3

Un dreidel ta un trom. E palabra dreidel kier men: *pa drey*. Riba e trom

special aki tin cuater letter. Ta e prome letternan di e palabranan: *Nes gadol haja sjam*. Esey kier men: “Aya (na Israel) a sosode un milager grandi.” Hopi mucha Hudiu ta hunga cu un dreidel durante e fiesta di Hanukkah.

- Abo tin un wega special cu bo gusta hunga den dianan di fiesta? Ta cua wega? Splica con e wega ta.



5 Pensa bon

5a Verbo

- Nos tin nomber pa palabra cu ta bisa kico un hende, bestia, mata of cos ta haci. Un palabra asina nos ta yama un *verbo*.

- Lesa e ehempel akibou.

Iris a bay Fiesta di Luz. Kico Iris a haci? *bay*

- Aki ta sigui algun frase.

- Busca e verbo. Puntra y contesta kico e hende, bestia, mata of cos ta haci.



Loi Krathong

1. Na Tailandia tambe hende ta celebra Fiesta di Luz.
2. Nan a duna nan fiesta e nomber Loi Krathong.
3. Tur hende ta traha un boto chikito di blachi di banana.
4. E Tailandesnan ta yama un boto asina un krathong.
5. Den e boto nan ta pone un bela, tres palito di sencia y flor.
6. Riba cierto dia tur hende ta bay riu cu nan boto.
7. Na caminda nan ta canta e cantica Loi Krathong.
8. Canto di awa nan ta cende nan bela y e palitonan di sencia.
9. Caba tur hende ta baha nan krathong na awa den riu.
10. E botonan ta balia contento riba e olanan chikito.
11. Despues nan ta drif bay.
12. Ken su krathong ta yega mas leu?
13. Ken su bela ta paga ultimo?
14. E bela cu keda cendi mas largo, lo trece hopi suerte pa bo den e siguiente aña.



5b Palabra componi

- E siguiente palabranan ta consisti di dos diferente palabra.
- Skirbi e dos palabranan cu a uza.

Ehempel: wantalodo → wanta – lodo

- | | | |
|----------------|--------------|---------------|
| 1. spantaparha | 4. awasero | 7. bonbini |
| 2. tapadera | 5. palofriu | 8. kibrahacha |
| 3. pandushi | 6. salbabida | 9. dalbay |



5c Cua palabra bo ta scoge ?

- Scoge e palabra corecto.
- Skirbi e frase den bo schrift.

altar di cas – dreidel – felicidad – Fiesta di Luz – Hindu – Hudiu – ilumina – candelaber – milager – palito di sencia – regalo – Tailandia

1. Masha hopi pais ta celebra un tipo di ...
2. E pueblo ... ta celebra e fiesta Hanukkah.
3. Durante e fiesta aki nan ta recorda un ... cu a sosode.
4. Nan ta cende bela di un ... special, un hanukkiah.
5. Mucha ta hunga cu un ..., esey ta un sorto di trom.
6. Tur hende ta haya ...
7. Fiesta di Divali ta celebracion di ...
8. Famia ta bay resa den tempel of na e ...
9. Bela y lampi festivo ta ... tur cas.
10. Na ... e fiesta Loi Krathong ta esun mas conoci.
11. Riba un krathong ta pone flor, cende bela y ...
12. Mas largo e bela keda cendi, mas ... bo lo tin den e proximo aña.




5d Zonido

- Tin palabra special pa cierto zonido.
- Por ehempel: E porta a dal cera, *bram*.
- Lesa e siguiente frasenan y scoge e zonido corecto.

1. E mucha a bebe awa pura pura, ...
2. Den e parada tur hende a keda ... ta lastra bay.
3. Henter dia mi ruman ta kauw ijs ...
4. Mama a laga e tapadera di wea cay abou ...
5. Riki a bula den lama ...
6. E donderbos cu mi tata a cende a zona ...
7. Den anochi mi a spanta ora e porta a habri ...
8. Tur stoel poni riba otro a cay abou ...

budum
bragadam
djublum
glu glu glu glu
krsh krsh krsh
kneeeee
pangalan
sha sha sha





6 Skirbi bon

6a Completa palabra

- Lesa e siguiente frasenan y yena e letternan corecto.
- Skirbi e palabra completo den bo schrift.

Pasco, Fiesta di Luz

1. Na Ar...b... tur aña ta celebr... Pasco, Fiesta di Luz.
2. Grandi y chikit... ta des... otro Bon Pasco.
3. Na var...s luga bo ta tende musica di ag...naldo.
4. Ta r...na un amb...nte formidabel riba nos isla.
5. Tur caminda tin kerstboom nechi d...n...
6. Mi tata ta drecha pes...br...
7. Den cur... nos ta colga luz di col...r.
8. Mama ta prepara a..aca y h...m.
9. Pasco cas ta yen di bish...t...
10. Mare tur d... ta Pasco.



6b Skirbi un e-mail

- Bo ta bay organisa un Fiesta di Luz.
- Manda un e-mail pa e muchanan cu bo kier invita.
- Lesa e carta di Anchi pa Tatiana bon, prome cu bo cuminsa.

Aruba, 15 di december

Tatiana con ta bay,

Diasabra, dia 29 di december mi ta organisa un Fiesta di Luz.

E fiesta ta cuminsa 6 or di atardi.

Na e fiesta nos tur ta bay traha lanterna.

Despues nos ta dorna cura cu e lanternanan.

Nos ta bay fiesta dushi den cura.

Corda cu mi ta warda bo.

Cumindamento,

Anchi



6c Traha un kalender di fiesta pa henter aña

- Bo ta bay traha un kalender pa bo nota e fiestanan di aña.
- Di bo juffrouw of meneer bo ta haya blachi cu nomber di e lunanan y e dianan.
- Traha un pintura cu ta cuadra cu e luna.
- Yena bo dianan di fiesta.
- Wak e ehempel prome.
- Ora bo kalender ta cla, bo por niet e blachinan na otro.




december	
1	17
2	18
3	19
4	20
5	<i>Fiesta di San Nicolas</i>
6	22
7	23
8	24 <i>Bispo di Pasco</i>
9	25 <i>Pasco di Nacemento</i>
10	26 <i>Di dos dia di Pasco</i>
11	27
12	28
13	29
14	30
15	31 <i>Bispo di Aña Nobo</i>
16	



6d Charada

- Cuanto regalo Sinterklaas por pone den un saco bashi?
- Wak na pagina 163 si bo contesta ta bon.





1 Scucha y papia

Fiesta di lampion y baile di dragon

Awe ta bispo di Aña Nobo. Yuk Min ta loco di contento, pasobra mañan ta Aña Nobo.

Aña Nobo Chines ta cuminsa fin di januari of comienso di februari. E fiesta di Aña Nobo ta dura 15 dia largo.

Yuk Min su shimis cora nobo ta riba cama ta warda ora yega pa bistie. E color cora ta representa suerte, alegria y felicidad.

Papa a cumpra diferente vaas pone den sala y a hinca flor colorido den nan.

Mama a zorg pa bari cas limpi limpi di porta dilanti te porta patras. Ora Yuk Min a hera trapa den e sushi, mama a bis'e: "Wak bon unda bo ta cana, mi yiu. Bo ta kita nos suerte si bo trapa den e sushi."

Cas ta hole dushi, pasobra tur caminda tin palito di sencia cendi. Yuk Min gusta sencia cu ta hole hasmin mas cu tur otro.

Rond di cas tin repi di papel cora colga cu bon deseo pa e aña cu ta bay cuminsa.

Prome cu meyanochi Papa ta cera tur bentana y porta.

Ta dicon papa ta cera tur bentana y porta?
Con Yuk Min lo celebra Aña Nobo?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





2 Mi por lesa

E mucha muhe cu e penchinan di suafel

Leu for di aki, den un pais masha friu, un tempo tabata biba un mucha muhe chikito masha cariñoso. Aña tabata cerca di caba. Tabata bispo di Aña Nobo. Sneeuw tabata cay y a cuminsa bira scur.

Den e frialdad y scuridad ey e mucha muhe pober y chikito aki tabata cana cabes sunu y pia abou riba caya. Ora el a sali for di cas, e tabatin slof na su pia. Pero el a perde nan ora el a crusa caya, pasobra e mester a core pa un kitrin cu tabata bin masha duro mes.



Asina ta cu e mucha tabata cana sin slof. Su pianan tabata cora y blauw di e friu teribel cu tabata haci. Den su lantera bieu e tabatin un boshi di penchi di suafel warda. Un boshi di penchi di suafel e tabata tene den su man cla pa bende. Henter dia niun hende no a cumpra ni maske ta un penchi di suafel cerca dje. Niun hende no a dun'e ni sikiera un dosplaca.

Tabata un duele pa mira e pobercito mucha. E tabata yen di hamber y tabata tembla di friu. Sneeuw tabata cay den su cabey largo cu tabata krul nechi riba su lomba. E mucha no tabata sa esey mes. For di tur bentana tabata sali luz y dushi holo di gans hasa tabata pone su boca core awa. Un cos so e mucha por a pensa: Awe ta bispo di Aña Nobo.

Den un huki entre dos cas el a haya un bon caminda di sconde pa sneeuw y frialdad. El a cay sinta den e huki cu su pianan bou di dje, pero el a cuminsa sinti mas friu ainda. E no kier a bay cas bek, pasobra e no a logra bende nada di su penchinan di suafel. E no tabatin niun placa pa hiba pa su mama cu tata. Y na cas no tabata nada miho. Nan cas tabata bieu. Biento friu tabata supla pasa den dje manera e kier, maske cu nan a cera e nachinan mas grandi cu pida pida paña cu nan no tabata uza mas.

Casi e mucha no tabatin gevoel mas den su mannan. Asina tanto friu tabata haci. Un penchi di suafel lo por trece un tiki calor, e mucha a pensa. Kico mi haci, coy un penchi y hal'e cende cant'i muraya? Pero e penchinan ta pa bende!



E mes a spanta di su pensamiento. Ta kico su mama cu tata lo bisa si e yega cas sin niun cen chikito?

A pasa un bon rato. Despues e mucha a tuma un curashi y poco poco el a ranca un penchi di suafel saca for di e boshi y cend'e. El a hal'e contra muraya. Rutsh. E suafel a saca un vlam cla y cayente,

manera un bela, ora el a tene su mannan rond di dje. E mucha a mira e vlam para bira un candela dushi cayente. E mucha a rek su pianan pa e keinta nan tambe, pero e vlam di e penchi a paga. El a keda sinta cu un cabito preto den su man.

E cuenta ta continua.

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Ki sorto di texto esaki ta?
Scoge entre:
 A. Un cuenta
 B. Un texto cu ta informa y siña bo algo.
3. Con bin e mucha muhe tabata cana pia abou?
4. Kico e tabatin den su lantera?
5. Kico tabata pone e mucha su boca core awa?
6. Riba kico so e mucha por a pensa?
7. Unda e mucha a bay sconde pa frialdad?
8. Pakico e mucha no kier a bay cas bek?
9. Dicon e mucha no tabatin masha gevoel mas den su mannan?
10. Dicon e mucha mester a tuma un curashi prome cu el a cende un penchi di suafel?
11. Con e mucha a cende e penchi di suafel?
12. Kico a sosode ora e mucha a rek su pianan pa keinta nan?
13. Di ki manera bo por yuda un mucha asina pober?



4 Vocabulario

Delicia di Aña Nobo

Rond mundo hende ta come hopi sorto di cos dushi pa celebra Aña Nobo. Ken sa come suls riba e ultimo dia di december of prome dia di januari? Dicon bo ta trek cara asina? Suls ta traha cu horea di porco, siboyo, promente y binager.

Na Hulanda hopi hende ta come oliebol y tambe beignet di appel. Antes e oliebolnan tabata plat manera cuki. Awendia nan ta rondo manera un bala. Bo tin gana di sa con ta traha beignet di appel? Prome bo ta saca curason di un appel. Despues ta corta e appel na slice rondo y lora nan completo den un mescla di hariña, lechi y sucú. Caba ta hasa e slicenan den azeta.

E Chinesnan no ta celebra Aña Nobo na december, pero na januari of februari. Algo cu tur Chines gusta come Aña Nobo ta niangao. Esey ta un sorto di bolo traha di

aros pegapega y sucú. E bolo ta smaak zoet. Nan ta sirbie den blachi di banana. E Hudiunan nan Aña Nobo tampoco no ta cay den december. E fiesta ta dura dos dia. E prome dia nan ta yama Rosh Hashana. Riba e dia aki nan ta dop appel zoet den honing y com'e. Nan ta desea otro un aña dushi. Tambe nan ta come granatapel, e fruta cu tin yen di pipita ros-cora chikito cu simia aden. E pipitanan ta dushi zoet. Granatapel ta masha importante pa Huidiu. Aña Nobo nan ta desea pa tur hende haci hopi cos bon den e aña cu a habri. Mes tanto cos bon cu tin pipita den un granatapel.

Na e pais Francia, e famianan ta celebra Pasco hunto, pero Aña Nobo si ta un fiesta di amigo. Nan no ta come suls, niangao of appel zoet. Pa nan fiesta nan ta prepara bestia di lama manera pisca, mossel, oester, kreeft y cabaron. Hunto nos ta yama nan seafood. Bo a ripara cu tur hende ta come cos dushi ora un Aña Nobo cuminsa?


1 
Aña Nobo nos gusta come ... y ...

2 
E Hulandesnan ta come hopi ... Aña Nobo.

3 
..., e cos di come traha di appel, tampoco no por falta ora aña bolter na Hulanda.

4 
E Chinesnan ta come niangao Aña Nobo. Esey ta un bolo traha di ... y hopi sucú.

5 
... ta importante pa Huidiu. E fruta ta yen di ... ros-cora zoet.

6 
E Francesnan gusta come un bon sopi di ... Aña Nobo. Den e sopi tin pisca, mossel, oester, kreeft y cabaron.

Tarea 1
Kico bo ta yena?
• Lesa e frase bou di cada plachi.
• Busca e palabra cu falta, den e rij akibou.
• Skirbi e palabra den bo schrift.

Tarea 2
Bo sa e contesta?
• Aña Nobo na Corsou nan ta come salmou di bari. Ta prepara e salmou na un manera special.

Kico ta haci cu e pisca?
• Chines ta traha nan bolo niangao cu aros pegapega.
Con aros ta ora e ta pegapega?

Tarea 3
Aña Nobo e Hudiunan ta desea pa tur hende haci hopi cos bon den e aña cu a habri. Mes tanto cos bon cu tin pipita den un granatapel. Bo por menciona algun cos bon cu bo por haci y cu tin sentido?



- aros pegapega
- beignet di appel
- granatapel
- oliebol
- pipita
- pisca tempera
- seafood
- suls



5 Pensa bon

5e Pasado, presente y futuro

- Tur loke a sosode caba, nos ta yama *pasado*.
- Tur loke ta sosode awor, nos ta yama *presente*.
- Tur loke mester sosode ainda, nos ta yama *futuro*

Ehempel

Aña pasa welita a bini bispo di Aña Nobo for di Surnam. (pasado)

Awe e muchanan ta cende clapchi nan mes. (presente)

Otro mañan nos lo cana den mondi. (futuro)


- Skirbi e palabranan akibou den tres rij.
- Un rij ta pa pasado, un ta pa presente y un ta pa futuro.

actualmente – antayera – awe – awe nochi – awendia – aworaki – aworey – oro – ayera – e aña aki – e siman cu ta tras di lomba – mañan – mas despues – mesora – otro aña – siman pasa – aki rato

5f Cua splicacion bo ta scoge?

- Scoge pa cada palabra e splicacion corecto.

- | | |
|----------------------|--|
| 1. bispo di Aña Nobo | a. e dia despues di Aña Nobo
b. e dia prome cu Aña Nobo |
| 2. lampion | a. un lampi di papel
b. un lampi di glas |
| 3. dragon | a. un monster cu rabo largo. E por scupi candela.
b. un bestia enorme cu parce un lagadishi |
| 4. granatapel | a. un sorto di appel
b. fruta di palo di granatapel |
| 5. suls | a. horea di porco
b. horea di porco cu siboyo y promente den binager |
| 6. seafood | a. bestia cu ta biba den lama
b. cuminda cu diferente bestia di lama aden |
| 7. color bibo | a. color cu ta yama atencion
b. color cu no ta keda bon |



5g Busca e sustantivonan

- Sustantivo ta number di hende, bestia, mata of cos.
- Lesa e siguiente frasenan.
- Busca e sustantivonan for di cada frase y skirbi nan.

Baile di leon

1. Hopi tempo pasa un figura spantoso a aparece na China.
2. El a cuminsa come tur animal y hende.
3. E hendenan mester a core pa nan bida.
4. Niun bestia no por a gan'e.
5. Ta leon so por a scapa nan.
6. E bestia aki a sacudi su lananan y a ataca e figura.
7. Un aña despues e figura horroroso a bolbe bini.
8. Curason di e Chinesnan a hera para.
9. Leon tabata ocupa e biaha aki.
10. E no por a yuda nan.
11. Wel, e hendenan a traha un leon di bambu y di tela.
12. E monster no a ripara cu tabata un disfraz.
13. Awendia tin baile di leon bispo di Aña Nobo.
14. E baliamento aki ta pa core cu tur cos malo.




5h Formula frase di negacion

- Kico bo ta responde riba e pregunta?
- Contesta cu un frase cortico.
- Ehempel: *Bo por fia mi bo pen? No, mi no a caba di skirbi ainda.*

- | | |
|---|---------------|
| 1. Bo sa keda lanta bispo di Aña Nobo? | No, mi no ... |
| 2. Bo a bay busca e buki na biblioteca? | No, mi ... |
| 3. Bo kier celebra Aña Nobo cerca nos? | No, mi ... |
| 4. Bo mama a traha e suls caba? | No, e ... |
| 5. Bo ta ban traha juice di granatapel? | No, mi ... |
| 6. Bo tambe kier un oliebol? | No, mi ... |
| 7. Bo a mira e baile di leon? | No, mi ... |





6 Skirbi bon

6e Cua palabra ta skirbi corectamente?

- Scoge y yena e palabra cu ta skirbi corectamente.

Customber

1. Na ... niun hende no kier keda cas Aña Nobo.
2. Tur caminda bo ta mira y tende banda ... toca.
3. Hopi hende alegre ta ... den e cayanana.
4. Tin ... cos dushi pa come.
5. Na Aruba hende ta ... cas bispo di Aña Nobo.
6. Asina nan kier core cu tur ...
7. Diesdos or ta cende ...
8. ... y donderboos ta zona masha duro.
9. ... di tur sorto di color ta bay laira.
10. Na Hulanda prome di ... tin fiesta di landamento.
11. Mainta den friu ... di hende ta bula den lama.
12. Asina nan kier cuminsa Aña Nobo na un manera ...
13. Nan ta ... ora nan sali for di e awa di ijs.
14. Despues ta come sopi di bonchi bon ...
15. Asina nan ... ta subi bek y bira normal.
16. Cu stoma yen nan ta bolbe cas ...

6f Colg'e den palo

- Na Vietnam, un pais leu for di aki, e hendenan ta planta un palo Aña Nobo. Den e palo nan ta colga papel chikito y colorido. Riba e papelnan chikito nan ta skirbi tur cos bon cu nan kier bay haci e aña cu a habri.
- Bo no ta planta, pero bo ta pinta un palo.
- Den e palo bo ta skirbi tur cos bon cu bo kier bay haci e proximo aña.
- Bo ta pinta e palo di mas bunita di klas?



Surnam – Surname
 musical – musikal
 balea – balia
 sufishente – suficiente
 sencia – siensia
 fuku – fucu
 pakara – pagara
 clapchi – klapchi
 vuurpeil – vuurpijl
 yanuari – januari
 miles – milles
 speshal – special
 bati djente – batidjente
 kayiente – cayente
 tremperatura – temperatura
 satisfecho – statisfecho



6g Carta di Aña Nobo

- Aña Nobo e muchanan di e pais Belgica ta lesa un carta pa nan wela, bisawela y nan mayornan. E carta aki, cu nan mes a skirbi, ta masha bunita dorna. Den e carta e muchanan ta desea nan wela, bisawela y mayornan un aña yen di suerte y felicidad.

- Bo tambe ta skirbi un carta pa bo wela, bisawela y bo mayornan?
- Kico bo ta desea nan?
- Traha un bunita pintura acerca.
- Wak e ehempel prome.



Mi dushi madu, bisawela, mamí y papí.

Cu e carta aki mi kier desea boso

un aña yen di amor,

un aña cu hopi alegria,

yen di salud, suerte y felicidad.

Mi stima boso masha masha hopi mes.

Liza





1 Scucha y papia

Combersacion

- Awe nos ta bay papia tocante Fiesta di Tres Rey. Esaki nos ta celebra dia 6 di januari. Riba e dia aki hende cristian ta recorda e bishita di e Tres Reynan na e Niño Hesus cu a caba di nace. Bo a yega di tende di Fiesta di Tres Rey?
- Na diferente luga na mundo e fiesta aki ta un fiesta di mucha tambe. Na Spaña y Sur America, riba e dia prome cu e Fiesta di Tres Rey, tres rey ta yega riba camel. Ta ricibi nan mescos cu Sinterklaas. Anochi e muchanan ta pone nan sapato. Nan ta pone chuculati aden pa e reynan. Tambe nan ta pone un baki cu awa acerca pa e camelnan. Mainta 6 di januari tur mucha ta haya regalito den nan sapato. Riba e dia aki, e scolnan ta cera y e panaderonan ta traha un pan special.
- Cua fiesta parece bo mas dushi? Nos fiesta di Sinterklaas, Pasco di Nacemento of e Fiesta di Tres Rey? Dicon bo ta pensa esey?
- Na cierto parti na Hulanda grupo di mucha ta pasa cas pa cas dia 6 di januari. Nan ta bisti manera rey. Nan ta tene lampion den nan man y ta canta cantica tipico, special pa e dia aki. Como recompensa nan ta haya mangel of placa.
- E custumber aki ta parece bo dushi? Ta durante cua otro fiesta tambe mucha sa haya mangel ora nan bay canta cas pa cas? Bo sa na cua pais mas ta celebra Fiesta di Tres Rey?
- Bo ta gusta haya regalo? Ki sorto di regalo abo gusta haya?

Regla di combersacion

Si bo kier bisa algo, bo ta hisa dede y warda te ora bo haya turno.



2 Mi por lesa

Continuacion di e cuenta

E mucha muhe cu e penchinan di suafel

El a bolbe hala un palito na e muraya. E palito tabata duna un claridad maraviyoso. Caminda e luz cay, e muraya ta bira transparente. E mucha por a wak den un camber cu tabatin un mesa drecha cu un paña blanco blanco y servies di porcelana fini. Un gans hasa y yena cu pruim y appel tabata manda un holo masha dushi mes. Mas dushi ainda tabata ora e gans a bula for di e hasechi, cay na suela y compañia pa forki cu cuchiu el a yanga bay derechito den direccion di e pober mucha. Pero diripiente e palito di suafel a paga y e por a mira solamente un muraya friu y cera.



E mucha a cende un palito di suafel mas. E biaha aki el a hay'e sinta bou di e kerstboom mas bunita y cu mas adorno. E kerstboom aki el a mira Pasco aña pasa cerca un comerciante rico. Tabatin sigur mil bela chikito y bala colorido colga na e takinan berde. E mucha a rek su mannan pero e ora ey e palito di suafel a paga.

E belanan di Pasco a los bay laira y cambia bira strea. Un di e streanan a cay y laga un strepi largo di candela atras na shelo. "Awor un hende ta bay muri", e mucha a bisa.



Su wela bieu a yega di bis'e: "Ora un strea cay, un alma ta bay shelo." E tabatin masha duele cu welita a muri bay lag'e.

El a bolbe hala un palito cende contra muraya. Den e luz el a mira su wela cla cla para. E tabata radiante y masha cariñoso. "Welita", e mucha a grita, "mi kier bay cu bo. Mi sa cu bo ta desaparece ora e penchi di suafel paga. Bo ta bay desaparece mescos cu e candela, mescos cu e gans hasa y mescos cu e kerstboom grandi y bunita." Pura e mucha a cende e otro penchinan di e boshi, pasobra e tabata kier pa su welita keda. E penchinan tabata duna asina tanto luz cu tabata parece di dia cla. Nunca welita no a muestra asina bunita ni asina grandi. Welita a tene e mucha den su brasa y hunto nan a bula bay halto den laira, radiante y contento.

No tabata existi ni frialdad ni hamber ni miedo mas, nan tabata den shelo ...



Su manece e hendenan a haya e mucha muhe chikito sinta cu un sonrisa riba su cara den e huki entre e casnan. El a muri riba e ultimo dia di aña. E hendenan cu a para mir'e tabata bisa: "E pober. E kier a

keinta su curpa cu e penchinan di suafel." Ningun hende no por a imagina ki cos bunita e mucha a mira y con contento el a cuminsa Aña Nobo den shelo hunto cu su welita.

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico e mucha a mira den e camber caminda tabatin un mesa drecha?
2. Na unda e mucha a hay'e ora el a cende su siguiente penchi di suafel?
3. Kico a sosode cu e belanan di Pasco?
4. Dicon e mucha a kere cu awor

- un hende ta bay muri?
5. Kico e mucha a bisa ora su welita a aparece?
6. Kico e mucha a haci pa su welita no bay?
7. Kico welita a haci?
8. Unda welita y e mucha a bay?
9. Unda e hendenan a haya e mucha su siguiente mainta?
10. Kico e hendenan no tabata sa?
11. Kico bo lo haci si abo no haya un bon luga di sconde pa e friu?



4 Vocabulario

Fiesta di Sucu

Na nos isla ta biba hende cu ta moslim. Un biaha pa aña mayoria di moslim ta yuna un luna largo. E luna ey nan ta yama Ramadan. Durante Ramadan moslim no mag di come of bebe for di ora cu solo sali mainta te atardi ora solo baha. Anochi y marduga si nan por come y bebe.

Mucha y mama cu ta spera un baby, no tin nodo di yuna. Ta importante pa nan si come y bebe suficiente.

Moslim ta yuna pa bira un miho hende. Asina nan ta siña con un hende pober ta sinti su mes ora e tin hamber. Tambe nan ta siña cu bo mester tin pasenshi den bo bida.

Durante Ramadan tur moslim tin mas atencion pa hende pober. Nan ta duna nan paña y cuminda. Tambe nan ta dedica hopi tempo na nan mes famia y amigo. Ora solo baha, famia ta bin cerca otro. Despues di un dia di yuna nan ta come un dadel prome. Esey ta un

fruta di palo di dadel. Of nan ta bebe un glas di lechi. Despues nan ta bay sinta na mesa pa un cena festivo.

Despues di trinta dia ta yega un fin na ramadan. Esey tur moslim ta celebra cu un fiesta cu ta dura tres dia. E fiesta aki yama Fiesta di Sucu. E fiesta yama asina, pasobra nan ta parti y come hopi cos dushi.

Yasser y Salima tambe ta Moslim. Awe, cu ta e prome dia di Fiesta di Sucu, nan ta lanta for di tempran. Nan ta baña y bisti paña nobo. Despues papi y Yasser ta bay moskee. Esey ta misa di Moslim. Ora nan dos ta bek, henter famia ta bay haci un bishita cerca amigo. Nan ta bay cu un macutu yen di cos dushi. Salima ta gusta baklava mas cu tur cos. Esey ta un sorto di bolo traha cu almendra mula cushina cu un tiki awa y hopi sucu.

Durante e dianan di fiesta tur moslim ta extra cariñoso. Nan ta desea otro un Fiesta di Sucu bendiciona. Tres dia largo famia y amigo ta bishita otro, come cos dushi hunto y duna otro algun regalito.

Tarea 1

- Kico bo ta yena?
- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

- Abo lo por tene yuna henter dia? Splica dicon si of dicon no.



E misa di moslim yama ...



Un luna largo moslim no mag di come of bebe for di ... te ...



Ora un moslim keda sin come of bebe, ta bisa cu e ta ...



E trinta dianan cu moslim no ta come of bebe yama ...



E fiesta cu ta pone despues di e trinta dianan di yuna, yama ...



... ta un sorto di bolo traha cu almendra mula.

Tarea 3

- Yasser y Salima ta moslim. Nan religion yama Islam. Tin mas religion na mundo. Bo por menciona algun religion?

Tarea 4

- Splica dicon ta bon cu e Fiesta di Sucu ta dura tres dia so.
- Kico abo gusta come ora bo bay fiesta?



5 Pensa bon

5i Traha frase componi

- Tin cada bes dos frase bou di otro. Pega e frasenan na otro.
- Scoge un palabra for di e serie di palabra pa traha un frase componi.
- Cada palabra bo por uza un biaha so.

ya cu – basta cu – mientras cu – pasobra – pero – p’esey – pues – y

1. Fiesta di Tres Rey ta na honor di tres rey.
Dia 6 di januari mucha ta pasa di cas pa cas bisti manera rey.
2. E muchanan ta tene lampion den man.
Nan ta canta un cantica tipico.
3. E muchanan ta haya mangel y placa.
Nan ta canta cu smaak.
4. Bo por compara e Fiesta di Tres Rey cu e celebracion di Sinterklaas.
Na Hulanda mucha tambe ta haya regalo den nan sapato.
5. Sinterklaas ta yega riba cabay.
E Tres Reynan ta yega riba camel.
6. Durante Ramadan hende grandi ta yuna.
Mucha si por come cu bebe.
7. Tata di Yasser ta come hopi anochi.
Den dia e no mag di come nada.
8. Despues di Ramadan tin cos dushi na granel.
No ta nada straño cu e fiesta yama Fiesta di Sucu.




5j Nificacion contrario

- Den cada frase tin un parti cursiva.
- Cua frase den e di dos rij ta contene un nificacion contrario na e parti cursiva?

- | | |
|---|-------------------------------------|
| 1. Ta celebra e fiesta aki <i>un biaha so</i> . | a. Tin hende cu ta vegetariano? |
| 2. Tabatin cuminda <i>na granel</i> . | b. Tin noot hente den e ayaca. |
| 3. Tur hende ta <i>come carni</i> ? | c. Mi ta bay wak bahada di solo. |
| 4. Pa e bolo ta uza almendra <i>mula</i> . | d. El a yega mainta trempan. |
| 5. E ta lanta cu <i>salida di solo</i> . | e. E fiesta a bira un tradicion. |
| 6. E avion a yega <i>anochi laat</i> . | f. E cuminda a yega net pa nos tur. |

5k Bo tabata sa?

- Lesa e frase y pensa cua palabra mester yena.
- Skirbi e palabranan den bo schrift.



Horizontal, esta di robes pa drechi

4. trinta dia di yuna di moslim
6. fruta cu yen di simia cora zoet

Vertical, esta di ariba bay abou


1. keda sin come y bebe durante un periodo
2. bolo traha cu almendra mula
3. Fiesta di Luz di Hudiu
5. un trom special

5l Ki ora?

- Bisa di cada frase, si e ta tuma luga den pasado, presente of futuro.
- Bisa tambe na cua palabra den e frase bo por mira ta ki ora e ta tuma luga.

1. Antes tabatin mas hende ta core camel.
2. Hopi hende ta haci uzo di auto awendia.
3. E muchanan a pasa di cas pa cas ayeranochi.
4. Otro siman hopi mucha na Sur America ta bay haya regalo den nan sapato.
5. E muchanan na Hulanda a haya regalo di Sinterklaas siman pasa.
6. Mañan Ali lo cuminsa yuna.
7. Awe si e ta come un dushi papaya stoba.
8. Otro luna lo tin Fiesta di Sucu.





6 Skirbi bon

6h Lesa y skirbi

- Lesa e frasenan akibou bon.
- Skirbi e palabranan cu tin un color, nechi y sin fout den bo schrift.

1. Cada fiesta tin su mes **tradicion**.
2. Dia 6 di **januari** mucha ta pasa di cas pa cas bisti manera rey.
3. Nan ta canta cu **lampion** den man.
4. E dia ey ta **celebra** Fiesta di Tres Rey.
5. Durante **Ramadan**, **moslim** no ta come ni bebe nada den dia.
6. Nan ta tene un luna di **yuna**.
7. Despues ta celebra **Fiesta di Sucu**.
8. Durante e fiesta tin cos dushi na **granel**.
9. Pa traha baklava ta uza diferente **ingrediente**.
10. Esun principal ta **almendra mula**.



6i Diktado

6j Chiste

Juffrouw: "Muchanan, cu cua letter ayera ta cuminsa?"

Rebecca: "Cu e letter d, juffrouw."

Juffrouw: "No, Rebecca. Bo no ta skirbi ayera cu un d."

Rebecca: "Pero juffrouw, ayera tabata dialuna toch?"



6k Signo di puntuacion

- Bo ta corda? Tur frase ta cuminsa cu letter mayusculo.
- Na final di un frase tin un punto, un signo di interrogacion of un signo di sclamacion.
- Bo ta skirbi un coma na momento cu bo kier tuma un pauze cortico den un frase.
- Coregi e siguiente texto y skirbi letter mayusculo y signo di puntuacion caminda mester.

Bolo di Tres Rey

tin mayor cu ta traha un bolo dia di fiesta di tres rey den e bolo nan ta hinca un bonchi e yiu cu haya e pida bolo cu e bonchi aden ta rey e dia ey tur hende den cas tin cu haci loke e bisa con bo ta haya e custumber aki bo tambe ta hay'e pret



6l Pinta y skirbi

- Palabra cu ta indica number di hende, bestia, mata of cos nos ta yama **sustantivo**.
- Bo ta bay pinta cinco sustantivo.
- Skirbi bou di cada plachi number di loke bo a pinta.
- Wak e ehempel aki banda.
- Nos tin number pa palabra cu ta bisa kico un hende, bestia, mata of cos ta haci. Un palabra asina nos ta yama un **verbo**.
- Awor bo ta pinta cinco verbo.
- Skirbi bou di cada plachi cua verbo e ta.
- Wak e ehempel aki banda.



6m Chiste

Milan: "Hey, Maik con por ta? Bo tata ta bende sapato, pero bo mes ta cana cu sapato bieu, gasta."

Maik: "Miho bo keda keto. Bo tata ta dentista, pero bo ruman chikito tin un djente so den su boca."





1 Scucha y papia

Haragan golos

“Mama, mama a mira Blacky?”, Yari ta puntra.
“No”, mama ta sacudi cabes. Basta rato pasa e tabata hunga cu un bala den yerba. Pero despues mi no a mir’e mas. Mi no a paga tino tampoco. Ta e slingernan pa e fiesta di Halloween di mañan mi tabata colga.”


Un tiki preocupa mama y Yari ta wak rond. Unda Blacky por a bay? Basta e no a subi caya. Auto no ta tene cuenta cu cacho cu ta crusa caya sin paga tino.

“Ta Blacky boso ta busca?”, papa ta bisa ora e tende mama y Yari yama. “M’a caba di mir’e drumi bou di e palo di kenepa patras den cura.” Mesora Yari ta cana bay den direccion di e palo. “Hey, Blacky, ki mishi bo drumi aki?”, Yari ta puntra.

“Ta cansa bo ta?” Pero Blacky no ta reacciona. E no ta ni hisa su cabes. “Ta malo bo ta?”, Yari ta bolbe puntra.

Blacky ta yora un tiki. Awor si Yari ta spanta. Ta kico a pasa su pober cacho?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.





2 Mi por lesa



Fiesta di tomati La Tomatina

Denny ta hopi exita. Ayera el a yega Spaña cu Mami cu Papi. Tabata un vuelo hopi largo for di Aruba. Awe porfin nan ta bay e pueblecito Buñol. Tio Andreo, Tia Amanda y primo Carlito ta biba eynan. Na Buñol lo tin un fiesta masha special, La Tomatina. Ta un fiesta di tomati. For di tur parti di mundo turista ta bay Buñol pa nan participa na e fiesta aki.

Seis or ya Denny ta baha fo'i cama. Lihe lihe e ta bay baña. Pa seis or y mey ya e ta cla bisti para na Papi cu Mami nan cama. "Nos ta ban awor?", e ta puntra. "Ma mi yiu", Mami ta responde yen di soño, "bo sa con trempan ta awor aki?" Ma Denny no ta move. Papi cu Mami ta hala un rosea grandi, pero nan ta dicidi di lanta numa. Poco rato despues nan ta na caminda pa Buñol. Un ora despues nan ta yega. Asina el a caba di cuminda Tio Andreo y Tia Amanda, Denny ta saca un careda bay pafu cu primo Carlito.

Den mail Carlito ya a skirbie hopi tocante di e fiesta di tomati. Trucknan grandi yena cu tomati, cu no por bende mas, pasobra nan ta mucho hecho, lo core bin na e pueblecito. E trucknan ta basha e tomatinan aki riba un plenchi. Eynan tur hende por coy cuanto tomati cu nan kier pa hunga guerra di tomati. E intencion ta pa tira otro cu tomati.

Denny tin hopi pregunta ainda y cu smaak Carlito ta contesta tur. "Hende grandi tambe por participa?", Denny ta puntra.


"Claro cu si", Carlito ta responde. "Ta ken a inventa e wegá?", Denny kier sa. "E fiesta a cuminsa hopi aña pasa durante un parada. Algun mala mucha a bringa cu otro. Nan a cuminsa tira otro cu tomati. Polis a stop e pelea, pero e hendenan a haya e tiramento cu tomati asina pret, cu tur aña di nobo riba e mesun fecha nan ta tira otro cu tomati cu a hecha di mas. Asina e fiesta a crece bira masha grandi y popular."

"Ki ora nos ta bay?", Denny ta puntra impaciente.

"Asina bo caba di bisti bo zwembroek y un T-shirt bieu", Carlito ta responde. Un rato despues e primonan ta cana bay na e plenchi caminda e actividad ta tuma luga. Papi, Mami, Tio Andreo y Tia Amanda ta prefera di keda cas. Djaleu e primonan ta tende musica. Denny ta mira yen di bentana tapa. Carlito ta splica cu ta pa nan no susha cu tomati. "Un djis e show di vuurwerk ta cuminsa, esey ta señal cu e fiesta ta bay start", Carlito ta splica. "Ban lihe pa nos haya un bon luga."

Diripiente un vuurpijl ta pinta e shelo cora. "Denny, esaki ta e señal pa tira tomati", Carlito ta grita. For di e momento ey tomati ta cuminsa yobe for di tur skina. Denter di un rato di ora tur hende ta sushi y cora di tomati. Riba e plenchi ta forma un piscina grandi di tomati. Tur hende ta landa aden.

"Tremendo!", Denny ta grita, "esaki ta e piscina mas dushi cu mi a yega di landa aden." E primonan ta den nan gloria.



Cu duele nan ta mira cu ta bolbe cende vuurwerk.

E biaha aki ta pa stop e guerra di tomati. Cu yudansa di brandweer ta spuit tur hende kita sobra di tomati fo'i nan curpa. Den un rato di ora e trahadonan di limpieza ta limpia e plenchi y e hanchinan limpi. Ta parce manera no tabatin fiesta mes. Ora nan ta cana bay cas, Denny ta traha su plan caba. Otro aña e ta bolbe pidi Mami cu Papi pa nan bay Spaña. Ya e por participa na e fiesta pret di tomati atrobe.

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Kico ta topico di e texto aki? No uza mas cu tres palabra pa duna e topico.
3. Ki sorto di texto esaki ta?
Scoge entre:
 A. Un texto cu hopi fantasia
 B. Un texto cu ta siña bo algo di un festividad.
4. Na cua pais Denny y su mami cu papi a yega?
5. Unda y cerca ken Denny ta bay awe?
6. Kico tin di haci den e pueblecito ey?
7. Kico Denny ta haci ora e lanta for di soño?
8. Kico primo Carlito a skirbi Denny den mail?
9. Ki sorto di tomati ta basha riba e plenchi?
10. Con e fiesta a cuminsa hopi aña pasa?
11. Kico Denny mester bisti pa bay e fiesta?
12. Dicon yen di bentana ta tapa?
13. Ki sorto di vuurwerk nan a uza pa e fiesta por cuminsa?
14. Kico ta forma riba e plenchi?
15. Con tur hende ta bira limpi atrobe?
16. Ken ta limpia e plenchi?
17. Denny tin plan pa bay Spaña otro aña atrobe. Cu kico asina Denny tin di tene cuenta cu ne?



4 Vocabulario

Seu, fiesta di cosecha

Den cunucu ta planta un cantidad di fruta y berdura. E cunukero ta cuida su mata- y palonan cu masha dedicacion. Den cunucu e ta pone wantomba, esta spantaparha pa core cu parha, lagadishi y otro animal. Ora tur loke tera duna a hecha, doño di cunucu ta cosecha su maishi, pampuna, patia, milon y pinda.

Tocado ta supla riba cacho pa yama tur cu por, bin yuda. Cu sombre bisti of cabes mara ta sali pa cunucu. E trahadonan ta corta tapushi for di e flecha of stengel di maishi cu cuchiu. Ta pone tapushi den macutu y saco.

Mientras trahado, famia y bisña ta corta maishi, tin un grupo ta supla cacho den cunucu. E ritmo di cacho ta yuda dirigi trabou. E cachuleronan ta indica ora tapushi cay of keda atras. Ora tin mester di co'i come of co'i bebe, ta supla pa yama doño di cunucu. Maske solo ta cayente y e trabou ta pisa, e cortadonan ta sigui traha pa trabou caba, pasobra e zonido di cacho ta anima nan.

Ora caba di cosecha, ta stiwa tur fruta di cunucu den mangashina. Den e

Tarea 1

Kico bo ta mira?

- Lesa e frase bou di cada pintura.
- Busca e palabra cu falta, den e rij akibou.
- Skirbi e palabra den bo schrift.

mangashina tin un luga special pa warda maishi. Esey ta e djogodo. Den e baki grandi aki ta pak e maishi. Riba ritmo di cacho e trahadonan ta balia y pak e tapushinan cu nan pia den djogodo.

Ora e mangashina ta bon stiwa, ta pone fiesta di seu. Un cantidad di hende ta bini pa wapa y gosa. Pa toca musica di seu e grupo ta uza tambu, chapi y agan. Tin hende ta wapa contento cu macutu riba cabes yen di fruta y maishi. Otro ta balia cu bandera di maishi den nan man.

Seu ta un fiesta di cosecha. Cu seu ta demostra con agradecido cunukero ta pa awasero, solo y cosecha. Na mes momento ta celebra e cosecha abundante, rico y bunita.

Awendia celebracion di seu na cunucu a bira menos. Pa Corsou no lubida e precioso tradicion, tin un parada nacional di seu tur aña.

Corsou sa celebra seu riba di dos dia di Pasco Grandi. Grupo bisti na trahe folklorico colorido ta balia y canta riba ritmo di seu den caya.

E participantenan ta wapa cu fruta y maishi di cunucu. E parada ta cuminsa mainta den e barrio di Santa Maria y bay caba den Otrobanda. Bo tambe a yega di wak e parada alegre aki na Corsou of na television?

Tarea 2

Bo sa e contesta?

- Kico bo mester haci pa produci zonido cu un cacho?
- Cacho ta un instrumento cu ta uza pa comunicacion. Menciona cuater ocasion cu ta of tabata uza cacho.



1 Na cunucu ta planta fruta y berdura. Ta pone un ... pa spanta parha.



2 Ora tur loke tera duna a hecha, doño di cunucu ta ...




3 ... ta supla riba cacho pa yama tur cu por, bin yuda.



4 E trahadonan den cunucu ta corta e ... di e ... di maishi.



5 Pa toca seu ta uza cacho, tambu, chapi y ...



6 Ora caba di cosecha, ta stiwa tur fruta di cunucu den ...



7 Den e mangashina tin un luga special pa warda maishi, esta e ...



8 Seu ta un fiesta di cosecha na Corsou. Tur aña nan tin un ... nacional.




5 Pensa bon

5m Cua nificacion e expresion tin?

- Busca nificacion di e expresion den e di dos rij.
- Skirbi e expresion y su nificacion banda di otro den bo schrift.

- | | |
|--|--|
| 1. Bo no por planta cu su awa. | a. Bo tin cu traha pa yega na algo. |
| 2. Planta awe pa cosecha mañan. | b. No pidi loke ta imposibel. |
| 3. Loke ta hecho, no por bira berde mas. | c. Bo no por confie. |
| 4. Pampuna no ta pari calbas. | d. Loke bo a haci caba, bo no por deshaci mas. |



5n Traha un frase cerca e plachi

- Tur loke a sosode caba, nos ta yama *pasado*.
- Tur loke ta sosode awor, nos ta yama *presente*.
- Tur loke tin cu sosode ainda, nos ta yama *futuro*.
- Akibou bo ta mira diferente plachi. Traha dos frase na cada plachi.
- Uza e palabranan bou di e plachi pa cuminsa bo frasenan.



1
Luna pasa ...
Awe tardi ...



2
Ayerá ...
Aworaki ...



3
Awor ...
Aworey ...



4
Mañan ...
Aña pasa ...



5
Awe mainta ...
Actualmente ...



6
Awendia ...
E siman cu ta tras di
lomba ...

5o Cua palabra ta pas cu e splicacion?

- Busca e splicacion of e palabra sinonimo cu ta pas cu e palabra.
- Traha e tarea den bo schrift. Haci asina: *un evento – un actividad*

- | | |
|----------------------|--|
| 1. agan | a. stengel |
| 2. djogodo | b. spantaparha |
| 3. flecha | c. fiesta di cosecha |
| 4. cachulero | d. grupo di hende baliando den trahe tipico |
| 5. cosecha | e. cuarto pa warda cos |
| 6. mangashina | f. cabes di maishi |
| 7. parada folklorico | g. tur loke tera ta produci y cu bo por come |
| 8. seu | h. hende cu ta supla cacho |
| 9. tapushi | i. instrumento pa compañía cacho y tambu |
| 10. wantomba | j. baki grandi pa pak maishi aden |




5p Verbo

- Aki ta sigui algun frase. Busca e verbo.
- Puntra y contesta kico e hende, bestia, mata of cos ta haci.

Halloween

1. Dia 31 di oktober nan ta celebra Halloween mas tanto na Merca.
2. Hopi hende ta decora nan cas cu tur sorto di adorno di Halloween.
3. Pa e fiesta aki mucha y hende grandi ta disfrasa.
4. Nan ta coba un pampuna pa traha un lampi.
5. Den e pampuna nan ta hinca un bela.
6. Tur hende ta yama e lampinan di pampuna aki *Jack-O-Lantern*.
7. Anochi tur mucha ta pasa di cas pa cas.
8. E muchanan ta primi bel di porta of nan ta bati na porta.
9. Ora un habitante habri porta, tur mucha ta grita: *"Trick or treat!"*
10. E habitante ta duna e muchanan cos dushi.
11. E muchanan mas grandi ta bay fiesta di Halloween.
12. Nan tambe ta disfrasa pa e fiesta.





6 Skirbi bon

6n Cua palabra ta skirbi corectamente?

Scoge y yena e palabra cu ta skirbi corectamente.

La Tomatina

1. Na ... tin un fiesta masha pret.
2. Ta e ... di La Tomatina.
3. E ta tuma luga den e ... Buñol.
4. E hendenan ta tira otro cu ...
5. Ta tomati cu a sobra y cu ta mucho ...
6. E fiesta ta ... pa autoridad.
7. Tur año hopi ... ta bay Buñol.
8. Nan tambe kier ... na e fiesta.
9. E hendenan tin cu bisti un ... bieue.
10. Ta ... pa bisti un zwembroek of zwempak.
11. Tambe nan mester bisti un ...
12. Ta un ... cu hopi harimento.



Spanja – Spaña – Spania
 festival – fisteval – festeval
 cuidad – ciudad – ciudat
 tomatie – tomate – tomati
 hechu – hiecho – hecho
 permintí – permiti – permeti
 turista – turitsa – toerista
 partisipa – participa – patrisipa
 t-shirt – t-sirt – t-sjirt
 konseha – conseha – consega
 diukbril – duikbrel – duikbril
 actividad – actifidat – actividad

6o Kico bo mester haci?

Fiesta di Halloween ta acercando. Hunto cu tres amigo di barío bo kier organisa un fiesta pa tur mucha den vecindario. Pero prome cu yega asina leu, tin hopi punto pa tene cuenta cu ne.

- Con ta percura pa hopi mucha bin e fiesta?
- Kico e muchanan ta bay haci?
- Kico ta parti pa e muchanan?
- Pa bo fiesta ta un exito bo ta bay traha un plan di fiesta.
- Skirbi tur idea y loke bo mester haci, den bo schrift.

Plan di fiesta

- | | | | |
|-----------------|--------|--------|---------|
| 1. Manda e-mail | 4. ... | 7. ... | 10. ... |
| 2. Traha poster | 5. ... | 8. ... | 11. ... |
| 3. Cumpra ... | 6. ... | 9. ... | 12. ... |



7 Tarea varia

7a Tres rij di palabra

- Traha tres rij di palabra.
- Wak den cua rij cada palabra ta pas.
- Traha e tarea aki den bo schrift.



agan – bela – Buñol – cachulero – cosecha – disfraz – djogodo – duikbril – flecha – hecho – lampi di pampuna – mangashina – mangel – pampuna – parada – plenchi – puree di tomati – tapushi – tira – tomati – treat – vuurpijl – zwembroek

Halloween

La Tomatina

Seu

.....

.....

.....

7b Lampi di pampuna

- Pa e fiesta di Halloween bo mester traha un lampi di pampuna. Akibou tin algun plachi.
- Skirbi cua ta e pasonan pa traha e lampi di pampuna.



Bo mester di ...



Pinta dos ...



Cu un cuchara ...




Bo mester hinca un ...



*** Contesta di charada 6d**

Uno so. Pasobra asina e pone e regalo ey den e saco, e saco no ta bashi mas.





1 Scucha y papia

Combersacion

- Awe bo ta bay papia den kring tocante *secreto*.
- Bo sa kico ta un secreto? Un secreto ta algo cu bo no por of no kier conta un otro hende.
- Bo a yega di tin un secreto?
- Con bo ta sinti bo ora bo tin un secreto?
- Tin secreto cu ta agradabel y tin secreto cu no ta agradabel. Bo por duna ehempel di cada sorto?
- Warda un secreto ta importante. Dicon?
- Ta dificil pa bo warda un secreto? Dicon si of dicon no?
- Si bo sa un hende su secreto, bo por conta un otro hende esey?
- Si bo kier bay conta un hende bo secreto, ken lo bo scoge y dicon?

Regla di combersacion

Mi mester pidi palabra.

2 Mi por lesa

E secreto di futuro

1.



Bo sa cu pa siglonan caba hende ta puntra nan mes ki futuro tin den tapara pa nan?

Nan lo bira feliz of infeliz? Nan lo tin suerte of mala suerte? Nan lo bira rico of nan ta keda pover?

2.



Rond mundo hende ta purba haya sa secreto di futuro.

Nan ta uza signo, carta, bola di cristal, liña den planta di man, piedra precioso y hasta cocolishi pa haya sa e secretonan di futuro.

3.



Hopi siglo pasa ya tabatin mirado di futuro. Nan tabata uza dou of weso di carne pa pronostica futuro di hende, esta bisa con e futuro di un hende lo bira. Pa pronostica futuro di un rey of reina e mirado di futuro tabata uza forma y patronchi di casca di morocoy.

4.



Un mirado di futuro ta pronostica cos cu tin di haber cu amor, salud, scol, rikesa y trabou. E ta mira destino di hende. Na hopi feria tin un mirado di futuro. Hopi biaha ta un gitana. Awendia e ta haci uzo di carta, bola di cristal of e liñanan den bo planta di man.



5.



Ta pret pa bay un mirado di futuro na un feria. Pero no ta bon pa kere tur cos cu e ta pronostica. Kere den tur loke nan bisa bo, ta mescos cu kere den web'i gay. Aunke cu un mirado di futuro ta bisa cu e por mira e secretonan di bo futuro, en realidad e no por. Niun hende no por sa kico ta pasa den futuro. Esey ta keda ... un secreto.

6.



Ta posibel pa pronostica futuro di nos isla of mundo si? No, esey tampoco no por. Aunke cu esaki ta depende pa un parti si, con nos ta trata nos mundo awe.

Nos no sa kico futuro lo trece pa nos. Esey ta keda un secreto. Na e mesun momento e idea ey ta fascinante tambe, of no?

! Tur texto ta trata di algo.
Nos ta bisa cu tur texto tin un
● *topico*.

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Kico ta topico di e texto aki? Esta, kico e texto ta trata? No uza mas cu tres palabra pa duna e topico.
3. Kico e hendenan for di temponan antaño tabata puntra nan mes?
4. Kico hende ta uza pa haya sa secreto di futuro?
5. Kico mirado di futuro tabata uza antes?
6. Completa e siguiente frase. Si bo pronostica algo, bo ta bisa ...
7. Kico mirado di futuro tabata uza pa pronostica futuro di un rey of reina?
8. Kico asina un mirado di futuro ta pronostica?
9. Ki sorto di hende ta pronostica bo futuro na un feria?
10. Abo lo kier bay cerca un mirado di futuro? Dicon?
11. Dicon no ta bon pa kere tur cos cu un mirado di futuro pronostica?
12. Con por ta cu e futuro di nos isla of di mundo por depende un parti di nos mes?
13. Dicon e idea cu nos no sa kico ta bay pasa den futuro, ta fascinante?

4 Vocabulario

Secreto

“Bo a mira e corant di scol caba?”, Lisa ta puntra Ivo. “No, dicon?”, Ivo ta contesta. “Tin algo pret of interesante den e corant e biaha aki?” “Si”, Lisa ta bisa, “tin un rubrica nobo. E yama *Mi secreto*. Tur mucha cu kier, por skirbi algo tocante un secreto di nan mes. Nan ta public’e bou di e rubrica ‘Mi secreto’.”

“Esey si mi no ta compronde”, Ivo ta bisa. “Si bo skirbi bo secreto den un corant, e no ta secreto mas, toch? Tur hende por les’e y sa di dje.” “No, no ta asina e cos ta bay”, Lisa ta responde. “Ora bo skirbi bo secreto, bo ta uza un pseudonimo, esta un nomber inventa. Asina niun hende no sa ta ken bo ta. Den e corant aki tin algun secreto. Bo tambe kier lesa nan?”

Lisa y Ivo ta bay sinta riba un banki den cura di scol. Lisa ta habri e corant y e ta cuminsa lesa.

Mi tin un secreto cu ta molestia mi masha. Mi tio stima no por lesa ni skirbi. E ta un analfabeto. Dia Tio tabata mucha e no tabata gusta bay scol. Mi no kier pa niun hende sa cu Tio no por lesa ni skirbi. Mi mes ta bay siñ’e.

Subrina preocupada

“E subrina ey si stima su tio”, Lisa ta bisa. “Ta ken e subrina preocupa lo ta?”, Ivo ta puntra su mes. “Awor mi ta compronde kico ta un pseudonimo.

Laga nos sigui lesa numa, pasobra toch nos no ta haya sa di ken e secreto ta.”

Mi ta masha contento. Mi ta bay bira tanchi. Mi ruman grandi, biba na Boneiro, ta bay haya un baby. Ta secreto di mi ruman, su casa y ami. Mi a priminti cu mi no ta conta niun hende ainda.

Baby bruki

“Esey ta un secreto dushi”, Lisa ta bisa. “Cua secreto mas tin den corant?”, Ivo ta puntra.

Mi ta yora y sinti mi masha tristo. Mami cu Papi tabata pleita hopi. Awor mi Papi a bay keda cerca Welita. Mi ta mir’e tur dia, pero no ta manera antes.

Yiu tristo

“Di e noticia aki mi tambe ta bira un tiki tristo”, Ivo ta bisa. “Ban wak si e delaster secreto ta mas agradabel.”

Ta dificil pa mi no conta mi amiga algo. El a puntra mi caba dicon mi ta keto asina. Ta bay tin un fiesta di sorpresa p’e. Mi ta masha excita, pero mi boca ta seya.

Boca cayou

“Bo a ripara? Tin secreto dushi y tin secreto cu no ta niun tiki agradabel”, Lisa ta bisa.

“Si, ami ta prefera esunnan dushi manera e fiesta di sorpresa”, Ivo ta contesta. “Mi tin gana di sa pa ken e fiesta ta.”

“Ha, por lo pronto lo bo keda cu gana di sa”, Lisa ta bisa cu un smile. “Pasobra, mi amigo, tur cos cu tin di haber cu e fiesta ey te ainda ta un ... secreto!”

• excita

• molestia

• pseudonimo



1



Un ... ta algo cu bo no por of no kier conta otro hende.

2



Un ... den un corant ta trata semper e mesun topico.

3



Un ... ta un nomber inventa of secreto.

4



Un secreto cu no ta agradabel, por ... bo.

5



Ora bo ta ..., bo ta contento y nervioso pareu.

6



Ora bo boca ta ..., bo no ta conta niun hende nada.

Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

- Busca e pseudonimo di cada mucha den e cuenta.
- Skirbi banda di e pseudonimo ki sorto di secreto e mucha tin. Un secreto agradabel of un desagradabel.

Tarea 3

Bo sa e contesta?

- Tio di e subrina preocupa ta analfabeto. E no por lesa ni skirbi. Bo ta kere cu tin analfabeto riba nos isla?
- Kico bo ta kere nos por haci pa nan?

Tarea 4

- Purba splica con bo por organisa un fiesta di sorpresa.
- Pa ken abo tin gana di organisa un fiesta asina?

• rubrica

• secreto

• seya

5 Pensa bon

5a Trapi di palabra

- Lesa e grupo di tres palabra. Tin palabra mas fuerte cu otro.
- Pone cada palabra riba un tret di trapi.
- Pinta e trapi cu tres tret den bo schrift.
- E palabra menos fuerte ta bini te abou. Esun un tiki mas fuerte memey. Esun di mas fuerte te ariba.
Por ehempel:



1. yobe – fingi – basha
2. cana – lastra pia – core
3. hocha – kieskauw – come
4. grita hari – sonrei – hari
5. exigi – pidi – suplica
6. trek lip – yora – snik



5b Cua palabra bo ta scoge?


1. Un nomber inventa pa no uza bo mes nomber.
2. Algo cu bo no kier of por conta un hende.
3. Algo ta laga bo sinti bo mes malo.
4. Un parti di corant cu ta trata semper e mesun topico.
5. Bo ta contento y nervioso pareu.
6. Algo cu ta dushi.
7. Un fiesta cu nan ta organisa pa bo sin cu bo sa.
8. Bo no ta conta niun hende nada.
9. Un hende cu no por lesa ni skirbi.

agradabel
analfabeto
boca seya
excita
fiesta di sorpresa
molestia
rubrica
secreto
pseudonimo

5c Charada

- E ta di bo, pero bo amigonan ta uz'e mas cu bo. Kico e ta?
Wak na pagina 200 si bo contesta ta bon.





5d Yena e palabra corecto

- Yena e palabra corecto y skirbi e frase den bo schrift.

pa – di – cu – na – for di

Sorpresa

1. Porfin e dia a yega cu Luca a haci 10 aña ... bida.
2. Mama a organisa un fiesta di sorpresa ... Luca.
3. Tur Luca su amigonan ta yega trempan ... e fiesta di sorpresa.
4. Luca, cu no sa di nada, ta sali un rato ... papi.
5. Ora nan dos yega e hofi, tur amigo ta bula sali ... e matanan.
Hunto nan ta grita: "Sorpresaaaaaa!"



bou di – na – pa – riba – rond di

6. Tur e amigonan ta bay para ... Luca pa dun'e pabien.
7. Despues tur mucha ta subi ... pista di baile pa nan balia.
8. ... final di e fiesta mama ta corda cu mester canta *Happy Birthday*.
9. Tur mucha ta bay para ... e palo di tamarein pa canta pa Luca.
10. Despues di e fiesta Luca ta yama mama masha danki ... e sorpresa.

5e Na unda?

- Cua di e palabranan ta bisa unda un hende of bestia ta of ta haci algo?
Raiza ta sinta den balcon. Unda Raiza ta sinta? Den balcon.

Nur y e cacho chikito

1. Papi ta yega cas cu un macutu.
2. Den e macutu e tin un cacho chikito.
3. Contento Nur ta core bay contra su tata na porta.
4. Mami ta den baño ta laba cabey.
5. Papi ta bay den cushina cu Nur.
6. Cu masha cuidou e ta pone e macutu riba vloer.
7. Nur ta cay sinta abou na suela y ta habri e macutu.
8. E cacho chikito ta core bay den cura.
9. Nur ta hay'e tras di rembak.
10. Nur ta drenta cas bek cu e cacho.



6 Skirbi bon

6a Completa palabra

- Completa e palabranan akibou.
- Skirbi tur palabra corectamente den bo schrift.

Regalo pa mama

1. Falta c...ter dia pa mama haci aña.
2. Tata kier regala mama un ...to pa e dia spec...l aki.
3. Ora mama bay trab..., nos ta bay scoge e regalo.
4. E model y color mester c...dra cu mama su smaak.
5. Mi tin m...do cu mama ta haya sa nos secreto.
6. Semper nos mes tambe sa cumpra algo chikito na t...nda pa mama.
7. Aña pasa mi ruman cu mi a cumpra un caha di palofr...
8. Segun dia ta acerca, mama ta cuminsa bira cur...so.
9. Ni maske c...nto mama puntra, nos no ta bis'e nada.
10. Ora mama wak su regalo, e ta spanta te hera cay fl...w.
11. Mama ta haci un f...sta pa mustra fam... completo su regalo.




6b Traha un lista

- Tin secreto cu ta miho pa bo warda nan.
Esaki ta conta tanto pa mucha como pa hende grandi.
- Traha den bo schrift un lista cu algun di e secretonan aki.
- Traha un pintura acerca.

Lista di secreto bon warda

1. Codigo di alarma di cas	5.....
2.	6.....
3.	7.....
4.	





6c Ban haci nos klas mas atractivo

- Bo ta bay haci algo cu mester keda un secreto. E mester ta un sorpresa.
- Pidi bo amigonan di klas pa yuda bo.
- Boso ta bay haci algun cambio na boso klas pa e bira mas atractivo.
- Con boso lo mester hacie?
- Pensa con boso lo haci boso klas mas atractivo.
- Traha un plan y skirbi e plan den bo schrift.



6d Parti palabra den silaba y traha palabra nobo

- Parti e palabra den silaba.
- Skirbi e silabanan den bo schrift.
- Despues bo ta bay combina silaba pa mira si bo por forma palabra nobo.
Ehempel: aparato → a-pa-ra-to
E palabranan nobo: para - pato - rapa - rato - topa
- Skirbi e palabranan den bo schrift.

- Sigui na mes manera.

calacuna	totalica	tentalaria
bateria	pasapalo	tapadera
catapila	arepita	coroto



6e Pinta un secreto

- Ban traha un pintura cu ta encera un secreto.
- Bo mester por mira na e pintura bon cla, si ta un secreto agradabel of uno desagradabel.
- Pensa bon prome kico bo kier pinta. Tambe con bo ta pint'e.
Ehempel:
Bo kier pinta e regalo pa madushi cu bo tin scondi den cashi.
Bo ta pinta e cashi.
Bo ta mira mita di e regalo ta sali for di patras di e pañanan.
Esaki ta un secreto agradabel.
- Ban pensa y pinta bo secreto awor.



1 Scucha y papia

Pa mi wowo so ...

"Mim, Mim, Miriam. Miriam, mama ta yama bo masha ora! Ta bo beurt pa laba tayo."

Porfin Miriam ta tende cu Kiran ta yam'e.

Lihe e ta pone un buki diki chikito bou di su cusinchi.

"Ta kico bo a sconde?", Kiran ta puntra.

"No ta cos di bo ni pa bo", Miriam ta contesta coriendo.

"Mira pa bo sali for di mi camber."

Pero Kiran ta asina caweta cu e ta hisa e cusinchi y ta wak bou di dje asina Miriam a disparce. Ahan, e ta pensa, ta e diario cu Miriam a haya di tanchi Dora dia el a haci 9 aña.

Ta kico Kiran ta bay haci? E ta bay lesa den e diario di Miriam?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.






2 Mi por lesa ?oterces arutircs at ocik

1.




Hopi tempo pasa hende a inventa un manera pa nota y asina warda informacion: escritura. Esey kiermen cu hende a cuminsa skirbi. Cu simbolo riba palo of piedra y despues riba papel, nan tabata percura pa cierto informacion keda warda.

3.




Pero kico bo por a haci si bo kier a evita cu e mensahero of e partido di carta ta habri bo carta na caminda y lesa loke bo a skirbi? Antes tabata seya un carta. Esey kiermen cu bo ta cera e carta cu un seyo. Un seyo ta traha di was di abeha. Den dje ta imprimi un stempel. Awendia nos ta hinca un carta den un envelop y plak e cera. Si bo kier, bo por seya e envelop tambe.

2.




Tabata un invento tremendo, pasobra prome cu esey hende mester a corda tur cos. Awor no tabata problema mas. Bo por a manda e mensahe despues riba papel sin cu bo mester a topa otro. Ta asina si, cu esun cu ta ricibi e carta, mester por a lesa e simbolonan cu e otro a nota.

4.



Ora bo manda un carta pa un hende cu un mensahe secreto, bo no kier pa otro persona den su bisindario tambe lesa loke bo a skirbi. Ta con bo ta evita esey? Exactamente! Bo ta percura di uza un escritura nobo, uno cu ningun hende no por lesa ainda. Ta un of algun hende so bo ta bisa ta kico e simbolonan cu bo a uza ta nifica. Pa otro hende nan ta keda un secreto. Asina escritura secreto of escritura cifra a nace.



Den curso di tempo hende a inventa y uza varios escritura secreto. Despues a bin descifra diferente di nan. Dje secreto ey tampoco nan no tabata. Apesar di esey, te ainda ta gracioso pa skirbi un mensahe of carta den linguahe secreto, como cu no ta tur hende sa con escritura secreto ta funciona. Bo mester tin e clave of codigo pa bo por lesa un mensahe asina.



E clave of codigo por ta un letter cu bo tin cu bolter. E por ta tambe un palabra cu bo tin cu yena na final di cada frase. Kisas bo tin cu sa cu bo mester lesa e frasenan di patras bay dilanti pa asina bo por descifra e mensahe. A proposito, bo a logra descifra e titulo di e texto aki caba?

3 Bo a comprende?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Ki sorto di texto esaki ta?
Scoge entre:
 - A. Un cuenta
 - B. Un texto cu ta siña bo algo.
3. Kico ta topico di e texto aki? Esta, kico e texto ta trata? No uza mas cu tres palabra pa duna e topico.
4. Kico hende a inventa hopi tempo pasa pa nota y warda informacion?
5. Mira plachi 1. Abo por lesa e texto riba e piedra? Dicon bo no por?

6. Tabata un invento *tremendo*. Cua otro palabra bo por pone na luga di *tremendo*?
7. Antes si bo a lubida di bisa algo, esey tabata un desaster. Dicon bo ta kere?
8. Kico hende tabata haci antes pa evita cu un mensahero of partido di carta ta lesa loke nan a skirbi?
9. Con bo por evita cu cierto hende ta lesa bo mensahe secreto?
10. Dicon ta gracioso pa uza escritura secreto?
11. Kico e clave of codigo por ta?
12. Duna un ehempel mas di un clave pa un escritura secreto.

4 Vocabulario

Scritura secreto

Si bo kier manda un mensahe secreto pa bo amigo of amiga, bo por palabra cu bo ta uza cifra na luga di letter. Cada cifra ta representa un letter di alfabet.

Asina bo ta inventa un scritura secreto of un codigo secreto.

Sigur bo sa caba cu den tempo di guera e gobiernonan tabata uza codigo secreto pa manda mensahe importante. Pero bo sa tambe cu awendia gobernante y cierto comerciante te ainda sa manda mensahe importante den codigo secreto? Asina nan tin sigur cu hende cu no ta permiti pa lesa e texto, no ta haya sa kico e mensahe cu nan a manda ta.

Bon mira, tin dos sorto di scritura secreto. Na e prome sorto cada cifra di e mensahe ta bira un letter. Na e di dos sorto ta cambia e secuencia di e leternan di un texto.

Naturalmente tin hopi variante di e dos sistemanan aki.

E prome sistema ta mas simpel. Mucha sa uza esey mas tanto si nan kier skirbi algo den idioma secreto.

Skirbi un mensahe den un codigo secreto ta dibertido.

Bo ta kere cu bo por inventa un scritura secreto bo mes?



Tarea 1

Kico bo ta yena?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

Bo sa e contesta?

Cu simbolo riba palo, piedra of papel hende tabata percira antes pa cierto

informacion keda warda.

Kico nos ta uza awendia pa nota cierto informacion pa asina e informacion keda warda?

Tarea 3

Abo a yega di skirbi algo den un scritura secreto? Si of no? Ta bo mes a inventa e idioma secreto? Conta con esey a bay. Den grupo ta traha un frase den idioma secreto.

• clave

• codigo secreto

• decifra


• scritura



1 Hopi tempo pasa hende a inventa un manera pa nota y asina warda informacion: ... Nan a cuminsa skirbi.




2 Cu ... riba palo, piedra of papel hende tabata percura pa cierto informacion keda warda.



3 Antes tabata seya un carta. Esey kiermen cu bo ta cera e carta cu un ...



4 Si bo kier manda un mensahe secreto, bo por inventa un ... of un ...



5 Pa bo lesa un carta cu ta skirbi den un escritura secreto, bo mester tin e ... of e codigo.



6 Cu e codigo bo por ..., esta lesa y comprende e mensahe secreto.

• escritura secreto

• seyo

• simbolo

5 Pensa bon

5f Busca e verbo

- Busca e *verbo* den cada frase.
Puntra y contesta kico e hende, bestia, mata of cos ta haci.


Nos escondite


1. Shakir ta lanta su omo for di soño.
2. Awe su omo ta traha un casita den e palo di kenepa.
3. E amigonan di Shakir ta yega hopi tempran mes.
4. Shakir ta verf e borchu cu number di e cas turesten.
5. Despues porfin Omo ta aparece den porta di e bouwkeet.
6. E ta coy su potlood y su caha di herment.
7. Omo ta lesa e number di e casita.
8. E ta gusta e number *Nos escondite* hopi mes.
9. Despues Omo ta colga un trapi di cabuya na e casita di palo.
10. Riba e trapi nan ta subi den e casita *Nos escondite*.



5g Cua splicacion bo ta scoje?

- | | |
|---------------------|--|
| 1. scritura | a. e manera pa skirbi cifra |
| | b. e manera pa skirbi letter y cifra |
| 2. scritura secreto | a. un scritura dificil |
| | b. un scritura cu cierto hende so por lesa y compronde |
| 3. simbolo | a. un signo, un letter of un grupo di letter |
| | b. un signo, un letter of un grupo di letter cu ta representa algo |
| 4. decifra | a. lesa un mensahe secreto |
| | b. lesa y compronde un mensahe secreto |
| 5. clave of codigo | a. algo cu bo ta uza pa lesa un mensahe secreto |
| | b. algo cu bo ta uza pa lesa y compronde un mensahe secreto |
| 6. seyo | a. un seyo ta traha di was di abeha. Den dje ta imprimi un stempel |
| | b. un diario secreto |
| 7. mensahero | a. un hende cu ta hiba, trece y skirbi mensahe |
| | b. un hende cu ta hiba y trece mensahe |





5h Ki ora algo a of ta sosode?

- Cua palabra ta bisa ki ora algo a of ta sosode?
Atardi Raiza a skirbi un carta. – Ki ora Raiza a skirbi un carta? – Atardi

Miriam su diario (parti 1)

1. Anochi Miriam a skirbi un secreto den su diario.
2. Mainta el a sconde su diario un caminda.
3. Pero despues e no por hay'e.
4. Djis su ruman Kiran ta yega cas.
5. Sigur e ta haya e diario mesora.
6. Lo e keda tenta Miriam atardi?



5i Con algo a of ta sosode?

- Cua palabra ta bisa con algo a of ta sosode?
Raiza a mail wela lihe. – Con Raiza a mail wela? – Lihe

Miriam su diario (parti 2)

1. Pura Miriam ta busca su diario despues di scol.
2. Nervioso e ta wak den su camber, den sala y den baño.
3. E ta desapunta ora e no por haya su diario.
4. Tristo Miriam ta cay sinta riba su cama.
5. Ansha e ta bisa: "Basta Kiran no haya mi diario."
6. Alivia Miriam ta dal un grito ora e mira algo berde.
7. Contento e ta coy su diario bou di cashi.

5j Pasado of presente?

- Lesa e texto cortico.
- Bisa si e cuenta a tuma luga den pasado of si e ta tuma luga awor, esta den presente. Splica bo contesta.



Un carta misterioso

E partido di carta ta duna Kim un envelop grandi seya.
Kim ta kibra e seyo cora y ta habri e envelop.
Un tiki nervioso e ta saca un carta.
E carta ta skirbi den escritura secreto.
Kim ta cuminsa lesa e carta misterioso.

6 Skirbi bon

6f Cua frase e palabranan ta forma?

- Den e rijnan di 5 letter falta cada biaha *un* letter.
- Skirbi e letternan cu falta, tras di otro den bo schrift.
- Cua ta e 5 palabranan cu bo ta mira pega na otro? Skirbi e palabranan.
- Cua frase e palabranan ta forma?



- | | | |
|--------------|---------------|---------------|
| 1. . u v w x | 7. . f g h i | 13. v w x . z |
| 2. f g h . j | 8. n o p q . | 14. . b c d e |
| 3. r s . u v | 9. c . e f g | 15. x y z a . |
| 4. . p q r s | 10. . f g h i | 16. . f g h i |
| 5. . b c d e | 11. p q r . t | 17. p q . s t |
| 6. . q r s t | 12. . v w x y | 18. l m n . p |

6g Con e secuencia mester ta?

- Iris tambe tin un diario mescos cu su amiga Miriam. Iris no ta worry si su amiga Miriam lesa den dje. Pa pret, Iris a bruha secuencia di e frasenan di e siguiente cuenta un tiki.
- Coregi e cuenta. E prome y e delaster frase so ta na nan luga.

Un susto

1. Mainta a pasa un cos masha straño.
2. Den un bula mi tabata riba mi cama atrobe.
3. Corda cu ta un bestia tin den mi camber.
4. Ma semper mi sa pone nan bou di cama anochi.
5. Mi a pensa cu ta un pia di slof.
6. Mi no a para pensa ni un rato mas.
7. Ora mi a baha for di cama, mi a trapa riba un cos.
8. Pero a bin resulta cu ta riba un stift m'a trapa.
9. Ta kico lo mi a trapa riba dje anto?
10. Despues di awe si mi ta warda tur cos na nan luga.




6h Chiste

Un homber ta bini pa di seis biaha na un loket di cine.

Straña e cahera ta puntr'e: "Meneer, esaki ta di seis biaha cu bo ta bin cumpra un carchi pa e mesun pelicula?"


E homber ta responde: "Si, pasobra na entrada cada bes nan ta kibra mi carchi den dos."



6i Decifra frase

- E siguiente dos frasenan ta skirbi den un codigo secreto. Ata aki e clave.
- Cada letter di e palabranan a bira un cifra. Bo por descifra e escritura secreto?
- Skirbi e dos frasenan den bo schrift.

a = 1	h = 8	ñ = 15	u = 22
b = 2	i = 9	o = 16	v = 23
c = 3	j = 10	p = 17	w = 24
d = 4	k = 11	q = 18	x = 25
e = 5	l = 12	r = 19	y = 26
f = 6	m = 13	s = 20	z = 27
g = 7	n = 14	t = 21	



a. 22-14 16-12-9-6-1-14-21-5 14-16 17-16-19 2-22-12-1.

b. 2-16 21-1 22-14 1-12-22-13-14-16 20-1-2-9.


6j Diario di klas

- Bo ta haya un repi di papel. Riba e repi aki bo ta skirbi un secreto.
- Bo por skirbi un secreto di berdad of un cu bo mes a pensa.
- No skirbi bo nomber riba e papel.
Niun hende no mester sa ta di ken e ta.
- Duna bo juffrouw of meneer e papel cu bo secreto.
- Hunto e papelitonan aki ta bira diario di klas.
- Aki dos siman boso tur por lesa e diario aki.



6k Decifra un frase den scritura contrario

- Bo por descifra e frase akibou den scritura contrario?
- Uza un spiel chikito, si bo no ta logra. Pone e spiel banda di e frase.
- Lesa e frase cu ta aparece den e spiel.



Bo tambe tin un secreto?





1 Scucha y papia

Combersacion

- Bo a yega di wak presentacion di un mago?
- Cua triki bo a gusta mas? Bo a puntra e mago con el a haci e triki? Casi sigur e no a divulga con e ta realiza su triki, no?
- Dicon bo ta kere cu un mago no ta conta con e ta haci su triki?
- Tin diferente profesion cu mester tene nan mes na regla di etica di privacidad. Esey kiermen, cu esun cu ta haci e trabou ey no por comparti tur loke e sa cu otro hende.
Esaki ta conta entre otro tambe pa detective y dokter.
- E trabou di un detective ta varia. Tin biaha un detective ta yuda localisa un hende cu ta perdi. Un detective sa duna negoshi conseho con nan por proteha nan mes. Asina ladron y otro malechor no ta haya un chens. De bes en cuando un detective ta yuda polis cu un caso dificil.
- Dicon bo ta kere cu un detective no por comparti tur loke e sa cu otro hende?
- Abo kier bay haci e trabou di detective dia bo bira grandi? Splica bo contesta.
- Bo por puntra un dokter kico bo amigo ta sinti? Splica bo contesta.
- Kico e tres profesionnan riba e plachi aki tin en comun?

Regla di combersacion

Mi ta papia cla, pa tur hende por tende mi bon.

2 Mi por lesa Mago y ilusionista

1.



Bo sa cu magia ta algo cu ta existi hopi tempo caba? Sigur algun mil año. Con nos sa esey? Pasobra na Egipto, un pais leu for di aki, a haya un pintura di 4500 año bieu. Riba dje bo ta mira un mago cu ta presenta triki cu bala y beker.

2.



Hopi tempo pasa mago tabata entretene hende riba plasa. Pero a yega un momento cu e reynan a descubri con dibertido ta pa invita mago pa bin demostra nan trikinan magico na palacio. Despues otro hende rico tambe a cuminsa invita mago na nan fiesta.

3.



Mago a desaparece for di plasa. Bo por a mira nan solamente na fiesta y den teatro. Ey publico por a diberti cu e magonan y nan triki.
Asina pocopoco magia a bira un arte.

4.



Ta kico magia ta realmente? Haci magia ta algo misterioso. E mago ta haci triki of ta presenta tur sorto di triki. Asina un mago diripiente por saca un paloma for di un castol. Ora publico mira e trikinan di un mago, nan ta pensa: Con por ta? Nan ta haya un sensacion di algo misterioso. Un sentimiento cu ta un misterio di magia ta tuma luga.



5.



Un mago por uza tur sorto di obheto pa su trikinan, manera: carta, renchi, cabuya, lenso, bala, paloma, coneu y cosnan simpel di uzo diario. Hopi mago a specialisa nan mes. Nan ta bon den cierto triki. Asina tin mago cu ta tremendo den triki cu carta.

6.



Tin mago cu no ta traha cu obheto chikito. Nan ta mas specialisa pa traha cu hende. E magonan cu ta presenta triki caminda ta zaag caha cu hende aden den dos of ta laga hende desapare, nos ta yama ilusionista. Ni un mago comun ni un ilusionista hamas ta divulga con nan ta realisa nan triki. Esey ta nan gran secreto. Abo tambe lo tin gana di bira un mago?

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta titulo di e texto aki?
2. Ki sorto di texto esaki ta?
Scoge entre:
 - A. Un cuenta
 - B. Un texto cu ta siña bo algo.
3. Kico ta topico di e texto aki? Esta, kico e texto ta trata? No uza mas cu tres palabra pa duna e topico.
4. Door di un pintura nan sa cu magia ta existi pa hopi tempo caba. Bo por conta algo di e pintura?
5. Ora e mago presenta riba plasa, e hendenan tabata diberti. Cua palabra ta bisa esey?
6. Kico a pasa despues cu e reynan a descubri con dibertido ta pa invita mago pa bin demostra nan triki magico na palacio?
7. Na unda bo por a mira mago despues cu nan a desapare for di plasa?
8. Splica dicon haci magia ta algo asina misterioso.
9. Kico un mago por uza pa su trikinan?
10. Algun mago ta specialisa nan mes. Kico esey kier men?
11. Ki sorto di triki un ilusionista ta haci?
12. Kico un mago of un ilusionista lo no haci nunca?
13. Cua ta e diferencia entre un mago y un ilusionista?

4 Vocabulario

Secreto profesional

Show a caba y tur hende ta lanta para bati man. Nan ta duna mago Tom y e duo ilusionista Balani y Imara, un tremendo ovacion, esta un fuerte aplauso.

Mago Tom a duna un presentacion fantastico. Hende grandi y mucha tabata sinta wak boca habri ora e tabata haci magia.

Prome el a haci diferente triki cu carta. Caba el a saca un yuwana for di su castol y despues un paloma. Y na final el a tira cinco lenso colorido na laira y saca nan conopa na otro for di manga di su camisa. Ta con Tom ta logra haci e cosnan magico ey? Tur hende tabata puntra nan mes.

Pero nan no a haya mucho chens di pensa, pasobra djis despues e famoso duo ilusionista, Balani y Ismara, tabata na turno.

Asina nan a subi riba podium, Balani a pidi Imara pa bay drumi den un caha di palo. Publico a spanta te bira friu ora nan a mira con Balani a coy un zaag grandi. Prome cu nan por a pensa kico ta bay sosode, Balani a zaag e caha cu Imara aden den dos.

For di un banda di e caha tur hende tabata mira cabes di Imara sali y for di e otro banda su pianan. Seguidamente Balani a coy un clechi grandi y a tapa tur dos banda di e caha. Ora el a kita e clechi, Imara no tabata den e caha mas. El a disparce.

Spanta publico a keda wak. Kico lo a pasa cu pover Imara?

Pero algun minuut despues, algo masha espectacular a sosode. Riba un nubia color ros-blauw, Imara a zweef bini bek sano y salvo. Niun hende no por a kere nan wowo. Ta con Imara por a sali for di e caha? Y con e por a zweef y despues baha banda di Balani manera nada no a pasa? Pero riba e preguntanan ey niun hende no a haya contesta. Pasobra mago y ilusionista nunca no ta divulga con nan ta realisa nan triki. Esey ta nan gran secreto profesional. P'esey semper bay show di un mago y un ilusionista lo keda duna bo un sensacion di algo misterioso. Y semper bay lo bo keda puntra bo mes: Con esaki ta posibel?

Tarea 1

- Kico bo ta yena?
- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

- Purba di splica kico ta un secreto profesional.

• divulga

• entretene

• espectacular



1 Un ... ta un mago cu ta presenta triki special manera laga hende disarce.



2 Un mago cu a ... su mes, por haci cierto triki hopi bon.



3 Mago y ilusionista gusta ... hende. Nan kier pa hende pasa bon durante nan show.



4 Laga un hende zweef ta algo ..., esta algo masha special of fascinante.



5 Ora publico haya un tremendo show, e ta duna e artista un ..., esta un aplauso fuerte. Tin biaha publico ta lanta para tambe.



6 Mago y ilusionista nunca no ta ... con nan ta realisa nan triki. Nan no ta conta niun hende nada.

Tarea 3

- Abo a yega di wak un show di un mago of un ilusionista? Bo si a haya sa con el a haci un di su trikinan? Splica e proceso.

Tarea 4

- Dicon bo ta kere un mago of un ilusionista nunca lo conta bo con e ta realisa su triki?

• ilusionista

• ovacion

• specialisa

5 Pensa bon

5k Artículo y sustantivo

- Lesa e siguiente cuenta cu atencion.
- Despues bo ta pinta dos paraplu den bo schrift. Wak e ehempel akibou.
- Bou di un paraplu bo ta skirbi tur e articulonan cu bo ta haya den e frasenan.
- Bou di e otro paraplu bo ta skirbi tur e sustantivonan.



1. e – e – un



1. porta – camber – Ruben – poster

Detective


1. Riba e porta di e camber di Ruben tin un poster geplak.
2. Riba e poster tin un texto cu letter cora.
3. E texto ta bisa: Bo tin un problema?
4. Bo a perde un buki, un schrift of un otro cos?
5. Of bo ta busca un hende?
6. Coy bo telefon y yama mi of manda mi un mail.
7. Pa algun cuki y dies drop mi ta yuda bo.
8. Mi ta sigura bo cu mi ta resolve bo problema.
9. Pasobra mi ta un bon detective pa mucha.
10. Ruben kier bira manera su omo Simon cu ta un detective famoso.
11. Omo Simon sa localisa hende perdi.
12. Tambe el a yega di captura ladron y yuda polis cu caso dificil.
13. Mama cu papa sa di e asunto.
14. Aki poco dia Ruben lo bira man drechi di omo Simon.



5l Tres rij di palabra

- Traha tres rij di palabra. Un cu palabra cu ta pas cu e palabra *detective*.
Un rij cu ta pas cu e palabra *dokter* y un rij cu ta pas cu e palabra *magu*.

castol – hangua – investiga – ladron – localisa – malesa – marca di dede –
ovacion – paloma – podium – proteha – remedi – recept – samina – show – triki



5m Cua palabra bo tin cu yena?

- Akibou tin cada bes dos frase.
- Lesa e prome frase y yena e palabra cu falta den e di dos frase.
- Scoge for di e serie di palabra akibou.



mi – bo – e – nos – bosó – nan

- | | |
|---|-------------------------------|
| 1. Bo dokter no por conta otro hende ki falta bo. | ... mester tene esey secreto. |
| 2. Bo por bin tende un cos aki? | ... kier haci bo un pregunta. |
| 3. Kico e ilusionista a musta bo? | ... por bisa mi ta kico? |
| 4. Ami cu mi ruman a bay wak un show. | ... a gosa masha hopi mes. |
| 5. Detective Bulo y Rosa ta busca marca di dede. | ... kier haya e sospechoso. |
| 6. Abo y bo primo gusta haci triki | ... ta mescos cu mago. |

5n Cua descripcion bo ta scoge?

- Scoge pa cada palabra e descripcion corecto.

- | | |
|-----------------|---|
| 1. dispare | a. kita for di bista |
| | b. algo cu un hende ta bay sconde |
| 2. divulga | a. conta algo interesante |
| | b. conta algo cu ta secreto |
| 3. entretene | a. laga un hende diberti su mes |
| | b. laga un hende haci triki |
| 4. ilusionista | a. un mago cu ta laga yuwana sali for di su castol |
| | b. un mago cu triki special manera laga hende zweef |
| 5. conopa | a. mara na otro |
| | b. pone riba otro |
| 6. ovacion | a. un aplauso pober |
| | b. un tremendo aplauso |
| 7. presentacion | a. presenta algo pa hende sinta disfruta di dje:
un comedia, un concierto of un show |
| | b. grupo di hende cu ta sinta disfruta di wak algo |
| 8. publico | a. grupo di hende cu ta bin wak algo |
| | b. grupo di hende cu ta bin scucha y wak algo |



6 Skirbi bon

6l Lesa y skirbi

- Lesa e frasenan akibou bon.
- Skirbi e palabranan cu tin un otro color, nechi y sin eror den bo schrift.

1. E **detective** a uza un **microfon** chikito pa su **investigacion**.
2. Tambe el a saca diferente potret cu su **camara**.
3. Nos a bay un show di un mago y un **ilusionista**.
4. E mago a saca lenso **conopa** for di manga di su camisa.
5. Despues el a saca un **yuwana** for di su castol.
6. E ilusionista a laga un señora **disparce**.
7. Publico a duna nan tur dos un **ovacion**.
8. Dokter di cas ta scucha curason cu su **stetoscop**.



6m Dictado


6n Un mensahe

- Detective Rosario a mail un mensahe pa polis. El a skirbi e mensahe den un codigo secreto.
- Bo kier sa kico e detective a mail? Kita tur letter p den e mensahe.
- Nota e palabranan cu ta resta, den bo schrift. Lesa e mail awor.



PMpi pa plpopcpaplpipsa pe plpapdrpopn pcpu pnpops ptpa pbpupspcpa.
PE ptpa pkpepdpa pdpepn phpoptpepl PTprpipnpiptparpripa pdpepn
pcpapmpbpepr pnpupmpbpepr 15. PTpin pcpu paprpepsptp'e plpiphe!

PDpeptpepcptpipvpe PRpopspapripo



6o Chat

- Ayera Evy a bay e show di mago Tom. Awe e ta chat cu su amiga Maite na Hulanda. Evy kier cont'e tur cos di e show.
- Lesa e combersacion entre Evy y Maite. Algun di e frasenan a cay afo.
- Pensa kico Evy lo a skirbi Maite. Completa e texto den bo schrift.

Evy: Con ta bay, amiga. Bo t'ey? Laga nos chat. Mi tin algo di conta bo. Bo sa cu ayera mi a bay e show di mago Tom?

Maite: Esta bon! Kico bo a mira?

Evy:

Maite: Berdad? Cuanto triki cu carta mas e tabatin?

Evy:

Maite: Kico? Un paloma y un yuwana a sali for di e castol di Tom? Bestia di berdad? Con esey a bay?

Evy:

Maite: Mi tambe tin gana di wak un cos asina. Ki triki mas Tom tabatin?

Evy:


Maite: Ha, pret! 😊 Tur e lensonan tabata conopa na otro? Bo a haya chens di papia cu Tom despues di e show? Bo a puntr'e con e ta realisa su trikinan?

Evy:

Maite: Ay, no! 😞 Mi tabatin gana di sa e secreto.

Evy:

Maite: Bon idea! Ora mi t'ey den vakantie, nos por bay su show hunto. Si, mi tambe tin cu stop awor. Mi tin cu traha algun tarea pa scol. Ayo amiga, te mañan! xxx 😊 ❤️



1 Scucha y papia

E huerfano

Tabatin un homber di edad cu tabata conoce shelo masha bon mes, pasobra di dia y anochi e tabata sinta wak shelo.

Riba un anochi el a ripara cu tabata falta un strea.

Ta unda e strea a bay? El a puntra su mes. Diripiente el a mira un mucha homber para banda di dje. "Ken bo ta? Di unda bo ta bini?", e anciano a puntr'e. "Mi yama Kili y mi ta un huerfano, mi no tin mama ni tata. Mi a bay for di cas y mi a cana asina duro cu niun hende no por a conta mi pasonan."

"Ami ta un anciano, mi no tin yiu, ta un par di bestia mi tin. Bo por keda cerca mi con largo cu bo kier, Kili."

E anciano a lubida mes riba e strea cu a perde ...

Ta con lo bay cu Kili cerca e anciano?
Y unda e strea cu a perde a keda?

- Awor bo ta bay scucha e cuenta.
- Scucha bon.
- Despues bo por conta kico bo a tende.
- Bo a compronde e cuenta?
- Purba contesta e preguntanan cu bo maestra/o ta haci awor.



2 Mi por lesa

E receta secreto di Yeta

Na Kudawecha, mescos cu den tur otro barío di nos isla, tur cas tin nan mesun manera di prepara galiña. Diferente famia ta prepara galiña segun receta hereda. Esta, mama ta pasa receta pa yiu. Tin hende ta uza peper, notmescat y salo so. Otro ta pone siboyo, conoflok, promenton y tomati acerca. Tin cu ta uza curry, mientras otro ta laga e galiña drumi un rato den marinada prome cu nan has'e.

Famia, conoci y bisiaña ta intercambia receta, pero Yeta si ta tene su receta secreto. "Mi por ta pover", e ta bisa, "pero mi receta di galiña si ta bal oro. Niun hende den nos barío no por prepara galiña manera ami ta hacie."

Y Yeta tin rason. Cu specerij e ta traha un mescla unico. Ora Yeta hasa galiña, e parti paden ta keda moli moli y succulento. E parti pafo ta haya un casca sabroso y bros. Antes Yeta tabata invita su conocirnan bin come cerca dje ora e prepara galiña. Pero delaster tempo e no ta hacie mas. Yeta ta cushina pa su casa y su yiunan so. E tin miedo cu un hende ta reconoce e specerijnan cu e ta uza y asina divulga su receta secreto.

Mila y Clark ta bisiaña di Yeta. Antes Yeta tabata invita nan y nan yiunan casi tur weekend pa un comemento. Mila y Clark tabata gusta esey masha. Principalmente Mila. E no gusta cushina y su cuminda no ta cos di canta macamba. Mes bon cu Yeta por cushina, mes malo Mila ta cushina. Pero delaster lunanan Mila y

Clark no a haya invitacion mas. Nan no ta compronde dicon. Yeta ta cuminda nan cu masha smaak. Kiermen cu e no ta rabia. Mila y Clark ta sinti masha falta di e comementonan, principalmente ora holo dushi sali for di e cushina chikito di Yeta y plama den aire.

Na un momento asina Clark semper ta cera su wowo. E ta mira un tayo cu pia di galiña bros bros su dilanti. E idea so ta pone su boca core awa.

Riba un dia Mila mes ta prepara galiña. Bon hambra Clark y e muchanan ta cay sinta na mesa. Pero despues cu Clark a dal un hap, e ta pone e pia di galiña bek riba su tayo. "Dushi, esaki si nos no por come", e ta bisa Mila. "Paden e galiña ta curu ainda, mientras pafo e ta casi preto. Bo sa kico, mi ta bay busca un manera pa haya e receta di bisiaña Yeta."

Dos dia despues ora Clark ta drumi den su hamaca riba veranda, e ta mira Yeta yega cas cu un caha di pia di galiña. "Aha! Awe ta e dia!", Clark ta bisa. Cu un pen y un pida papel e ta bay sinta den e palo di mispel banda di e cushina di Yeta. Mientras Yeta ta cushina, Clark ta skirbi precies kico e ta haci. Ora Yeta ta cla, Clark ta bay cas lihe. "Mi tin e receta!", e ta bisa Mila. "Ban, laga nos drenta cushina mesora. Mi barica ta gruña. Ami ta lesa e receta y abo ta cushina. Prome bo tin cu laba e galiña den poco awa cu lamunchi." "Ay, co'i kens", Mila ta bisa, "awa so ta basta." "Manera bo kier", Clark ta contesta. "Bon, awor bo tin cu bruha amandel mula, appel raspa, pida pida gember, siboyo, rasenchi y paneermeel den un comchi." "Nunca nos



no a uza amandel, appel y gember”, Mila ta kik. “Awe tampoco no mester.” Clark ta hisa su schouder. Djey e ta bisa: “Bo tin cu hunta e mescla riba e pianan di galiña. Despues bo ta hasa nan un pa un den azeta di coco.” “Azeta di coco?”, Mila ta bisa asombra, “ay, co’i loco. Azeta di maishi mes ta bon.” Mila ta hasa e galiña na e manera di custumber.

Ora e ta cla, tur hende ta bay sinta na mesa. Despues di e prome hap e muchanan ta bisa: “Mama, e galiña aki ta smaak mescos cu esun di bo.” “Ha, mi tampoco no ta sinti diferencia”, Mila ta bisa. “E receta no ta sirbi pa nada.” Clark ta suspira profundo. E si sa miho. Tur su molester tabata pornada ...

3 Bo a compronde?

- Lesa e cuenta prome.
- Despues contesta e preguntanan.

Pregunta

1. Kico ta topico di e cuenta aki? No uza mas cu tres palabra pa duna e topico.
2. Kico ta un receta hereda?
3. Dicon Yeta no kier intercambia receta?
4. Kico Yeta kiermen ora e bisa cu su receta di galiña ta bal oro?
5. Con e galiña di Yeta ta smaak ora e ta cla?
6. Dicon Yeta no ta invita hende mas pa bin come?
7. Con bisiña Mila ta cushina?
8. Kico Clark ta haci ora holo dushi sali for di Yeta su cushina?
9. Dicon Clark ta dicidi di busca un manera pa haya e receta di Yeta?
10. Con Clark ta haya e receta?
11. Ki otro manera Clark por a uza pa haya sa e receta di Yeta?
12. Mila ta haci precies loke tin skirbi den e receta? Splica bo contesta.
13. Dicon e galiña di Mila ta smaak manera semper?
14. Dicon bo ta kere cu Clark ta suspira?



4 Vocabulario

Coca cola su receta secreto

Hopi aña pasa un boticario cu yama John Pemberton a inventa coca cola.

Coca cola tabata un bebida destina pa hende malo. E tabata cura entre otro dolor di cabes y kita cansancio.

Pero a resulta cu e remedi tabatin un sabor asina dushi cu hopi hende a cuminsa beb'e.

Tabatin yen di otro sorto di bebida mas, pero coca cola tabata esun mas gusta.

Señor Pemberton a cuida e receta masha bon mes. E no tabata kier pa ningun otro hende haya sa con e ta traha coca cola. Algun hende ta bisa cu ni su yiunan no tabata sa e receta.

Ainda e receta di coca cola ta un secreto masha grandi. E receta ta bon warda den safe di un banco na Merca. Rond mundo ta un par di hende so sa con ta traha coca cola. Nan mester respeta e reglanan di

secresia, esta, nan no por duna niun hende e receta di coca cola.

Na Merca nan ta traha un extracto di coca cola. E extracto ta un stropi sterki concentra cu ingredientenan secreto. E stropi aki nan ta manda pa tur fabrica di coca cola rond mundo.

Den e fabrica ta bruha e stropi cu awa purifica, esta awa cu nan a haci limpi na un manera special.

Rond mundo ta limpia e awa di e mes manera aki pa e coca cola haya e mesun smaak tur caminda.

Pa gran parti coca cola ta consisti di awa y sucu.

Antes coca cola tabata bin den un boter di glas. Un suplado di glas a duna e boter su forma famoso.

Esey ta e forma di un fruta di cacao. E forma di e boter aki ta bol cu strepi vertical aden mescos cu e fruta di cacao. Awendia mayoria caminda por cumpra coca cola na bleki of boter di plastic.

Tarea 1

Kico bo ta mira?

- Lesa e frase bou di cada plachi.
- Busca e palabra cu falta, den e rij akibou.
- Skirbi e palabra den bo schrift.

Tarea 2

Bo sa e contesta?

- Cua refresco mas bo conoce cu parce coca cola?

- Bo ta haya cu esaki ta smaak mescos?

Tarea 3

- Dicon ta bon pa tene e receta di coca cola secreto?
- Abo tambe conoce un receta secreto? Kico bo por conta di dje?

• destina

• extracto

• purifica




1



Coca cola tabata un bebida ... pa hende malo.

2



E receta di coca cola ta un secreto. E ta warda den ... di un banco na Merca.

3



E hendenan cu sa con ta traha coca cola, mester respeta e reglanan di ... Nan no por duna niun hende e receta.

4



Na Merca nan ta traha un ... di coca cola. Esta, un stropi sterki concentra.

5



Den fabrica ta bruha e stropi cu awa ...

6



Un ... a duna e boter di coca cola su forma famoso.

- safe

- secrecia

- suplado di glas


5 Pensa bon

5o Cua palabra ta nifica mescos cu e palabra cursiva?

- Scoge un palabra den e serie akibou cu ta nifica mescos cu e palabranan cursiva den e frase.
- Traha dos rij y skirbi e palabranan den bo schrift.
- *Hacie asina:* 1. *homber di edad – anciano*

anciano – bolbe – cambia – gorda – huerfano –
murmura – risca – sabana – sabiduria – shelo – sorpresa

1. E *homber di edad* tabata biba su so.
2. Tur anochi e tabata wak e streanan na *firmamento*.
3. Kili tabata un mucha *sin mama y sin tata*.
4. E anciano tabata warda Kili *regresa* pa e hiba e bestianan bay come.
5. E *conocemento* cu Kili a haya di su tata ta un secreto.
6. Despues di algun dia e bacanan di e anciano a *bira gordo*.
7. E anciano no tabata *tribi* puntra Kili nada.
8. Kili a hiba e bacanan na un *tereno grandi cu poco vegetacion*.
9. Kili a hisa man na laira y a *bisa algo pocopoco*.
10. E anciano no por a contene un grito di *asombro*.
11. Kili a *transforma* den mil luz chikito.



5p Palabra cu ta caba mescos


- Busca tur palabra cu ta caba mescos.
- Pone nan den e rij corecto den bo schrift.
- Skirbi un palabra mas den cada rij.

ashi oshi ishi ushi uchi ichi

lombrishi – catuchi – pandushi – cuchicuchi – potoshi – dashi – lagadishi –
ganashi – garoshi – ofishi – buscuchi – mustashi – madushi – bichi – cadushi –
negoshi – stichi – tapushi – curashi – shinishi – prikichi – holoshi

* Contesta di charada 5c

Bo number



5q Drecha frase

- E partinan di palabra di cada frase a bruha den otro.
- Drecha e frasenan y skirbi nan corectamente den bo schrift.



Pindakaas, un secreto dushi

1. un fabrica di pindakaas – ta bay bishita – Awe – cu scol – Melisa.
2. henter e proceso – te pindakaas – Cu atencion – ta sigui – di pinda – e.
3. bon warda – un secreto – ta – E receta di pindakaas.
4. ta asina cremoso – Melisa – pindakaas – ta haya sa – dicon.
5. e pindakaas – ta keda – Tambe – cremoso – dicon – den e pochi.
6. mas importante – ta – E mulina di pinda – di e fabrica – e parti.
7. Cu – un pasta – e pindanan – nan – e mashin aki – pa forma – ta mula.
8. un team special – Tin – di e pindakaas – cu – smaak – ta test.
9. no ta plak – Si – den bo boca – e pindakaas – ta bon – e.
10. ta yena – un mashin – Por ultimo – e boternan – cu pindakaas.

5r Kico bo ta yena?

- Den cada frase falta palabra.
- Busca y skirbi e palabra(nan) cu falta den bo schrift. Bo por scoge for di:

bros – buki di receta – conoci – core awa – diberticion – entusiasmo – hereda – mescla – original – succulento

Yeta su receta

1. Yeta ta cushina tremendo, p'esey el a bira un coki ...
2. Cushinamento a bira manera un ... pa Yeta.
3. Specialmente diadomingo e ta traha cu ... den cushina.
4. E ta prepara yen di cuminda dushi for di un ... bieu.
5. Yeta su plato favorito ta galiña prepara segun un receta ...
6. Pasobra esey ta un receta secreto cu el a ... di su mama.
7. Cu specerij e ta traha un ... special pa galiña.
8. Cu esaki e galiña ta haya un casca sabroso y ... pafo.
9. Anto di paden e galiña ta keda moli moli y ...
10. Yeta su galiña ta pone tur hende nan boca ...



6 Skirbi bon

6p Cua palabra ta corectamente skirbi?

- Scoge y yena e palabra cu ta corectamente skirbi.



Boticario Pemberton a ... coca cola.
 E tabata un bebida ... pa hende malo.
 E tabata cura dolor di cabes y kita ...
 Pero otro hende tambe a ... beb'e.
 Señor Pemberton a ... e receta bon.
 E receta ta bon warda den un ...
 Tur hende ta respeta regla di ...

inventa – enventa – envinta
 distina – destina – destinia
 cansancio – kansasio – cansansho
 kuminca – kuminsa – cuminsa
 kiuda – cuida – kuyda
 safe – seif – sef
 secrecia – secreshia – sekresia

6q Yena letter den palabra

- E palabranan aki bou falta letter.
- Scoge for di *na – ña – nia – ya* y skirbi e palabra den bo schrift.


ali...	bali...	vitami...	panta...
canti...	gelati...	se...l	ge...l
cabi...	cabu...	colo...	calum...
miski...	discipli...	bata...	hara...



6r Cuenta cu ta pasa rond

- Bo maestra/o ta traha grupo di cuater mucha.
- Cada mucha ta haya un pida papel.
- Riba borchu tin dos frase skirbi. E frasenan ta comienso di un cuenta.
- Copia e frasenan riba bo blachi.
- Bo ta haya cinco minuut pa sigui skirbi e cuenta.
- Despues di cinco minuut tur mucha ta pasa e blachi pa e siguiente mucha den su grupo.
- Lesa kico tin para riba e blachi y sigui skirbi e cuenta.
- Asina e blachinan ta sigui bay rond, te ora nan pasa cerca tur mucha den e grupo.
- Ora bo haya bo blachi bek, bo ta skirbi un final pa e cuenta.
- Algun mucha ta haya turno pa lesa e cuenta dilanti klas.






7 Tarea varia

7a Puzzel


- Lesa e frase y pensa cua palabra mester yena.
- Skirbi e palabranan den bo schrift.



Horizontal, esta di man robes pa man drechi
5. tenemento di algo secreto


Vertical, esta di ariba bay abou

1. haci awa limpi limpi
2. pa ken of pa kico e ta
3. un stropi sterki concentra
4. un cashi di metal pa warda cos di balor



7b Diario di klas (2)

- Dos siman pasa bo a skirbi un secreto riba un pida papel. Bo maestra/o a plak tur e papelnan cu secreto ariba den un diario.
- Awe ta dia pa klas bay lesa e secretonan.
- Bo tambe kier lesa y papia di e secretonan cu otro mucha?
- Pidi bo maestra/o turno pa bo tambe conta.



7c Busca e frase

- Cua frase tin para akibou?



-ro + creto



-pa



-har



-waru



-spa